

শ্রীঅচিন্ত্যকুমার সেনগুপ্ত

অসংবরণ





# বহুৎসব

জগদানন্দপুরের মধ্য-ই:রাজি স্কুলটি কুর্সগতিতে বছর দশেক চ'লে এখন একেবারে থমকে দাঁড়িয়েছে। গ্রামের লোকের মনে সংশয় নেই যে, স্কুলের অস্ত্রিম ঘনিষে এসেছে। অথচ এ রকম হওয়া অস্বাভাবিক।

গ্রামটি নিতান্ত ছোট নয়। অনেক শিক্ষিত ভদ্রলোকের বাস। তাঁদের অনেকেই ক'লকাতায় ভালো চাকুরী করেন। বাবু-নামে পরিচিত মুখুজ্যেরা অবস্থাপন্ন জমিদার। সম্প্রতি হয় তো কিছু ঋণগ্রস্ত, তবু একটা মাইনর স্কুল চালাবার মতো সঙ্গতি এখনও তাঁদের আছে। তথাপি স্কুলটির এই অবস্থা।

জমিদার গ্রামে বড় একটা থাকেন না, ক'লকাতাতেই থাকেন। সম্প্রতি 'ইন্ডিয়ান কন্সট্রাকশন'র হিড়িকে দেশে এসেছেন। স্কুলের সভাপতি বড় ভাই দর্পনারায়ণ, সেক্রেটারী হর্ষনারায়ণ। কিন্তু তাঁদের অনুপস্থিতিতে নায়েব কন্সট্রাকশন রাইসই একাধারে সভাপতি ও সেক্রেটারী। এক কথায় তিনিই স্কুলের সর্বময় কর্তা।

মুখুজ্যেরা সপরিবারে গ্রামে আসার কয়েকদিন পবে স্কুলের হেডমাষ্টার দাশরথি ভগ্ন তাঁর অসুস্থ সহকর্মীদের নিয়ে একদা প্রাতঃকালে বাবুদের বাড়ীতে উপস্থিত হলেন।

হর্ষনারায়ণ তখন বৈঠকখানার সামনের খোলা জায়গায় একটা টেনিস লন কবার বন্দোবস্ত করছিলেন। বয়স তাঁর বছর ত্রিশের মধ্যে। গৌরবান্বিত সুদর্শন পুরুষ। পরণে শার্ট ও শর্ট। শরীরে বাঁধুনি আছে। মেজাজ একটু সাহেবী ধরনের।

শিক্ষকেরা নমস্কার ক'রে তাঁর কাছে দাঁড়াতেই তিনি বাঁ হাত দিয়ে সোজা বড়বাবুর ঘরটা দেখিয়ে দিলেন।

বললেন, আমার কাছে কেন? বড়বাবু আপিস-ঘরে রয়েছেন।

ছোটবাবু যাকে আফিস-ঘর বলেন বড়বাবু তাকে বলেন কাছারী। একখানা বড় হল-ঘরের একদিকে নীচু তক্তাপোষের উপর লম্বা ফরাস বিছানো। সেইখানে একটা মোটা তাকিয়ায় ঠেস দিয়ে দর্পনারায়ণবাবু গড়গড়া টানেন। তাঁর নিতান্ত অনুগত ব্রাহ্মণ বন্ধুবান্ধবেরা সেইখানেই বসেন। সামনে মেঝের উপর প্রশস্ত শতরঞ্জে অক্লান্তেরা বসে। আরও নিম্নপদস্থ যারা তারা বাইরে দাঁড়িয়ে থাকে। তাস-পাশা খেলা থেকে আরম্ভ ক'রে জমিদারী-সংক্রান্ত কাজকর্ম দেখা—সবই এই ঘরে বসেই সম্পন্ন হয়।

কি চেহারায়, কি প্রকৃতিতে দুটি ভাই সম্পূর্ণ বিপরীতধর্মী। দর্পনারায়ণ ছোট ভায়ের মতো অতটা ফর্সা নন। তাঁর চেয়ে মাথাতেও কিছু ছোট। দেহ স্থূল এবং মেজাজ সাহেবী নয়, মধ্যযুগীয় জমিদারের মতো। বয়স পঁয়তাল্লিশ উত্তীর্ণ হয়েছে। পোষাক—কৌচানো থান-ধুতি ও মেরজাই। ক্রমাগত তাম্রকূট-সেবনের ফলে মুখের কাঁচা পাকা গোঁফে তামাটে রং ধরেছে।

দাঁশরথি ভগ্ন সদলবলে সবিনয়ে প্রণাম ক'রে সেইখানে এসে দাঁড়ালেন।

দৰ্পনারায়ণ গড়গড়া থেকে মুখ তুলে জিজ্ঞাসা করলেন, কি ব্যাপার ?

মুখপাত্র-হিসাবে দাশরথি বললেন, আমরা মাইনর স্কুলের শিক্ষক। আপনি এসেছেন শুনে প্রণাম করতে এলাম। আমার নাম...

বাধা দিয়ে দৰ্পনারায়ণ বললেন, নাম বলতে হবে না বাপু। নাম আমি সকলেরই জানি। তোমরা তো আমার অচেনা নও। বোসো, বোসো। তার পরে ? স্কুল চলছে কেমন ?

—আজ্ঞে কই আর চলছে ? তবে এবারে ছুঁর এসেছেন। ব্যবস্থা একটা হবেই। তাই এঁদের বলছিলাম, ছ-সাত মাস মাইনে বাকি, সে এমন কিছু নয়, এখন স্কুলটা যাতে চলে ..

দৰ্পনারায়ণ সবিষয়ে বললেন, বল কি হে ! ছ-সাত মাস মাইনে বাকি ?

দাশরথি নিরীহভাবে বললেন, আজ্ঞে, বোধ করি কিছু বেশিই হবে। কিন্তু সে জন্তে ভাবছি না। আপনি যখন আছেন, তখন টাকা মারা যাবে না। এখন কথা হচ্ছে...

দৰ্পনারায়ণ চিন্তিতভাবে বললেন, সামান্য মাইনে পাও। তাও সাত মাসের উপর বাকি বলছ। আমি ভাবছি, তোমরা আছ কি ক'রে ?

দাশরথি বলতে যাচ্ছিলেন, না থাকলে যাব কোথায় ? বাজার তো জানেন ?

কিন্তু সে কথা বললেন না।

বললেন, না থেকে করি কি বলুন ? চারিদিকে দু'ক্রোশের মধ্যে এই একটি স্কুল। এটি যদি উঠে যায়, তা হ'লে দুখপোষ ছেলেদের কি দুর্গতি হবে বিবেচনা করুন।

—গ্রামের লোকে সে কথা বোঝে ?

—আজ্ঞে, বুঝবে না কেন ?

দর্পনারায়ণ বিরক্তভাবে বললেন, বোঝে যদি তো স্কুলটা রাখবার চেষ্টা করে না কেন ?

তার একটা কারণ আছে । গ্রামের লোক দেবে টাকা, আর কতী হবে জমিদারের বেনামে কন্দর্প রায়, এটা গ্রামের লোক পছন্দ করে না ।

বুদ্ধিমান দাশরথি কিন্তু সেদিক দিয়ে গেলেন না । বললেন, আজ্ঞে, জানেনই তো, গরীব ।

দর্পনারায়ণ এবার সোজা হয়ে উঠে বসলেন ।

বললেন, দেখ দাশরথি, তোমার স্কুলে আমাদের বাড়ীর কোনো ছেলে পড়ে ? কখনও পড়বে বলে আশা কর ?

—আজ্ঞে, কি দুখে পড়বে ? কলকাতায় . .

—তবেই বোঝ, স্কুলের জন্তে আমরা যে টাকা ঢেলেছি তা প্রজাদের ছেলেদের জন্তেই । কিন্তু প্রজারা তো আর জমিদারকে মানতে চায় না । তারা তো সাবালক হয়েছে । তবে জমিদার তাদের জন্তে আব কেন খরচ করবে ?

কথাটা ব মধ্যে একটু অতিরঞ্জন আছে । প্রজার কল্যাণ মিদ্যা নয় । কিন্তু এই উপলক্ষে দর্পনারায়ণও “রায় সাহেব” হয়েছেন ।

দাশরথি এ প্রসঙ্গও উত্থাপন করলেন না । তিনি প্রয়স্হাস্ত্রে কি একটা বলতে যাচ্ছিলেন, কিন্তু দর্পনারায়ণ তাঁকে থামিয়ে দিলেন ।

বললেন, না না, দাশরথি, এ বিষয়ে তুমি আর আমাদের একটি কথাও বোলো না । আমরা অনেক ভেবে স্থির করেছি, স্কুলের জন্তে জমিদারের পক্ষ থেকে আর একটি পয়সাও ব্যয় করা হবে না ।

এই রকম স্থির করার পিছনে একটা ইতিহাস আছে । কন্দর্প

রায়ের একটি আত্মীয় সম্প্রতি আই-এ পাশ করে বাড়ীতে বেকার বসে আছে। কন্দর্পের ইচ্ছা দাশরথিকে সরিয়ে সেইখানে তাকে বসানো। অথচ দাশরথি গ্রামের লোক। তাঁকে হঠাৎ তাড়ানোও সহজ নয়। স্কুল থেকে মাইনে পাওয়ার আর আশা নেই জেনে যদি তিনি স্বেচ্ছায় পদত্যাগ করেন, তা হলেই কাজটি সহজ হয়।

সেই উদ্দেশ্যেই কন্দর্প চাল চালছে। অবশ্য দর্পনারায়ণ তা জানেন না। কিন্তু দাশরথি তা অনুমান কবেছেন। সেই জন্তেই সাত-আট মাস মাইনে না পেয়েও তিনি নিজে চাকরী ছাড়েননি, অগ্নদেরও ছাড়তে দেননি।

কিন্তু ভূমিদারদের কথায় এবং দৃঢ়তায় এবারে দাশরথি চিন্তিত হলেন। নিজেদের মধ্যে গোপনে তাঁরা পরামর্শ করলেন, তাঁরা স্কুল একেবারে উঠিয়ে দিয়ে যাবেন, তবু কন্দর্প রায়ের আত্মীয়ের পথ প্রশস্ত করবার জন্তে পদত্যাগ করবেন না। একেবার স্কুল উঠে গেলে আবার নতুন ক'রে স্কুল করা সহজ হবে না। \* কিন্তু তার আগে স্কুলটিকে বাঁচিয়ে রাখবার জন্তে একবার শেষ চেষ্টা ক'রে দেখতে হবে। সেই উদ্দেশ্যে তাঁরা সদলবলে আর একবার গ্রামে বার হলেন।

সেদিনটা রবিবার।

আগে গ্রামেব যারা বছরেও একবার আসতেন না, ইভাকুয়েশনের জন্তে মেয়েছেলে গ্রামে পাঠাতে হওয়ায় তাঁদের অনেকেই এখন কেউ মাসে একবার, কেউ পক্ষান্তে একবার, কেউ কেউ বা সপ্তাহে একবার করেও আসছেন। স্মৃতরাং এখন রবিবারে গ্রাম জমজমাট হয়।

যারা কলকাতায় থেকে স্কুল কলেজে পড়ত, তারা গ্রামে এসে নিত্য-নূতন উপদ্রব আরম্ভ করেছে। আজ পাঁচ জনে জুটে জঙ্গল পরিষ্কার করছে, কাল ডোবা বন্ধ করছে, পরের দিন হয় তো বা রাস্তা সংস্কার করছে। এরা অল্পবয়স্ক বালক। রাজধানী থেকে এরা নিয়ে এসেছে জীবনযাত্রার বিচিত্র ধারণা। গ্রামের শিক্ষিত লোকেরা এদের ছেলেমানুষিতে হাসে, অশিক্ষিতেরা কোতুক বোধ করে।

দাশরথি হির করলেন, এদের স্কুল সম্বন্ধে উৎসাহিত করতে পারলে অনেক সুবিধা হয়।

ছেলেরা অমনিতেই সহজ-দাছ পদাথ। সূতরাং উৎসাহের আগুন জ্বলতে এক মুহূর্ত্ত বিলম্ব হ'ল না। তারা চাঁদার খাতা নিয়ে বেরিয়ে পড়লো।

সে একটা নূতন উপদ্রব!

এতদিন যা-কিছু তারা করছিল তাতে বাইরের লোকের ডাক পড়েনি। অবসর-সময়ে কেউ বা তাদের কাজ দেখতে আসতো, কেউ আসতো না। কিন্তু এবারে যে তারা লোকের ট্যাকে হাত বাড়ায়!

লোকেরা বিব্রত হয়ে উঠলো। চাঁদার খাতা হাতে ছেলেদের দেখলেই তারা স'রে পড়ে।

কিন্তু যে বিশেষ রবিবারের কথা বলছি, সেদিনে একটা বিশেষ ঘটনা ঘটলো :

দামোদর হালদার এ গ্রামের একজন বর্দ্ধিশ্রু ব্যক্তি। কলিকাতায় সুপারির ব্যবসা করে তিনি প্রচুর অর্থ উপার্জন করেন। লোকটি



নিতান্ত সামান্য অবস্থা থেকে বড়লোক হয়েছেন। ছেলেরেণা লেখাপড়া শেখার কোনো স্বেচ্ছা পাননি।

ছেলেরা তাঁর কাছে গিয়ে দাড়াইতেই তিনি স্কুল-সম্বন্ধে সমস্ত কথা জেনে নিলেন এবং দাশরথিকে ডেকে পাঠালেন।

বললেন, দেখ দাশরথি, তোমার স্কুলেব জন্তে যে টাকাটার অভাব পড়ে, সে আনিই দোব। পনেরো দিন ঘুরে ছেলেরা টাকা আদায় করেছে মোটে দু'টাকা ছ'আনা। ওসব বন্ধ করো।

টাকার পরিমাণে দাশরথি ক্রমেই স্কুল-সম্বন্ধে আশা বিসর্জন দিচ্ছিলেন। দামোদরের কথা শুনে তিনি আনন্দে লাফিয়ে উঠলেন।

বললেন, তোমার জয় হোক ভাই! তা যদি তুমি কব, গ্রামে চিরকাল তোমার নাম থেকে যাবে।

দামোদর বললেন, আমার নামের জন্তে ব্যস্ত নই ভাই। কিন্তু ইচ্ছা আছে স্কুলটা যদি আমার হাতেই দাও, ওর নামটা পালটে দোব। ওর সঙ্গে আমার বাবার নাম জুড়তে হবে।

দাশরথি চিন্তিত হ'লেন।

বললেন, সে তো অনেক হাঙ্গামা। নটন সাহেব ছিলেন জেলা-ম্যাজিস্ট্রেট। তাঁর নামে স্কুলটা ক'রে বড়বাবু 'রায় সাহেব' উপাধি পেলেন। সে-নাম বদলে অন্য নাম রাখতে গেলে গবর্ণমেন্টও তো চটতে পারেন।

দামোদর ব্যবসাদার লোক।

বললেন, সে আমি জানি নে ভাই। আমি মাসে একশো টাকা ক'বে দোব। আর একটা দালান বাড়ী ক'রে দোব। টেবিল-চেয়ার আসবাবপত্র যা দরকার তাও দোব। কিন্তু স্কুলের নাম হবে 'স্বরূপ

মধ্য-ইংরাজি বিতালয়'। জমিদার কিস্বা নায়েবের সঙ্গে তার কোনো সংস্রব থাকবে না। গ্রামের পাঁচজনকে নিয়ে কমিটি হবে।

প্রস্তাবটি লোভনীয়। কিন্তু সহজ নয়।

দাশরথি তখনই কোনো জবাব দিতে পারলেন না।

বললেন, গ্রামের পাঁচজনকে জিজ্ঞাসা ক'রে দেখি। তার পরে তোমাকে জানাবো, কি হয়।

গ্রামের লোকে সাগ্রহে প্রস্তাবটিতে সম্মতি দিলে।

জমিদারের কাছ থেকে স্কুলের জন্তে যে একটি পয়সাও পাওয়া যাবে না—সে তারা বুঝেছে। জমিদারকে তারা চেনে। তাদের নিজেদেরও টাকা দেবার সম্ভাবনা যদি বা কারো কারো থাকে, ইচ্ছা নেই। অথচ স্কুলটা রাখাও নিতান্ত প্রয়োজন। নইলে ছেলেদের পড়াশুনোর খুবই অসুবিধা হবে। অনেক ছেলের পড়া বন্ধই হয়ে যাবে। এর ওপর ছেলেদের হাতে চাঁদার খাতা তাদের কাছে দুঃস্বপ্নের মতো হয়ে উঠেছে।

এমন অবস্থায় দামোদর হালদার, কাঁচা টাকা যার হাতে প্রচুর জমেছে, যদি স্বৈচ্ছায় সমস্ত ভার বহন করতে সম্মত হয়, এই দুদিনে তার চেয়ে আনন্দের বিষয় আর কি করতে পারে?

উৎসাহ সকলের চেয়ে বেশী ছেলেদের।

তারা নিজেরাই গ্রামে ঢোল দিলে। দীঘির ঘাটে বটগাছের নীচে বেঞ্চি, টেবিল, চেয়ার সাজিয়ে সভা করলে। লোক কতক এলো, কতক দূরে দাঁড়িয়ে ব্যাপারটা নিরীক্ষণ করতে লাগলো, কতক বা জমিদারের অপ্রীতিভাজন হওয়ার ভয়ে এলোই না।

তথাপি সভা হ'ল।

জমিদারের ভয় করে না, এমন লোকের সংখ্যাও নিতান্ত কম নয়। তারাই সভা করলে। অনেক চিন্তার পর স্থির হ'ল, পুরাণে স্কল যেমন আছে তেমনি থাকবে। জমিদারই কার্যাতঃ তার মালিক। 'নর্টন নিড্‌ল ইংলিশ স্কুলে'র সঙ্গে সদাশয় নর্টন সাহেবেব পুণ্যস্মৃতি-রক্ষার দায়িত্ব জমিদারেরই। তিনি ইচ্ছা করলে সে স্মৃতি রাখতে পারেন, নাও রাখতে পাবেন। সে সম্বন্ধে কোনো নিদেবভাব পোষণ না করেই স্কুমারমতি বালকদের শিক্ষার প্রয়োজনে নতুন একটি স্কুল খোলা হবে, যার নাম হবে 'স্বরূপ মধ্য ইংরাজি বিদ্যালয়'। তার সভাপতি হবেন দামোদর হালদার। সেক্রেটারী অভিরাম মজুমদার। একটি ম্যানেজিং কমিটিও সেই সভায় গঠিত হ'ল।

আশ্চর্যের বিষয়, জমিদার-পক্ষ থেকে এ সম্বন্ধে বিন্দুমাত্র আপত্তিও উত্থাপিত হ'ল না। তাঁরা নিজেরা সভায় আসবেন, এ অবশ্য কেউ প্রত্যাশা করে না। কিন্তু তাঁদের কর্মচারীদের কেউ, অথবা অন্তর্গত জনেরাও প্রস্তাবটির পক্ষে অথবা বিপক্ষে একটি কথাও কইলেন না। এই ব্যাপারটা আসলে তাঁরা প্রকাশ্য অথবা পরোক্ষভাবে গ্রাহ্যেব মধ্যেই আনলেন না। তাঁরা তাঁদের মহিমাম্বিত উচ্চতায় নির্বিকারভাবে দূরে রইলেন।

দৃশ্যতঃ বিষয়টি খুব সহজ বলেই বোধ হয়। ছেলেরা একে এইভাবেই গ্রহণ করলে। কিন্তু জমিদারের সঙ্গে কারবার ক'রে যাওয়া ভূয়োদর্শিতা লাভ করেছে, নাযেব কন্দর্প রায়কে যারা জানে, তারা এই নির্বিকার ভাবে কালবৈশাখীর পূর্বেকার টুকরো মেঘের উদাসীনতা বলেই গ্রহণ ক'রে মনে মনে ভয় পেলে। এমন কি দাশরথি নিজেও।

কথা হ'ল, গ্রামের উত্তর প্রান্তে দামোদরদের যে পোড়ো জমিটা আছে, সেইখানে আপাততঃ মাটির একটা বাড়ী হবে স্কুলের জন্তে। বৈশাখের মধ্যেই তা সম্পূর্ণ হবে। তখন থেকে সেইখানে স্কুল বসবে। ইতিমধ্যে দামোদরের বাড়ীব বাইরের দিককার ঘরগুলোয় স্কুল চলবে। যুদ্ধ না থামলে দালান হওয়া অসম্ভব।

চেয়ার, বেঞ্চ, বোর্ড, ম্যাপ প্রভৃতির জন্তে দামোদর সেহ সভাতেই কমিটির হাতে তিন শত টাকা দিয়ে দিলেন।

স্থির হ'ল, ছেলেরা অবিলম্বে ট্রান্সফার নিয়ে নতুন স্কুলে ভর্তি হবে। তারা চলে আসার সঙ্গে সঙ্গে শিক্ষকেরা একে একে পদত্যাগ ক'রে নতুন স্কুলে যোগ দেবেন। ট্রান্সফার নেওয়া শেষ হয়ে গেলে দাশরথি সব শেষে নিজেকে আসবেন।

দামোদরের বাইরের দিককার ঘরগুলোয় স্কুল বসে গেল। পোড়ো জায়গায় তাড়াতাড়ি বাড়ী উঠতে লাগলো। দামোদরের টাকার অভাব নেই।

কিন্তু ফাল্গুন মাসের মাঝামাঝিও নটন স্কুল থেকে অর্দ্বকের বেশি ছেলে এল না। মাষ্টারও কয়েক জন মাত্র এলেন; সবাই দেখে আশ্চর্য্য হ'ল, দাশরথি শেষ পর্য্যন্ত নটনেই রয়ে গেলেন।

দামোদর তাতে দমলেন না। তাঁর টাকা আছে। স্কুলের জন্তে বাইরে থেকে তিনি একজন বি-এ পাশ প্রবীণ হেডমাষ্টার নিয়ে এলেন। আরও কয়েক জন বাছাই-করা শিক্ষকও আনা হ'ল।

এমনি ক'রে দুটি স্কুলই চলে। 'নটন' চলে প্রাচীন অভিজাত্যের

সঙ্গে নিঃশব্দে, ‘স্বরূপ’ নবীন ধনশালিতায় সশব্দে। সে শব্দ ওঠে ছেলেদের মহল থেকেই।

অবশেষে চৈত্রের শেষে ‘স্বরূপে’র বাড়ী শেষ হ’ল। সামনে খোলা মাঠ। একপ্রান্তে তিনদিকে তিনখানি প্রশস্ত গৃহ। মেজেয় সিমেন্ট ব্লকমক করেছে। স্থির হয়েছে অক্ষয় তৃতীয়ার দিনে গৃহ-প্রবেশ হবে। অনেক চেষ্টায় ও অর্থব্যয়ে মহকুমা-ম্যাজিস্ট্রেটকে সভাপতি হ’তে সম্মত করা হয়েছে।

কলকাতা থেকে দামোদর এনেছে কত রকমের খাবার, ফুলের তোড়া, মালা। আগের দিন অপরাহ্নেই স্কুল-প্রাঙ্গণে মূল্যবান প্রশস্ত সামিয়ানা টাঙানো হয়েছে। এত বড় সমারোহ এ অঞ্চলে বড় একটা হয় না।

অকস্মাৎ বিপর্যয় কাণ্ড !

ছপুর রাত্রে চীৎকার উঠলো, আগুন ! আগুন !

বৈশাখের রাত্রি।

পুকুর শুকনো, কোথাও একফোঁটা জল নেই।

গ্রামের লোক ছুটলো বটে, কিন্তু ‘স্বরূপ মধ্য ইংরাজি বিদ্যালয়’র বাড়ী, উৎসব-মণ্ডপের সামিয়ানা, বিদ্যালয়ের আসবাব কিছুই রক্ষা হ’ল না। দেখতে দেখতে সমস্ত পুড়ে ছাই হয়ে গেল।

ইউনিয়ন বোর্ডের প্রেসিডেন্ট কন্দর্প রায়ের রিপোর্ট গেল, এ কংগ্রেসীদের কাজ।

দামোদর ‘ওয়ার ফণ্ডে’ হাজার টাকা দিয়েছেন। স্কুলের দ্বারোদ্ঘাটন করেছেন এস-ডি-ও। এমন অবস্থায় অগ্নিকাণ্ডের আর কি অর্থ হ’তে পারে ?

খবরের কাগজেও ‘বান্ধলার নানা স্থানে বিক্ষোভ’-স্বস্তে খবরটা বড় বড় করে বেরুল। স্মৃতির বিষয়, কাকেও গ্রেপ্তার করা হ’ল না।

‘স্বরূপ মধ্য ইংরাজি বিদ্যালয়ে’র এইখানেই পরিসমাপ্তি ঘটলো।

এর মাস কয়েক পরে দাশরথি একদিন সকাল-সকাল স্কুলে এসে দেখেন—স্কুলে নতুন তালা ঝুলছে।

ছুটলেন তিনি কন্দর্প রায়ের কাছে। কন্দর্প রায় মিষ্টি হেসে বললেন, বাবু হুকুম পাঠিয়েছেন স্কুল বন্ধ ক’রে দিতে। কি করি বলুন, কর্তার ইচ্ছায় কন্ঠ! বাবু আগের মাসেই সপরিবারে কলকাতায় গেছেন।

দাশরথি চক্ষে অন্ধকার দেখলেন। তাঁর প্রায় বছরখানেকের মাইনে বাকি।

## তৃতীয় পক্ষ

দ্বিতীয়া পত্নীর বিয়োগের পর রামহরি কয়েকটা দিন মুহূনান হয়ে রইল।

কিন্তু ওই কয়েকটা দিনই মাত্র। জেলা বোর্ডের সাব-ওভার-সিয়ারের তার বেশী শোক করার সময় নেই। গুড সহযোগে খানকয়েক বাসি রুটি এবং এক পেয়ালা চা—এই খেয়ে রামহরি বাইসিকেল নিয়ে সকাল সাতটার আগেই বেরিয়ে যায়। জেলা বোর্ড থেকে কোথায় রাস্তা মেরামত হচ্ছে, কোথায় পুল তৈরী হচ্ছে, কোথায় পুকুর খোঁড়া হচ্ছে, সে সমস্ত তদারক ক'বে যখন সে ফেরে তখন কোনোদিন বারোটা, কোনোদিন বা একটা। তারপরে স্নানাহার করে একটুখানি নিদ্রা দিয়ে আবার তিনটের সময় বেরিয়ে পড়ে। এবারে আর রাস্তা তদারক নয়, অফিসে। তারপরে সন্ধ্যার আগে অফিস থেকে বাসায় ফিবে একটু জলযোগ ক'বে দত্তদের আড্ডায় তাস খেলতে যায়। ফিবতে রাত্রি এগাবোটা-বারোটা।

এই তাপ কাজ।

মফঃস্বল শহরে এই আশ্বেিনী মধ্য এবং এই চাকুণাতে বেশী দিন শোক করার অবসর কোথায়?

তাবপরে রামহরির বয়স হয়েছে পঞ্চাশের কাছাকাছি। ববে অনেক-গুলি ছেলেমেয়ে। প্রথম পক্ষের তিনটি—বড়টি মেয়ে। বছর দুই তার বয়েস। বছর চারেক আগে অনেক সমারোহ ক'রে রামহরির তার বিয়ে দিয়েছিলেন। কিন্তু দু'বছরের মধ্যে সিঁথির সিন্দূর, হাতের শাখা

খুইয়ে অভাগিনী অমলা বাপের বাড়ী ফিরে এল ! সেই থেকে সে বাপের বাড়ীতেই আছে ।

অমলার পরে যেটি—সুরেন, সে এবার ম্যাট্রিক দেবে । তার পরেরটি আরও নীচে পড়ে ।

দ্বিতীয় পক্ষের দুটি মাত্র ছেলে । বড়টি স্কুলে পড়ে ! ছোটটি বছর পাঁচেকের মাত্র ।

এই নিয়ে রামহরির সংসার ।

রামহরি লোকটি আসলে মন্দ নয় । কিন্তু কুলি ঠেঙ্গিয়ে ঠেঙ্গিয়ে বাইরেটা একেবারে কাঠখোঁট্টা । বেশী কথা সে বলতে পারে না, যেটুকু বলে তাও গুছিয়ে নয় । তার চেহারাও ঠিক এরই সঙ্গে সামঞ্জস্য রেখেছে : মাথায় প্রশস্ত টাক, মুখে বাঁটার মতো এক গোছা গোঁপ । কাজের চাপে দাড়ি কামানোর সময় কচিং মেলে । স্নতরাং সপ্তাহে অন্ততঃ পাঁচটা দিন খোঁচা-খোঁচা পাকা-পাকা দাড়িতে মুখমণ্ডল সমাকীর্ণ থাকে । বাইরে ক্রমাগত ধোরাঘুরি করার জন্যে শরীবে চর্বি জমার অবকাশ হয় না । শরীর দীর্ঘ এবং ক্ষীণ । গাল ভাঙ্গা ।

দ্বিতীয়া স্ত্রী মারা যাবার পর অশৌচের ক’দিন তাকে কিছু কাতর এবং অনুমনন্ব দেথাছিল । শ্রাদ্ধশাস্তি মিটে যাবার পবের দিনই আবার সে সকাল বেলায় বাইসিকেল নিয়ে বার হ’ল ।

অমলা একটু অবাক হ’ল । কিন্তু সেই সঙ্গে একটু খুশীও হ’ল । তার নিজের মা যখন মারা যায়, তখন তাব জ্ঞান হয়েছে । তখন রামহরির মুখের উপর শোকের যে ছাপ পড়েছিল, কিছু কিছু এখনও তার মনে পড়ে । সে সময় রামহরি লম্বা ছুটি নিয়ে দেশে চ’লে গিয়েছিল । সেই দীর্ঘ অবকাশকাল এবং তারপরে কাজে যোগ দিয়েও রামহরি চুল দাড়ি



সম্বন্ধে অমনোযোগী হয়ে উঠেছিল। মাথায় তেল দিত না, মাছ মাংস খেত না এবং তাসের আড্ডার আকর্ষণ ত্যাগ করে স্থানীয় রামকৃষ্ণ মিশনে যাতায়াত আরম্ভ করেছিল।

এক বছরের উর্দ্ধকাল এমনি চলেছিল। তারপরে মায়েব কান্নায়, আত্মীয়-স্বজনের অনুরোধে এবং বন্ধু-বান্ধবের জেদাজেদিতে অবশেষে বাধ্য হয়েই সে বিবাহ করে।

অমলার বয়স তখন ন' বছর হয়েছে, কি হয়নি। কিন্তু এ সকল বিষয়ে স্ত্রীমূলভ স্বাভাবিক প্রার্থণ্যের জন্মেই হোক, অথবা যে কারণেই হোক, সে সব দিনের কথা আজও তার বেশ মনে পড়ে।

রামহরির গার্হস্থ্য জীবনে ফিরিয়ে আনতে সেবাবে অতগুলি লোকের এক বছরেরও বেশী সময় লেগেছিল। আঁব এবাবে দশটি দিন কাটতে-না-কাটতেই রামহরি অত্যন্ত সহজভাবেই নিজের স্বাভাবিক জীবনযাত্রায় ফিরে এল।

অমলার একটু বিষ্ময় লাগে, তবু ভালোই লাগে। মনে মনে তার আনন্দ হয় এই ভেবে যে, রামহরি তার মাকে যেমন ভালোবেসেছিল, এমন আর কাকেও নয়। পুরুষ মানুষ বেশীদিন নারীহীন থাকে না। কিন্তু তাই ব'লে স্ত্রীদূব অতীত কালের রামহরির ভালোবাসার সেই সব প্রকাশকে কিছুই নয় ব'লে সে উড়িয়ে দেবে কি ক'রে?

নিজের মায়ের কথা মনে ক'রে অমলা বেশ গর্ব্ব অনুভব করলে।

আরও মাস তিনেক কেটে গেল।

নিজের মায়ের সব কথা অমলার ভালো মনে পড়ে না রামহরির

শোবার ঘরে তার মায়ের একটা বড় অয়েলপেন্টিং আছে। তার থেকে এই পর্যন্ত তার মনে পড়ে যে, সে মা ছিল ছোট-খাটো শ্রামবর্ণের একটি মেয়ে। চঞ্চল এবং চটপটে। চোখ থেকে সব সময় যেন কোতুক ছিটকে পড়ত ! মুখে সব সময় হাসি আর ছড়া।

কিন্তু এ মা ছিল উলটো। লম্বা, ফর্সা চেহারা। চোখের দৃষ্টি শান্ত। একে কখনও সে জোরে হাসতে শোনেনি, রেগে চীৎকার করতে শোনেনি, অভিমানে কাঁদতে দেখেনি। কোথাও যেন তার বাড়াবাড়ি ছিল না।

তার বেশ মনে পড়ে, রামহরি বেদিন ওকে নিয়ে এ- তার পবেব দিন সকালে সে চুপ করে দরজার পাশে দেওয়ালে ঠেস দিয়ে দাঁড়িয়ে ছিল। বিয়েবাড়ীর কন্স-কোলাহলের দিকে চেয়ে কি যেন তার মনে হচ্ছিল। কিন্তু সে যেসে কিছুতেই সে বুঝতে পারছিল না, কি তার মনে হচ্ছিল। হঠাৎ কোথা থেকে তার নতুন মা বেরিয়ে এসে তার সামনে দাঁড়ালো।

বললে, স্বান করোনি তুমি ?

ও বললে, না।

—চলো তোমায় স্বান করিয়ে আনি।

তারপরে ওকে সাবান মাখিয়ে স্বান করিয়ে দিলে, ঘরে নিয়ে এসে স্নো-পাউডার মাখিয়ে দিলে, কপালে দুটি জ্বর মাঝখানে একটা সিন্দূরের টিপ পারিয়ে দিলে, যে বাক্সর ওর জামা থাকে, সে বাক্স থেকে জামা বের করে পারিয়ে দিলে।

বললে, এইবার খেলা করগে যাও।

সেদিন থেকে গত দশ বৎসরের মধ্যে অমলা তার নতুন মায়ের বিরুদ্ধে

অভিযোগ করবার একটা কথাও খুঁজে পায়নি। সেই কথা স্মরণ করে তার নিজের মায়ের জন্তে গর্বি করতে গিয়ে অমলা মনে মনে একটু লজ্জাই পেলে। স্থির করলে, যেখানে তার নিজের মায়ের অয়েলপেন্টিং টাঙানো আছে, তার পাশেই তার নতুন মায়েরও একটা অয়েলপেন্টিং টাঙিয়ে রাখা উচিত।

কিন্তু সে কথা তার বাবাকে বলতে লজ্জা করে। সে স্থির করলে, আসছে মাসে তার বাবার কাছ থেকে সংসার খরচের জন্তে যে-টাকা পাবে তাই থেকে সে নিজেই একটা অয়েলপেন্টিং করিয়ে নেবে। নিতান্তই যদি বেশী খরচ পড়ে তাহ'লে টাকাটা দু'তিন মাসে অল্প অল্প করেই দেবে।

ক'দিনেই অমলা বুঝতে পারলে, তার নতুন মা এই সংসাবে কি খাটুনীই না খাটতো। একটা ঠিকা ঝি আছে। সে বাসন ক'খানা মেজে দেয়, মসলাটা পিষে দেয়, আর বালতি দুই জল তুলে দেয়। বাকি সমস্ত কাজ একা নতুন মা করত। কোনোদিন তাকে কুটোখানা ভেঙে ছুটো করতে হয়নি।

সে কি সহজ কাজ!

রান্না দু'প্রস্তু। এক প্রস্তু ছেলেদের স্কুলের, আব এক প্রস্তু সকলের। এব উপর ঘর পরিষ্কার থেকে আরম্ভ ক'রে ছেলেদের নাওয়ানো-খাওয়ানো, বিছানা তোলা, বিছানা পাতা, পান তৈরী থেকে রামহরির তামাক সাজা পর্যন্ত সবই আছে। এ সমস্তটুকুই তার নিজের হাতে করা চাই।

অমলার ভয় হ'ল, এত কাজ করা তার পক্ষে সম্ভব হবে কি? নতুন

মার মতন অমন পরিপাটি করে কাজ কি সে করতে পারবে? নতুন মার হাতের রান্না যে খেয়েছে, সে আর ভুলতে পারেনি। তেমনি ক'রে সে কি রান্না করতে পারবে? কোনোদিন তাকে নতুন মা কোনো কাজ করতে দেয়নি। সে নিজেও যেচে কখনও কোনো কাজ করেনি। শুধু বসে বসে শেলাই করেছে, আর নভেল পড়েছে। এখন একসঙ্গে এত কাজের চাপ সে সামলাবে কি ক'রে?

—বড়দি, রান্না হ'ল? দশটা বেজে গেছে।

অমলা রান্নাঘরে হাতা নিয়ে খটর খটর করে। সন্ধ্যাতরে বলে, আর দু'মিনিট দাঁড়া না ভাই। তরকারিটা নামিয়েই তোদের জন্তে গরম গরম মাছ ভেজে দিচ্ছি।

রোজ লেট হচ্ছে বড়দি। আজকে যদি লেট হই নির্ঘাৎ বেঞ্চের উপর আর দাঁড় করিয়ে দেবে।

কথাটা সত্যি। অমলা রান্না ঘরে ব্যস্তভাবে ছুটোছুটি করতে পারে, কিন্তু ওদের লেট বাঁচাতে পারে না। রোজই ওরা লেট হয়, রোজই স্কুলের সময় অভিযোগ করে। কোনোদিন হয়তো শুধু দুই দিবে দু'টি ভাত খেয়ে স্কুলে যায়। অথবা রোজই চেষ্টা করে যাতে ওদের দেরী না হয়। রোজই আরও সকালে ওঠে। তবু দেরী হয় এবং কি ক'রে যে দেরী হয় কিছুই বুঝতে পারে না।

কেবল অভিযোগ আসে না রামহরির কাছ থেকে। রামহরি যথানিয়মে কাজ তদারক ক'রে ফেরে। স্নান ক'রে আহায়ে বসে। অমলা সামনে বসে খাওয়ায়। কিন্তু বাবার মুখ দেখে বুঝতেই পারে না, রান্না কেমন হয়েছে, খেতে তার কোনো কষ্ট হচ্ছে কি না। অথচ মুখ ফুটে সে-কথা জিগ্যেস করতেও তার সাহস হয় না। মাঝে মাঝে নতুন মা'র

মতো দু'একটা নতুন বান্না সে রাখতে চেষ্টা করে। রামহরি কখনও খায়, কখনও পায় না। অমলা বুঝতে পারে না, সে বান্না রামহরির ভালো লাগে কিনা।

মোট কথা, তিন মাসের মধ্যেই অমলাব চেহারা শুকিয়ে আধখানা হয়ে গেল। ভোর পাঁচটায় সে ওঠে। রান্নাঘরের কাজ মিটতে আড়াইটে বেজে যায়। ফের সাড়ে তিনটেয় আবার কাজ শুরু হয়।

ছেলেরা দশটায় একরকম না খেয়েই স্কুল যায়। সবাই হাঁ হাঁ করতে করতে আসে। তখন আর তাদের দেরী সয় না। সূত্রাং তারা সাড়ে চারটেয় ফেববার আগেই অমলাকে তাদেব খাবার তৈরী ক'রে রাখতে হয়। ওদের জল খাওয়া শেষ হ'লে আসে রামহরি। তিনি চা খেয়ে চলে গেলে রাত্রে রান্না চাপে। সেও দু'প্রস্ত। এক প্রস্ত ছেলেদের জন্তে, আর এক প্রস্ত রামহরির জন্তে। রামহরি তাস খেলে ফেরে বাবোটা-একটায়। তখন তার জন্তে গরম-গরম লুচি ভেজে দিতে হয়।

এত পরিশ্রম অমলার সয় না। এত পরিশ্রমে সে অভ্যস্ত নয়। তার নতুন মা কখনও নাকে কোনো পরিশ্রমের কাজ করতে দেখনি। শুধু কি তাই? তিন মাস ধরে অবিশ্রান্ত খেটে অমলার শরীর দিন দিন শুকিয়ে যাচ্ছে। কিন্তু সেদিকে আজও কার চোখ পড়ল না,— রামহরিরও না। অথচ নতুন মা তার মাথা ধরলেও কি ক'রে যেন টের পেত।

নতুন মা'র কথা মনে ক'রে অমলার চোখে জল এল।

একদিন সকালে অমলার এমন হ'ল যে, মাথা তুলতে পারে না। তবু পড়ে থাকার উপায় নেই। একটু পরেই ছেলেদের স্কুল যাবার সময় হবে। তাকে উঠতেই হ'ল।

সেই শরীরেই সমস্ত দিন কাজ কর্ম করলে। রাত্রি ন'টায় ছেলেদের খাইয়ে যখন শুইয়ে দিলে তখন তার শরীর যেন ভেঙ্গে পড়ছে। ভাবলে রামহরির আসতে তো রাত্রি একটা। ছেলেদের সঙ্গে একটু বরং জি়ারয়ে নিয়ে তারপর উঠবে। ময়দা তো মাখাই রয়েছে। দু'খানা লুচি ভেজে দিতে আর কতক্ষণ! নীচে রামহরির গলার সাড়া পেলেই উঠে পড়বে।

কিন্তু নীচে নয় উপরেই রামহরির গলার সাড়া যখন পেলে তখন তার ওঠবার শক্তি নেই। একবার ওঠবার চেষ্টা করলে, পারলে না। শুধু তার জবাফুলের মতো টকটকে লাল চোখের কোণ বেয়ে দু'ফোঁটা জল গড়িয়ে পড়লো।

রামহরি ভয় পেয়ে গেল। তাড়াতাড়ি ওর ললাটের উদ্ভাপ পরীক্ষা ক'রে থমকে গেল।

এ যে ভীষণ জ্বর! গা যেন পুড়ে যাচ্ছে।

রামহরির একটা বিশেষত্ব এই যে, সহজে সে ব্যস্ত হয় না। অথবা হলেও বাইরে থেকে তা বোঝা যায় না।

সে জামা খুলে ফেলেছিল, আবার গায়ে দিলে। ওঘর থেকে বড় ছেলে সুরেশকে ঘুম থেকে তুললে!

বললে, তোর দিদির খুব জ্বর। ওঘরে তার কাছে বসে মাথায় একটু জলপটি দে আমি আসছি।

আধ ঘণ্টা পরেই রামহরি ডাক্তার নিয়ে ফিরলো।

ডাক্তার টেম্পারেচার নিলেন, নাড়ী দেখলেন, বুক, জিভ পরীক্ষা

করলেন। বললেন, আজকে ওষুধ বিশেষ কিছু দেবো না। একটা alkali mixture দিচ্ছি। মনে হচ্ছে, ভোগাবে। এদিকে-ওদিকে দু' একটা টাইফয়েড হচ্ছে, দু' একটা বসন্তের কেগও পাওয়া যাচ্ছে। খুব সাবধানে রাখবেন।

ডাক্তার মিথ্যা অনুমান করেননি। দিন দশেক অমলাকে ভোগালে। তবে টাইফয়েডও নয়, বসন্তও নয়, এইটুকুই স্রুথের বিষয়।

রামহরি একটা ঠাকুর রাখলে।

অমলাব আপত্তি করার উপায় ছিল না। শুধু বললে, আমি যে ক'দিন না হবে উঠি থাক সে ক'দিনের ভেত্রে।

রামহরি হাসলে। বললে, ক'দিন! তোমার হার্ট মোটেই ভালো নয়। দু'টো মাসের আগে তোমার উনোনের ধারে যাওয়াই চলবে না। তারপরেও...

রামহরি চুপ ক'রে গেল।

বাবার কাছে এত কথা এক সঙ্গে সে জীবনে শোনেনি। কখনও কারও জন্যে তাকে উদ্বেগ প্রকাশ করতেও দেখেনি। রোগশয্যা শুয়ে বাপের এই কথাগুলি তার ভারি ভালো লাগল।

বললে, দু'টো মাস না ছাই। এই পূর্ণিমাটা কেটে যাক, তার পর...

একটু থেমে আবার বললে, হাটে আমাব কিছু হয়নি। ডাক্তারে অমন বলে। আপনি ভাববেন না।

রামহরি চুপ ক'রে রইল।

অমলা বললে, সুরেশ বলছিল, ঠাকুরের রান্না নাকি অতি বিশ্রী। সে নাকি মুখে দেওয়া যায় না। আপনার খেতে নিশ্চয় খুবই কষ্ট হচ্ছে। রামহরি জবাব দিলে না। আস্তে আস্তে জামাটা গায়ে দিয়ে বেরিয়ে গেল।

এর কয়েকদিন পরে রামহরি একদিন এসে বললে, আমি একটু বাইরে যাব অমলা। ফিরতে দু' তিন দিন দেরী হবে। সাবধানে থাকবে সব।

ভয়ের কোনো কারণ ছিল না। তবু তিন দিনের মধ্যে রামহরিকে না দেখে অমলা উদ্বেগ বোধ করছিল। বাইরে যাওয়ার প্রয়োজন তার বড় একটা হয় না। হ'লেও এত দেরী হয় না। বিশেষ নতুন মা মারা যাবার পবে রামহরি একটা দিনও বাইরে কোথাও যায়নি।

সূর্যাস্তের আর দেরী নেই। একটু আগে এক পশলা বৃষ্টি হয়ে গেছে। পাশের জাম গাছের জলে-ধোয়া চিকণ পাতায় পড়ন্ত সূর্যের আলো ঝিকমিক করছে।

অমলা এখন গায়ে অনেকটা বল পেয়েছে। ঠাকুরের জবাব দেবার মতো বল অবশ্য নয়। তবে ঠাকুরের চুরি অনেকটা কমাতে পেরেছে। তরকারীগুলো সেই কুটে দেয়। কোন তরকারী কতখানি হবে ব'লে দেয়। মাছ তার সামনে ঝি কুটে দেয়। অমলা ঠাকুরকে বুঝিয়ে দেয়, কাকে ক'খানা দিতে হবে। মাঝে মাঝে নীচে গিয়ে রান্না শিখিয়েও দেয়।

দোতলার পশ্চিমের বারান্দায় ব'সে অমলা তখন তরকারী কুটে একখানা থালায় পরিপাটি ক'রে সাজিয়ে রাখছিল। এমন সময় তাদের দরজায় একখানা ঘোড়ার গাড়ী এসে থামলো ব'লে মনে হ'ল।

অমলা তখন রামহরির কথা ভাবছিল। গাড়ী থামার শব্দে সে ব্যস্তভাবে রাস্তার দিকের বারান্দায় এসে খুঁকে দাঁড়ালো।

দেখলে, রামহরি, তার পিছনে একটি অর্দ্ধাবগুপ্তিত স্ত্রীলোক। উপর থেকে তার মুখ সে দেখতে পেলে না। কিন্তু এই ভেবেই আশ্বস্ত হ'ল যে, রামহরি ফিরেছে এবং অসুস্থ দেহে ঘোড়ার গাড়ীতে নয়।



শুনতে পেলে, রামহরি স্ত্রীলোকটিকে বললে, ভেতরে গিয়ে ডান দিকেই সিঁড়ি।

রামহরি নিজে গোটা দুই বাস্ন নামিয়ে গাড়ী ভাড়া মিটিয়ে দিতে লাগল।

অমলা তাড়াতাড়ি নীচে নেমে এল। অর্ধেক দূর যখন নেনেছে তখনই মেয়েটিকে দেখতে পেলে। তার মাথার ঘোমটা অনেকখানি স'রে এসেছে। চকিত দৃষ্টিতে চারিদিক দেখে নিচ্ছিল।

মধ্যপথেই অমলা থমকে গেল। নিজের মাকে ভালো ননে পড়ে না। যতখানি মনে পড়ে এবং ছবি দেখে আর কল্পনাব সাহায্যে মায়ের মুখের যে ছবি সে নিজের মনে এঁকে নিয়েছে, এই মেয়েটির মুখ অবিকল সেই রকমের। তেমনি ছোট ললাট, চটুল চোখ, তীক্ষ্ণ ঠোঁটের উপর তেমনি ধারা হাসির রেখা বাঁকা ভাবে আলগোছে ছুঁবে আছে। তেমনি আশ্চর্য ছোটখাটো চেহারা।

অমলা অবাক হয়ে গেল। ছ'জনের চেহারার এমন আশ্চর্য্য মিল হ'তে পারে তা সে ভাবতেই পারে না।

মেয়েটি তখন তার কাছ পর্য্যন্ত উঠে এসেছে।

তার একটি হাত ধরে হেসে বললে, তুমি অমলা ?

অমলা ওকে নিয়ে উপরের ঘবে আসতে আসতে বললে, হ্যাঁ। তুমি কি আমাকে চেন ?

—চিনি।

ব'লে মেয়েটি আশ্চর্য্য ভঙ্গীতে হাসলে। অমলার বুকের ভিতর পর্য্যন্ত সে হাসিতে ঢুলে উঠল।

এ যে অবিকল তার মায়ের হাসি !

মহাকালের শ্রোত পেরিয়ে আবার কি তারই বিশ্বত তরঙ্গরেখা ওর  
স্বতির ঘাটে এসে ঘা দিলে !

অমলা বললে, তুমি কে ?

—আমি ?

মেয়েটি একবার নিজের চারিদিকে একবার ঘরের চারিদিকে চেয়ে  
তেমনি ক'বে আবার হেসে উঠলো ।

এমন সময় নীচে রামহরির গলা পাওয়া গেল : ঠাকুর, একটু চাযের  
জল চড়াও তো ।

মেয়েটি হঠাৎ ব্যস্ত হয়ে উঠলো ।

বললে, দাঁড়াও, গুঁর চা'টা ক'রে দিযে আসি ।

অমলার বিশ্বয়ের আর সীমা রইল না ।

বললে, বাবার চা ক'রে দিতে তুমি যাবে ?

মেয়েটি আবার হেসে ফেললে । বললে, সেই জন্তেই তো আমি  
এনেছেন ভাই !

বলেই তাড়াতাড়ি জিভ কেটে ফেললে : এই যা : ! তোমায় 'ভাই'  
বলে ফেললাম । হিঃ হিঃ !

মেয়েটি আর দাঁড়ালো না । তর্ তর্ ক'রে নীচে নেমে  
গেল ।

অমলা অবাক হয়ে চেয়ে দেখলে, অবিকল তার মায়ের মতো হাঁটল !  
চলায় তেমনি আনন্দের ছন্দ ।

অমলা ভাবতে লাগলো, কে এই মেয়েটি ? মেয়েটি যে খুব গরীবের তা  
বোঝা যায় । করপ্রকোষ্ঠে হু'গাছি শাঁখা ছাড়া আর কিছুই নেই । শক্ত  
করতল, শক্ত আঙুল এবং মলিন নখ দেখলেই বোঝা যায়, মেয়েটি চিরকাল

সংসারের সমস্ত শক্ত কাজ ক'বে এসেছে। কিন্তু এখানে এল কেন ?  
রামহরি কোথা থেকে ওকে নিয়ে এল ?

কিন্তু বেশ সপ্রতিভ। কত বয়স হবে ? অমলার চেয়ে ছোট নিশ্চয়ই।  
কি অল্প ছোট, কিম্বা সমবয়সীই হবে হয় তো।

কিন্তু কে ও ?

মিনিট পোনেরো পরে মেয়েটি ফিরে এল। হাতে এক বাটি চা।

অমলা জিজ্ঞাসা করলে, কার চা ? আমার ?

—হ্যাঁ।

—আমি চা খাই না তো।

—একেবারেই না ?

—না।

অল্প সময় হ'লে অমলা এইখানেই থেমে যেত। কিন্তু কি জানি কেন,  
তার কেবলই নিজেব মা এবং নতুন মা'র কথা মনে পড়ছে।

বললে, আমার নতুন মা মেয়েদের চা খাওয়া পছন্দ করতেন না।  
তিনি নিজেও খেতেন না, আমাদেরও খেতে দিতেন না।

মেয়েটি এক মুহূর্ত ওর মুখের দিকে থমকে চেয়ে রইল। তা'র পর  
জিজ্ঞাসা করলে, তোমরা বুঝি তাঁকে খুব মানতে ?

—খুব।

—তিনি কি খুব রাগী ছিলেন ?

এবারে অমলা হেসে ফেললে। বললে, মোটেই না। তিনি কখনও  
কাউকে কড়া কথা বলতেন না। কিন্তু ভারী রাশভারী ছিলেন। সবাই  
সেইজন্মে তাঁকে ভয় করতো।

—উনিও ?

অমলা চমকে উঠল। বললে, ‘উনি’ কাকে বলছ? বাবা?

মেয়েটির ঠোঁটের কোণে বিদ্যুৎ খেলে গেল। বললে, হুঁ?

অমলা অশ্রুটস্বরে বললে, কি জানি। হয়ত করতেন।

তার পরে বললে, কিন্তু তুমি কে বলবে?

মেয়েটি প্রথমে চুপ ক’রে রইল। তারপরে বললে, উনি কি তোমাদের কিছুই বলেননি?

অমলার মনে এতক্ষণে ব্যাপারটা যেন স্পষ্ট হ’ল। প্রাথমিক হতচকিত ভাবটা কাটতেই সে হো হো করে হেসে ফেললে। বললে, বোধ করেন নি। বোধ হয় ভেবেছিলাম, তোমাকে দেখেই চিনতে পারব।

—তার মানে?

—তাব মানে তোমাকে দেখাই এস।

অমলা ওকে টানতে টানতে বাবার শোবার ঘরে নিয়ে গেল। সেখানে বড় অয়েলপেটিংটার দিকে আঙ্গুল দেখিয়ে বললে, তার মানে বুঝলে?

মেয়েটি অশ্রুটস্বরে বললে, অনেকটা আমার মতো, না?

—হুবহু। তোমায় দেখে আমি চমকে উঠেছিলাম।

—তোমার নতুন মা?

না। আমার নতুন মা সকলের বিষয়ে সকলের থেকে স্বতন্ত্র। তাঁর জোড়া হয় না। ইনি আমার নিজের মা।

এতক্ষণ পরে হঠাৎ আমার খেয়াল হ’ল, এই মেয়েটি এসে পর্যাস্ত পা ধুতেও পায় নি।

বললে, ছিঃ, ছি! তোমার এখনও পা ধোয়া হয়নি। না হ’ল তোমাকে জলের ধারা দিয়ে বরণ ক’রে নেওয়া, না হ’ল শাঁখ বাজানো। কি আশ্চর্য্য! শাঁখটা বাজাই বরং।

মেয়েটি তাড়াতাড়ি ওর হাত চেপে ধরলে। বললে, ছিঃ! সে আমার ভারী লজ্জা করবে। কিন্তু তোমাকে আমার ভারী ভালো লাগছে। হাত পা ধুয়ে আসি দাঁড়াও। তারপরে গল্প করা যাবে।

ও ফিরে এসে দেখলে, অমলা ওর জন্তে একখানা রঙীন শাড়ী বেব ক'বে বসে আছে।

বললে, এইখানা পরো।

কমলা লেবু রঙের শাড়ী। খোলা জানালা দিয়ে সূর্য্যাস্তের আভা এসে পড়ায় আরও সুন্দর দেখাচ্ছিল। অমলা ওকে ঘ্রো মাথিয়ে দিলে। তা'র পরে বাক্স থেকে গহনা বের ক'রে একটি একটি ক'বে ওকে পরিয়ে দিলে।

মেয়েটি বাধা দিলে। বললে, না, না। ও কার গহনা?

— আমার। তোমা'য় দিলাম।

অমলার চোখে'ব দিকে চেয়ে ও আর কিছু বলতে সাহস করলে না।

অমলা বলতে লাগল : মা'য়ের ছবির দিকে চাইতাম আর মনে মনে বলতাম, তুমি যেন আমার নেয়ে হয়ে ফিরে এস। তোমাকে দেখার সাধ আমার মেটে'নি। আজ মনে হচ্ছে, আমার প্রার্থনা যেন তিনি রেখেছেন। কিন্তু মেয়ে হয়ে তো এলে না।

— মেয়ে হয়েই তো এলাম অমলা। তোমার কোলে আমি মেয়ে হয়েই এলাম। নন্দরাণী নাম দিয়েই মা আমার মা'রা যান। গদীবেব ঘরের মেয়ে, জন্মে কখনও কোল পাইনি। এতদিনে কোল পেলাম।

সন্ধ্যা হয়ে গেছে। ছেলেরা খেলা সেরে বাড়ী ফিরলো।

অমলা বললে, সুরেশ, মণি, একে প্রণাম কর ভাই। ইনি আমাদের ছোট মা।

ওরা বোকার মতো ফ্যাল ফ্যাল ক'রে চেয়ে রইলো।

— প্রণাম কর।

একে একে সবাই প্রণাম করলে। নন্দরাণী ছোটটিকে কোলের কাছে টানতেই সে হঠাৎ ফুঁপিয়ে কেঁদে হাত ছাড়িয়ে ছুটে পালিয়ে গেল।

এমন সময় রামহরির গলা পাওয়া গেল : ওবে অমলা ইয়ে হয়েছে।

বলতে বলতে রামহরি একেবারে দরজাব কাছে এসেই স'রে গেল। একেবারে তার গলা পাওয়া গেল, ওদিকে ছেলেদের পড়ার ঘরে : পড়তে বোসো, পড়তে বোসো ! আর দু'দিন পরেই সেকেণ্ড টার্মিনাল। মনে আছে তো ?

নন্দরাণী মুখে আঁচল চাপা দিয়ে হেসে উঠল : কি রকম লজ্জা পেলেন দেখলে ?

অমলাও হেসে ফেললে। বললে, কি বলছিলেন শুনে আসি।

নন্দরাণী আবার হাসলে। বললে, কিছু বলেননি। তুমি বোসো।

তখন নীচে রামহরির গলা পাওয়া গেল : ঠাকুর, দরজাটা বন্ধ ক'রে দিয়ে যাও। আমার ফিরতে দেবী হতে পারে।

সে কথা শুনে ওরা আর একবার হাসলে।

প্রথম দৃষ্টিতেই দুজনে দুজনকে ভালোবেসে ফেললে।

কিন্তু নন্দরাণীর সঙ্গে অমলার মাঘের চেহারার আশ্চর্য্য সাদৃশ্য থাকা সত্ত্বেও সম্পর্কটা কিছুতেই শেষ পর্য্যন্ত মা-মেয়ের মতো দাঁড়ালো না।

নন্দরাণী কিছুতেই ওকে না ব'লে ডাকতে দেবে না। তার নাকি লজ্জা করে। হিসাব করে দেখা গেছে, নন্দরাণী ওর চেয়ে ছোট এবং বৈধব্যের জন্তেই হোক, আর যে কারণেই হোক, ওকে নন্দরাণীর চেয়ে আরও অনেক বেশী বড় দেখায়। সুতরাং নন্দরাণীকে ও ডাকে বোমা ব'লে। কিন্তু আসল এবং অন্তরের সম্পর্ক দাঁড়ালো সপ্তিসে।

নন্দরাণী ওকে সব কথা বলে। প্রথম-প্রথম অমলা সে-সব কথা শুনেতে চাইতো না লজ্জা করত। পরে অভ্যাস হয়ে গেল। দু'জনে সে-সব কথা নিয়ে নিজেদের মধ্যে রসিকতা করতেও আর বাধে না। তাতে আর লজ্জাও করে না।

বিকলে অমলা নিজেব হাতে ওর চুল বেঁধে ওকে সাজিয়ে দেয়। ও কোন শাড়ীটা পরবে এবং তার সঙ্গে কোন ব্লাউজটা, তা ঠিক করবার মালিক অমলা। সে বিষয়েও সে থামেখেলী। কখনও নন্দরাণীকে সাজিয়ে দেয়, এলো খোঁপা বেঁধে, ক্র এঁকে, মুখ পেণ্ট ক'রে, হালকা কয়েকখানা গহনা দিয়ে মডার্ন মেয়ের মতো। কখনও বা মাথার চুল টেনে বেঁধে, গায়ে এক গা গহনা চাপিয়ে গলায় বেলফুলের মালা দিয়ে সেকালের মেয়ের মতো সাজিয়ে। নন্দরাণীর ক্ষমতা নেই তার উপর একটা কথা বলে। এমন কি পাষের তোঁড়া বমর বমর করলেও তার সাধা নেই খোলে। শুতে যাওয়ার আগে অমলাকে একবার দেখা দিয়ে সব যে ঠিক ঠিক আছে তা বুঝিয়ে যেতে হবে।

খাটে শুয়ে রামহরি ওর তোড়ার শব্দে চমকে ওঠে।

--ও আবার কি!

নন্দরাণী লজ্জিতহাস্তে মুখ নীচু ক'রে বলে, কি করব? ছোট মা'র কাণ্ড! না বলবার উপায় নেই।

নন্দরাণীর উপর অমলার এই স্নেহ রামহরির ভালো লাগে। কিন্তু লজ্জাও করে। অমলা যেন অনেক বড় হয়ে গেছে। ওকে আর নিজের মায়ের মতো ভাবতে পারে না। অমলার সামনে গিয়ে দাঁড়াতেও ওর লজ্জা করে। অমলাকে কিছু বলার থাকলে প্রায় নন্দরাণীর মারফৎই জানায়। কখনও যদি নিজে জানাতে হয়, সামনে গিয়ে মাথা নীচু ক’রে কথাটা জানিয়েই স’রে পড়ে। বাপের গাভীরা সে আর রাখতে পারে না। তার বয়স যেন নন্দরাণীর বয়সে নেমে এসেছে।

অমলার অবস্থাও একই প্রকার, বাপের সামনে সে সহজে পড়তে চায় না। কখনও ছ’জনে সামনাসামনি প’ড়ে গেলে ছ’জনেই ত্রস্তভাবে স’রে যায়।

অসুবিধা হয়নি কেবল নন্দরাণীর। রামহরি তার স্বামী, অমলা তার বন্ধু।

অমলা মাঝে মাঝে ভাবে, এ যেন ঠিক হচ্ছে না। নন্দরাণী তার মা, তার বাপের বিবাহিতা স্ত্রী, দেখতে অবিকল তার নিজের মায়ের মতো। তার সঙ্গে বয়সের বিচারে সখিত্বের সম্পর্কটা ঠিক হচ্ছে না। কিন্তু নন্দরাণী তার নতুন মায়ের মতো গম্ভীর নয়। তার হাসি চাই, গল্প চাই, আনন্দ চাই। অমলার কাছে সে সম্পূর্ণ রকমে আত্মসমর্পণ করেছে। কিন্তু এইখানটায় অমলাকেও তার কাছে আত্মসমর্পণ করতে হয়েছে।

আসল কথা ছ’জনে ছ’জনকে ভালো বসেছে। আর তাদের মধ্যকার যোগসূত্র রামহরিকে মিলিয়ে গিয়ে সাধারণ মানুষে পরিণত হয়েছে। এইটে যখন ভেবে দেখে, তখন রামহরি কিম্বা অমলা কেউই খুঁসি বোধ করতে পারে না। অথচ এর জন্তে তারা কার উপর যে রাগ করতে পারে তাও খুঁজে পায় না।



এমনি ক'রে দিন যায় ।

এই শহরে সিনেমা হাউস হয়েছে অনেক কাল । কিন্তু অমলারা কখনও সিনেমায় যায়নি । নতুন মার এ বিষয়ে কোনো আগ্রহ ছিল বলে কখনও বোঝা যায় নি । আর তার নিজের এ কখনও ছিল না যে মুখ ফুটে রামহরিকে বলে ।

নন্দরাণী বললে, যাবে একদিন ?

অমলা সভয়ে বললে, ওরে বাবা !

—কেন ?

—বাবা সিনেমার উপর ভারি চটা ।

নন্দবাণী মাথা নেড়ে বললে, 'ওঁর কথা আমি বুঝব । তুমি যাবে কি না বল না ?

—নিযে গেলে আর যাব না কেন ?

—বেশ । এই কথা রইল ।

সামনের শনিবারে বামহরি দুপুর বেলাতেই আফিস থেকে ফিরল । এমন সময় বড় একটা সে ফেরে না ।

নন্দবাণী হাসতে হাসতে এসে বললে, কোন শাড়ীটা পরব ছোট মা,

—হঠাৎ দুপুর বেলায় এ থেয়াল !

—বারে ! আজ সিনেমায় যাবার কথা ছিল না ?

—সত্যি ?

—হ্যাঁ । উনি তিনখানা টিকিট কিনে এনেছেন । বললেন, তিনটির শো'তে যেতে হবে । সন্ধ্যায় ফিরে এসে রান্না-বাড়া হবে ।

ওরা সিনেমায় গেল । তিনজনে পাশাপাশি বসলো । মধ্যে নন্দরাণী, তার দুপাশে দু'জন । ছবি দেখতে দেখতে নন্দরাণী হাসে, কত কি

পরিহাসের কথা বলে। বিপদ হ'ল রামহরি আর অমলার। তারা কাঠের মতো শক্ত হয়ে বসে থাকে।

এর পরে যেদিন আবার ওরা সিনেমায় গেল, অমলা গেল না। ভীষণ মাথা ধরেছে বলে শুয়ে রইল।

অমলার কি যেন হয়েছে।

ঠাকুর তো কবেই ছাড়িয়ে দেওয়া হয়েছে। কিন্তু রাঁধে অমলা। বলে, এখন তার শরীরে বেশ বল পেয়েছে। নন্দরাণী নিজে রাঁধবার জন্তে কত সাধাসাধি করছে। কিন্তু অমলা তাকে কিছুতে রাঁধতে দেয় না। নন্দরাণীর নিতান্ত যখন অসহ হয়ে ওঠে তখন বলে, তাহ'লে আমি কি করব বল একা-একা উপরে বসে থাকতে ভাল লাগে ?

মন ভাল থাকলে অমলা হেসে বলে, তাহ'লে বরং ওই টুলের উপর ব'সে ব'সে বইখানা পড়, আমি রাঁধি আর শুনি।

রামহরি কাজ কর্মের ফাঁকে আজকাল মাঝে-মাঝেই বাড়ী আসে। অমলা তখন নন্দরাণীকে ঠেলে উপরে পাঠিয়ে দেয়। বলে, কি বলছেন, শুনে এস।

নন্দরাণী লজ্জা পায়, হাসে, কিন্তু উপরে যায়।

ফিরে এসে নন্দরাণী নিজের থেকেই বলে, কি একটা দরকারী কাগজ ফেলে গিয়েছিলেন।

অমলা হাসে। বলে, বাবা আজকাল ক্রমাগতই দরকারী কাগজ ফেলে যাচ্ছেন। পেয়েছেন তো ?

নন্দরাণীও হাসে। বলে, জানি না।

অমলা উঠে এসে ওর গাল টিয়ে দিপে বলে, জানি না বললে হবে কেন ? না পাওয়া গেলে আবার কষ্ট করে ফিরে আসতে হবে তো ?

—আম্বুক ।

অসীম মেহতরে অমলা ওর মুখখানি ঘুরিয়ে ফিরিয়ে কি যেন দেখলে । আপন মনেই একটু হাসলে । তারপর আবার নিজের কাজে মন দিলে ।

নন্দরাণী বললে, কি বলছিলেন জানানো ?

—কি ?

—বলছিলেন, ক'লকাতা থেকে নাকি ভালো থিয়েটার এসেছে । এক টাকা ক'রে টিকিট । আমি ব'লে দিলাম, যাব না ।

—সে আবার কি !

ঠোট ফুলিয়ে নন্দরাণী বললে, কি করতে যাব ? তুমি তো যাবে না ।

—যাব না কে বললে ?

—আমি জানি । তুমি যাবে বলবে, কিন্তু ঠিক যাবার সময়ে বলবে মাথা ধরেছে । আমি প্রতিজ্ঞা করেছি, আর কোথাও যাব না ।

অমলার মুখে ধীরে ধীরে যেন ছায়া নেমে এল । ধীরে ধীরে সে নন্দরাণীর ঘাড়ের উপর একখানা হাত রাখলে । মনে হ'ল, কি যেন বলবে । কিন্তু কিছুই বলতে না পেবে চুপ ক'রে রইল ।

কিন্তু অমলার কি যে হয়েছে কেউ বুঝতে পারে না । নন্দরাণী কিছুতে ওকে রাঁধতে দেবে না এবং তাই নিয়ে কখনও যা করেনি তাই করেছে । অমলার সঙ্গে ঝগড়া করেছে । কিন্তু তবু পারেনি ।

অমলা রাঁধবেই । নন্দরাণীর হাত থেকে কাজ কেড়ে নিয়ে সব কাজ

সে একাই করবে। তাকে কেউ বাধা দিতে পারে না। নন্দরাণী রেগে কথা বন্ধ করে। বিকেলে অমলা তাকে কত সাধ্যসাধনা ক'রে শান্ত করে।

রামহরি আজকাল যখন-তখন হুট ক'রে বাড়ী আসে। অমলা তার ঘরে বড় একটা যায় না। নন্দরাণীকে নিজের ঘরে টেনে নিয়ে আসে।

নন্দরাণী বলে, ধন্ত মেয়ে তুমি মা ! তোমাকে কেউ পারবে না।

ভোর বেলার চাঁদের মতো অমলা হাসে। বলে, সত্যি। আমি নিজেকে নিজেই বুঝতে পারি, আমি যেন নতুন মায়ের মতো শক্ত হচ্ছি।

—এত শক্ত হওয়া কি ভালো ?

—নয়ই তো। খুব শক্ত মেয়েরা বেশী দিন বাঁচে না। আমার নতুন মা সেইজন্মেই—

নন্দরাণী ঝাঁপিয়ে উঠে ওর গাল টিপে ধরল : মুখপুড়ী, যা বলতে নেই সেই কথা !

অমলা নিজেকে মুক্ত ক'রে নিলে না ! শুধু ওর রক্তহীন, শ্রান্ত চোখের কোণ বেয়ে দু'ফোঁটা জল গড়িয়ে পড়ল।

কয়েক মাসের মধ্যেই অমলা শক্ত অস্থি পড়লো।

ডাক্তার বললেন, সেই হার্টটা। তার উপর এত টেম্পারেচার। কি হয় বলা যায় না। সামনের দু'তিনটে দিন যদি কাটে, তাহ'লে এ যাত্রা বেঁচে যাবে।

নন্দরাণী রামহরিকে বললে, এই বিছানা ছেড়ে এই দু'তিনটে দিন

আমি এক পা নীচে নামছি না। তুমি ঠাকুরের ব্যবস্থা কর। নিজেও কদিনের ছুটি নাও।

সে কথা রামহরি আগেই ভেবেছে। বললে, আজকেই দরখাস্ত করব।

ছুটি পেতে রামহরির কোনোই অসুবিধা হ'ল না।

প্রথম রাত্রে টেম্পারেচারটা আরও বাড়লো। সেই সঙ্গে রোগিণীর ছটফটানিও।

নন্দরাণী বললে, সিভিল সার্জনকে ডাকো।

রামহরি একটু বিব্রতভাবে ওব দিকে চাইলে।

নন্দরাণী বললে, কতটাকা ফি ?

—বোধ হয় ষোলো, কিম্বা রাত্রি ব'লে বত্রিশও নিতে পারে।

—তা হোক, ডাকো তাঁকে।

রামহরি দ্বিধা করতে লাগল।

নন্দরাণী বললে, টাকা আছে। তুমি ডাকো।

রামহরি তবু দ্বিধা করছে দেখে নন্দরাণী বললে, সত্যি টাকা আছে। সুরেশকে দিয়ে আমি সেই তোমার দেওয়া নতুন হারগাছা বিক্রি করেছি, সকালে ডাক্তার এসে যখনই বললে।

নন্দরাণী আঁচলে চোখ মুছলে।

সিভিল সার্জন এলেন। প্রেসক্রিপশান ক'রে ফি নিয়ে ব'লে গেলেন, কেমন থাকে সকালে খবর দিতে।

ভোরের দিকে টেম্পারেচার একটু নামলো। ছটফটানিও কম মনে হ'ল।

অমলা একবার চোখ মেলে চাইলে। অসুটস্বরে বললে, বোমা !

নন্দরাণী ওর মুখের উপর ঝুঁকে প'ড়ে বললে, এই যে আমি ! একটু ভালো বোধ হচ্ছে ?

সে-কথার অমলা উত্তর দিলে না। বললে, আমার গহনাগুলো তোমাকে দিলাম।

একটু পরে বললে, তোমায় বলেছি না, শক্ত মেয়েরা বেশীদিন বাঁচে না! দেখলে তো?

—আবার সেই কথা বলছ?

অমলা আবার বললে, গহনাগুলো পোরো। দুঃখ কোরো না। বাঙ্গালীর ঘরের বিধবা মেয়ে, তার জন্তে দুঃখ করতে নেই।

সে চোখ বন্ধ করলে।

একটু পরে আবার বললে, সুরেশ কোথায়? ছেলেরা?

ওরা দিদির কাছে এসে দাঁড়ালো।

—বাবা কই?

রামহরির গলার স্বর বন্ধ হয়ে এল। একটা কথাও সে বলতে পারলে না।

অমলা ওর দিকে চাইলে। হঠাৎ তার চোখ যেন কোতুকে বলমল ক'রে উঠলো। ঠোঁটের কোণে একটুখানি বাঁকা হাসি খেলে গেল।

তারপরে চোখ বন্ধ করলে।

সেইদিন দুপুরে অমলার বৈধব্য-জীবনের অবসান হ'ল।

## ডাক্তারের ফি

মুশ্কেল কুপানাথের সংসার বড় নয়। বড় হবার এখনও সময় হয়নি। মোটে তিন বৎসর তাদের বিবাহ হয়েছে। একটা ঠাকুর আছে, পিতার আমলের ভৃত্য বৃদ্ধ রামধন আছে, সংসারের ভারি ভারি কাজ করবার জন্তে আরও একটা চাকর আছে বুদ্ধি।

কুপানাথ দশটা-পাঁচটা কাছারী করে, দিস্তা দিস্তা রায় লেখে এবং দিনের পর দিন ঝুলন্ত লাভ করে। রিণা শুয়ে শুয়ে বই পড়ে আর ঘুমোয়। কখনও বা ষ্টোভে ছ' একটা নতুন রান্না র'াধে। নয়তো বাজারের হিসাবে ভুল ধ'রে চাকরটাকে বকুনি দেয়।

আর বৃদ্ধ রামধন একখানি ছোট ধুতি কোঁচা ক'রে প'রে কাজ কর্ম তদারক করে। কখনও ঠাকুরকে রান্না সম্বন্ধে অপ্রয়োজনীয় উপদেশ দেয়, কখনও চাকরটার সঙ্গে বকাবকি করে। বস্তুতঃ এ বাড়ীতে বাবু এবং গৃহিণীর পরেই যে মর্যাদা হিসাবে তার স্থান, সে কথা দেখলেই বোঝা যায়।

মাঝষটি রোগা, ছোট-খাটো সরুগলার উপর বর্তুলাকার কেশবিরল মাথাটি সমস্ত সময় নড়বড় করছে। সে যখন আপন গর্বে ঘুট ঘুট ক'রে বেড়ায় সে একটা দেখবার জিনিষ। কুপানাথ আফিস নিয়ে ব্যস্ত, রিণা বই নিয়ে। সুতরাং সংসারের সকল কাজের কর্তৃত্বভার তারই উপর এসে পড়েছে। এইটেকে সে সযত্নে এবং সগর্বে চেখে চেখে দেখে।

কিন্তু ক'দিন থেকে তারও দিন ভাল যাচ্ছে না।

ঠাকুরটা চালাক লোক। রূপানাথ হাকিম মাহুয, তাঁর কাছে তার যেতেই ভয় করে। বোমাও এমন আলশ্রের কুয়াশার অন্তরালে বাস করে যে, তার দৃষ্টি আকর্ষণ করা অসম্ভব ব্যাপার। স্তূতরাং আথেরের ব্যাপারে সুরবিধা করতে গেলে রামধনকে তোয়াজ করা প্রয়োজন।

তাই সে করে। কিন্তু রামধন ক'দিন থেকে মুখ নামিয়ে যেন আড়ালে আড়ালে ফিরছে। কিছুতেই ছোঁয়া দিচ্ছে না।

এ বাড়ীর হাওয়ার রামধন হ'ল 'ওয়েদার-কক'। তাকে দেখলেই বোঝা যায়, হাওয়া কোন দিকে বইছে। রামধনের চলা ফেরা দেখেই তারা বুঝেছে, বাবুতে গিন্নিতে কিছু একটা কলহ হয়েছে। কিন্তু এ সম্বন্ধে গৃহস্থবাড়ীর ভৃত্যশুলভ কোতূহল নিবৃত্তির কোন উপায় নেই। রামধন সমস্ত ছপুর্ বেলা এ বাড়ীর মৃত ও জীবিত কর্তাদের কীর্তি-কলাপ সালঙ্কারে বিবৃত করতে পারে, কিন্তু বর্তমানের যে ঘটনা জানবার জন্তে ঠাকুর এবং বুধিয়া অস্থির হ'য়ে উঠেছে সে সম্বন্ধে একটা কথাও বলবে না।

বুধিয়ার বয়স বেশী নয়। সে কিন্তু মাঝে মাঝে সন্দেহ করে।

বলে, তুমি পাগল হ'লে ঠাকুর। দিন-রাত্তিরই এইখানেই রয়েছি ঝগড়া হ'লে শুনে পেতাম না ?

ঠাকুর তার বিস্তৃততর অভিজ্ঞতা নিয়ে হাসে। বলে, ওরে বোকা, একি আমার বাড়ীর ঝগড়া যে, চীৎকার শুনে পাড়াশুদ্ধ লোক ছুটে আসবে। এ হাকিমের বাড়ীর ঝগড়া। কি রকম জানিস ? গিন্নি বললেন, উঃ ! বাবু বললেন, আঃ ! ব্যাস্ ঝগড়া হ'য়ে গেল। তিন দিন আর মুখ দেখা দেখি নেই।

ঠাকুরের অঙ্গ-ভঙ্গীতে বুধিয়া হেসে খুন !



ওদের অনুমান মিথ্যা নয়। কৃপানাথের বিয়ে হয়েছে মোটে তিন বৎসর। ছেলেপুলেরও হাঙ্গামা নেই। দুঃখ-নৈশ্চ, অশান্তি দুর্ভাবনাও নেই। এরই মধ্যে প্রেমের ভিক্টোরিয়া মেমোরিয়ালে চিড় খাওয়া দুঃখের বিষয় সন্দেহ নেই।

অথচ এর কারণও বোঝা যায় না।

ওরা যে ইচ্ছা ক'রে ঝগড়া করে তা নয়। অথচ যে কারণে ঝগড়া বাধে, তা মোটেই ঝগড়া করার মতো বড় কারণ কিছুতেই নয়।

মেটাকে উপলক্ষ ছাড়া আর কিছুই ভাবা চলে না।

বসবার ঘরে বসে কৃপানাথ হয়তো একটা কিছু লিখছে। একখানা খোলা এই হাতে নিয়ে রিণা দোরগোড়ায় দাঁড়ালো।

হাসতে হাসতে বললে, আসতে পারি ?

কৃপানাথের লেখাটা জরুরী বটে, কিন্তু এমন জরুরী নয় যে, এক মিনিট লেখাটা বন্ধ ক'রে ওর সঙ্গে হেসে দুটো কথা বলা যায় না।

সে রিণার মুখের দিকে চেয়ে চাবুকের মত তীক্ষ্ণভাবে বললে, না।

মুখ কালো ক'রে রিণা ফিরে গেল।

এরপরে আফিস যাওয়ার সময় পর্য্যন্ত দুজনে একটা কথাও হ'ল না। কলহের ঘটনাকাল এতই সংক্ষিপ্ত যে, চাকরবাকর কেউ টেরই পেল না যে, কলহ হয়েছে। কেবল বুঝলে রামধন, বোমাকে বাবুর খাবার সময় কাছে ব'সে থাকতে না দেখে।

অথচ সামান্য কারণে ঝগড়া।

রিণা ছুপুরে বই নিয়ে বিছানায় শুয়ে থাকে। তার ঘুম আসে না। ঘুমও আসে না, পড়াও হয় না। কিছুই নয়, একটুখানি স্বামীর ঘরে

গিয়ে বসা। তাতেও আপত্তি! ক্রোধে অপমানে তার চোখ ফেটে জল বেরোয়।

কিন্তু একটু পরেই নিজের উপরই তার রাগ হয়।

এই সময় কৃপানাথকে যে কাছারীর কতকগুলো জরুরী কাজ সারতে হয় তা আর অজানা নেই। তবু তার কি দরকার ছিল সেখানে যাবার? আর এমন গুরুতর কথাই বা কৃপানাথ কি বলেছে? শুধু বলেছে, না! তার জন্তে অমন রাগ করা উচিত হয়নি। কৃপানাথের খাওয়া হ'য়েছে কি না কে জানে? খাবার সময় তার কি একবার গিয়ে কাছে বসা উচিত ছিল না?

নিজের ব্যবহারে রিণা লজ্জিত এবং অমুতপ্ত হয়।

কৃপানাথেরও সময় আনন্দে কাটে না।

উকিল তার মক্কেলের মামলা বুঝিয়ে দেবার জন্তে ব'কে মরছে। কৃপানাথের মন চ'লে গেছে অত্নে। আহা! ছোট মেয়ে রিণা। একলা বেচারার দিন-রাত্রির অধিকাংশ সময় কাটে। একটু কাছে এসে বসতোই না হয়। তাতে এমন কিছু ক্ষতি নিশ্চয়ই হ'ত না। অমন ক'রে আঘাত দেওয়া তাকে কখনই উচিত হয়নি।

কৃপানাথ মনে মনে ভাবতে থাকে কাছারীর শেষে কি ক'রে সে রিণার মান ভাঙ্গাবে। উকিল তখনও নিজের ঝোঁকে ব'কেই চলে।

এই ক'দিনেই রিণার অমন ফুলের মতন নরম শরীর তার দুর্ব্যবহারের আঁচ লেগে যেন ঝলসে গেছে। যারা অনেক দিন দেখেনি তাদের চিনতে কষ্ট হবে, এমন চেহারা হয়েছে। বোধ হয় ভিতরে কোন রোগ হয়েছে। হওয়া কিছু মাত্র বিচিত্র নয়। মন গুমরে থাকলে রোগতো হ'তেই পারে। হয়তো এখনও তেমন কঠিন হয়নি। কিন্তু হ'তে কতক্ষণ!

রূপানাথ স্থির করলে, কালকেই একজন ভাল ডাক্তার এনে দেখাতে হবে। এ জারগাটাও আবার এমনি হতভাগা যে, ভাল ডাক্তারও নেই ! মাসখানেকের ছুটি নিয়ে ক'লকাতা নিয়ে গেলে কেমন হয় ?

বেচারিা রিণা ! তার জন্তে অবিলম্বে যা হোক একটা কিছু করা নিতান্তই দরকার হ'য়ে পড়েছে।

উকিল তখন তার বক্তৃতা শেষ ক'রে আসন পরিগ্রহ করলে।

কিন্তু কাছারীর শেষে রূপানাথ যখন এই সব সুসঙ্কল্প নিয়ে ফিরে এল, ঘটনা তখন সম্পূর্ণ ভিন্ন খাতে বইল।

সে ঘরে আসতেই রিণা দমকা হাওয়ার মতো যেন ছিটকে বেরিয়ে গেল। রূপানাথ তাকে ধরে ফেলতে পারতো। হয়তো এক পশলা বৃষ্টি হ'ত। কিন্তু তার পরে মেঘ কেটে যেত। কিন্তু রূপানাথের হাত-পা যেন কাঠের মতো আড়ষ্ট হয়ে গেল। সে একটা কথাও বলতে পারলে না। নিঃশব্দে চেয়ে রইল।

কাছারীর পোষাক খুলে সে হাত-মুখ ধুয়ে এল। রিণা তবু ফিরল না। রামধন অত্যন্ত সন্তর্পণে টেবিলের উপর খাবার নামিয়ে রাখলে। জল আনলে, পান আনলে। রূপানাথ প্রথমটা সে দিকে ফিরেও তাকালে না। কিন্তু তখনই ভাবলে রিণা হয়তো ভাববে, তার বিরহ বেদনাতেই আহ্বারে এই অরুচি হয়েছে। সে গোত্রাসে খাবারগুলো সমস্ত থেয়ে ফেললে।

তারপর একটা পান মুখে দিয়ে ক্লাবে বেরিয়ে গেল।

রামধন রূপানাথের বাপের আমলের চাকর। রূপানাথকে সে কোলে পিঠে ক'রে মানুষ করেছে। রূপানাথের উপর তার স্নেহের ঠিক রূপ দেওয়া কঠিন। এখন সে আর ছেলেমানুষ নেই। বড় হয়েছে, হাকিম

হয়েছে। একদিন যাকে কত তিরস্কার করেছে, সে এখন মনিব। তাকে সে ভয় করে, সমীহ করে। অথচ মনে মনে কৃপানাথের সম্বন্ধে তার যে মনোভাব সে স্নেহ, এবং স্নেহ ছাড়া আর কিছুই নয়। শ্রদ্ধার চিহ্নমাত্র তাতে নেই।

রামধনের দেশ একটা ছিল নিশ্চয়ই। কিন্তু সে যে কোথায় ছিল তা আর তার নিজেরই মনে পড়ে না। ছেলে বয়সে এখানে আশ্রয় পেয়েছিল। বৃদ্ধকাল পর্যন্ত এইখানেই কাটল। তার স্ত্রী নেই, পুত্র নেই, ঘর সংসার কিছুই নেই। এদের সংসারকেই সে নিজের সংসার ব'লে গ্রহণ করেছে।

কৃপানাথ এতটুকু মুখভার করলে সে চোখে অন্ধকার দেখে। তার মেজাজ খারাপ হয়ে যায়। অথচ অসহায় বেচারী, কি যে করবে তাও ভেবে পায় না।

কৃপানাথ চ'লে যেতে সে একবার রিণার কাছে গিয়ে দাঁড়াল।

রিণা বই পড়ছিল। মুখ তুলে বললে, কি ?

—কি রান্না হবে তাই জিজ্ঞাসা করতে এলাম।

—যা গুসী।

রামধন কিছুকাল থেকেই লক্ষ্য ক'রে আসছে, পোষাক এবং প্রসাধন পরিপাট্যে রিণার যেন আর আগ্রহ নেই। একটু আগে রামধন তাকে গা ধুয়ে আসতে দেখেছে। কিন্তু এখন দেখলে তা বোঝাই যায় না। না বৌধেছে চুল, না করেছে প্রসাধন, না পরেছে কপালে টিপ, না পরেছে একথানা ভাল শাড়ী !

তার এই শ্রীহীনতা রামধনের ভাল লাগে না। যে বয়সের যা, তা নইলে ভালো লাগে ?

তবু বলবার কিছু নেই।

বললে, চিংড়ির কাটলেট কি...

রিণা গম্ভীর ভাবে বললে, বিরক্ত করোনা রামধন। বললাম তো তোমাদের যা খুসী রাঁধগে। আমার সময় নেই।

অগ্ন সময় রিণা যখন গম্ভীর ভাবে তাকে শাসন করে, সে আড়ালে গিয়ে হাসে। ওইটুকু মেয়ের গৃহিণীপণা তার ভারি সুন্দর লাগে। কিন্তু আজকে তার হাসবার মতো মনের অবস্থা নয়।

ঠাকুর জিজ্ঞাসা করলে, চিংড়ি মাছের তাহলে কাটলেটই হবেতো?

রামধন মুখ ঝামটা দ্বিধে বললে, তা নইলে চিংড়ি মাছ আনা হয়েছে কি জন্তে?

—না। আমি বলছিলাম, বোমা নিজে ভাজবেন, না আমি ভাজব?

রামধন একেবারে তেলে-বেগুনে অলে উঠল।

—তোমার আশ্পর্দা বাড়ছে ঠাকুর। বোমা নিজেই যদি ভাজবেন তো তোমাকে মাইনে দিয়ে রাখা হয়েছে কেন?

আর যায় কোথায়! তারপরে ঠাকুরের সঙ্গে রামধনের বেধে গেল তুমুল কলহ। চীৎকার শুনে রিণা একেবারে দোতালার বারান্দার রেলিং ধরে দাঁড়াল। অগ্ন সময় হ'লে সে দুজনকেই ধমকে দিত। কিন্তু আজকে কিছুই বললে না। ক্লান্তভাবে নিজের জায়গায় ফিরে এসে বসল।

কি দরকার তার ধমক দেবার? সে এ বাড়ীর কে? যা মনে হয় তাই করুক ওরা।

একটু পরে কলহের বাচনিক অংশের নিবৃত্তি হ'ল। কিন্তু রামধন ধমকে ধমকে বেড়াতে লাগল। ঠাকুরের জোরে জোরে খুস্টী নাড়ার

শবে উপরের ঘরে রিণা পর্যন্ত অতিষ্ঠ হ'য়ে উঠল। আর রাত্রে খেতে ব'সে কৃপানাথ উঠল চমকে।

তার পাতের একধারে ঘুঁটের মতো কালো কালো কি কতকগুলো সাজানো রয়েছে।

বিস্মিতভাবে কৃপানাথ জিজ্ঞাসা করলে, এগুলো কি?

ঠাকুরের সন্ধ্যাবেলার দর্প এবং তেজ ইতিমধ্যে অনেকখানি শান্ত হ'য়ে গেছে।

ভয়ে ভয়ে বললে, কাটলেট।

—কাটলেট! এইগুলো! কে করতে বলেছিল?

বিশেষ ক'রে যে কেউ করতে বলেছিল তা নয়। ঠাকুর ভয়ে ভয়ে চুপ ক'রে রইল।

—তুমি রাঁধতে শিখেছ কতদিন?

ঠাকুর চুপ ক'রে রইল।

কৃপানাথ রামধনকে বললে, ওর মাইনে মিটিয়ে দিয়ে কাল ওকে দূর ক'রে দিবি।

ঠাকুর যে খুব ভয় পেয়ে গেল তা নয়। প্রায় ছ'মাস হ'ল কৃপানাথ এখানে বদলী হয়েছে, তার অব্যবহিত পরেই ঠাকুরও এসেছে। এর মধ্যে বহুবার তার জবাবের ছকুম হয়েছে, কিন্তু জবাব হয়নি। মফঃস্বলের সহরে ঠাকুর পাওয়া সহজ নয়। ঠাকুরও হাকিমের বাড়ীর চাকরীর গৌরব বিসর্জন দিতে রাজী নয়।

এমনি ক'রে সবই ঠিক থাকে, কেবল অশান্তিই বেড়ে চলে।

পরের দিন দুপুরে একখানা টেলিগ্রাম এল। রিণার দ্বিদি লীনা জানাচ্ছে সন্ধ্যার গাড়ীতে সে এখানে আসছে।

লীনা অনেক দিন থেকেই আসবে বলে শাসাচ্ছে। কিন্তু আসা আর ঘটে উঠছিল না। যখন লীনার সুবিধা হয় তখন তার স্বামীর সুবিধা হয় না, আবার যখন তার স্বামীর সুবিধা হয় তখন তার হয় না। এমনি ক'রে কতবার যে আসবার সমস্ত ঠিকঠাক ক'রেও আসা হয়নি, তার আর হয়তা নেই। সে জন্তে লীনা ঠিকই ক'রেছিল, এমন ক'রে আর চিঠি লিখে সে অপ্রস্তুত হবে না। যখন যাবে তখন যাওয়ার আগে একেবারে টেলিগ্রাম ক'রে দেবে।

কিন্তু ঠিক এই সময়টিই কি লীনা আসবাব জন্তে বেছে নিলে? যখন রিণার সঙ্গে রূপানাথের প্রত্যহ খিটমিট বাধে সেই সময়টা?

রিণা টেলিগ্রামটা পেয়ে মনে মনে বিরত এবং অস্বস্তি বোধ করলে। ষ্টেশনে কারও যাওয়া দরকার। সে সম্বন্ধেই বা কি করা যায়।

অনেক ভেবে চিন্তে রিণা রামধনের হাত দিয়ে টেলিগ্রামখানা কোর্টে রূপানাথের কাছে পাঠিয়ে দিলে।

একটা জরুরি মামলা নিয়ে রূপানাথের কোর্ট ভাঙতে প্রায় ছ'টা বাজলো তারপরে আর বাসায় ফিরে পোষাক বদলে ষ্টেশনে যাবার সময় রইলো না। রূপানাথ কোর্ট থেকেই সোজা ষ্টেশনে চ'লে গেল।

লীনার স্বামী আসতে পারেননি। সে তার একটি দেওরকে সঙ্গে নিয়ে এসেছে।

রূপানাথকে দেখেই বললে, রিণা কোথায়? সে আসেনি কেন? তার শরীর ভালোতো?

রূপানাথ একটু অপ্রস্তুত হ'ল। রিণার আসা উচিত ছিল নিশ্চয়ই। বললে, হ্যাঁ, শরীর ভালোই আছে। কেন আসেনি কে জানে? আমি কোর্ট থেকে সোজা আসছি।

—ও !

কিন্তু রূপানাথের বাড়ী পৌছেই লীনার সমস্ত ব্যাপার বুঝতে বাকী রইল না। রিণার জন্তে তার খুব দুঃখ হ'ল। কিন্তু মুখে কিছুই বললে না। কেবল দেখে যেতে লাগল।

রূপানাথ এবং রিণা খুব সতর্ক হ'য়ে রইল যাতে লীনা কিছু বুঝতে না পারে। সাধারণত স্বামী-স্ত্রীর সে সামাজিক সম্বন্ধ প্রাণপণ চেষ্টায় লীনার সামনে সেটাকে তারা বজায় রেখে চলল। ওদের নিয়ে সমস্ত সকাল সে হাসি গল্প করে। বিকেলে বেড়াতে যায়। ছুটির দিনে আমোদ প্রমোদের আর শেষ থাকে না।

কিন্তু লীনার কেবলই মনে হয় এর মধ্যে কোথায় যেন ফাঁক আছে, ফাঁকিও আছে ! ভালো ক'রে লক্ষ্য ক'রে দেখেছে, ওরা দুজনে কখনও একলা থাকে না। কি যে ব্যাপার লীনা বুঝতে পারে না।

এ সব বিষয়ে তার প্রধান মন্ত্রী স্বামী। সে ভদ্রলোক সঙ্গে নেই। লীনা আর থাকতে পারলে না। তাঁকে একখানা চিঠি লিখে সব কথা খুলে জানালে। লিখলে :

কেন এমন হ'ল বলতো ? মোটে তিন বৎসর ওদের বিয়ে হয়েছে। এর মধ্যে এমন তো হবার কথা নয়। আসছে মেলেই এর কারণ জানাবে। নইলে তোমার ফি কাটা যাবে।

সে ভদ্রলোক ডাক্তার। লীনার চিঠি পেয়ে হাসলেন। ফি কাটা যাবার ভয়ে দেরী করতে সাহস করলেন না। পরের মেলেই চিঠি দিলেন, আর পাঠালেন একটি প্যাকেট।

চিঠিতে লিখেছেন :

গৃহস্থ ঘরের মেয়েরা বিবাহিত জীবনে রূপের প্রয়োজন বড় একটা



স্বীকার করে না। পরজন্ম—পূর্বজন্ম, ইহকাল—পরকাল ক’রে সমস্ত ব্যাপারটাকে আমরা আধ্যাত্মিকতায় এমন ঘোলাটে ক’রে তুলেছি যে, দাম্পত্য জীবন থেকে মেয়ের রূপচর্চাকে এক রকম ছেঁটেই ফেলেছে। প্যাকেটে যে সমস্ত জিনিষ পাঠালাম, সেগুলো খাবার ওষুধ নয়, নাখাবার। ব্যবহার ক’রে ফল পেলে ফি’টা কে দেবে? তুমি না রিণা? না তোমরা দুজনেই?

লীনা হাসতে হাসতে প্যাকেটটা খুলে ফেললে।

ও হরি! ওষুধ কোথায়? এয়ে ক’শিশি তেল, সাবান আর ন্নো! লীনা চ’টে গেল। এই বুঝি ডাক্তারী বুদ্ধি!

দিন পনেরো পরের কথা বলছি।

স্বামীকে একটা কড়া চিঠি লেখবার জন্তে লীনা নিভূতে কলম নিয়ে বসল। এত দিনের মধ্যে একটিবারও ভদ্রলোক যে আসবার সময় ক’রে উঠতে পারলেন না, রাগ সেই জন্তেই। তা ছাড়া রিণার ব্যাপারটারই বা কি হবে?

লীনা লিখতে লাগল।

হঠাৎ মনে হ’ল পাশের ঘরে কারা যেন ফিস-ফাস ক’রে কথা বলছে। এ বাড়ীতে ফিস-ফাসের বালাই নেই। কারা অমন ক’রে কথা বলে?

লীনা ছুটি ঘরের মধ্যবর্তী দরজায় কান পাতলে। হ্যাঁ, ফিস-ফাসই তো বটে! শাড়ীর খস-খস, চুড়ির ঠুন-ঠুন, আর...

আস্তে আস্তে লীনা দরজাটা একটু ফাঁক করলে। দেখে চক্ষুস্থির।

হু'হাত দিয়ে রূপানাথ রিণার মুখখানি তুলে ধরেছে। কালো মেঘের মতো একটি রাশ চুল তার হু'হাত বেয়ে ঝুলছে।

বলছে, তুমি কি সুন্দর রিণা !

আর...

লীনা চেয়ে দেখলে, ওদিকের দরজার পর্দার আড়াল থেকে আরও একজন এই দৃশ্য দেখছে। চোখ দুটি তার ছোট হ'য়ে গেছে, আর হাসিতে মুখখানি আকর্ষণ বিস্তৃত হয়েছে। তার যেন আর জ্ঞান নেই। সে রামধন।

বিকলে রিণাকে বুকে টেনে লীনা বললে, ছপু'রে কি হচ্ছিল রে ?

লজ্জায় রিণার মুখ রাঙা হ'য়ে উঠল। বললে, কখন ?

চোখে একটা কটাক্ষ হেনে লীনা বললে, সেই তখন।

মুখ নামিয়ে রিণা বললে, যাও !

হাসতে হাসতে লীনা বললে, আমি না হয় গেলাম, কিন্তু ডাক্তারবাবু যে ফি চায় ! সে তো ছাড়বে না !

মাথায় একটা ঝাঁক দিয়ে রিণা বললে, আমার এখন সময় নেই। আমার হ'য়ে তুমিই ফি'টা দিয়ে দিও।

## নৌড়ের মায়া

তিন দিনের জ্বরে যখন দ্বিতীয়া গৃহিণী কাঞ্চনমালাও বনমালীকে ফাঁকি দিয়ে চলে গেল, তখন বনমালীর বয়স একাম্র কি বাহাম্র। কচি কচি ছেলেমেয়েগুলিকে তিনি কোলে তুলে নিলেন বটে, কিন্তু তারপরে কি যে করবেন ভেবে পেলেন না।

বড় ছেলেটি বছর পোনেরোব। তার জন্তে ভাবনা নেই। নিজের খবরদারী নিজেই করবার বয়স তার রয়েছে। মেজটি মেয়ে, বয়সও বছর এগারো-বারো। তারও জন্তে না হয় ভাবনা নেই। কিন্তু পরের দুটি? তারা যে নিতান্তই বাচ্চা! ছোটটি তো সবে হাঁটতে শিখেছে।

ভগবান যার সর্বনাশ করেন, বুঝি এমনি ক'রেই করেন। বড়টি যদি মেয়ে হ'ত, তা হ'লে এত বিপদ হত না। পোনেরো বছরের বাঙালী মেয়ে স্বচ্ছন্দে সংসারের ভার নিজের কাঁধে তুলে নিয়ে সকলকে নিশ্চিন্ত করতে পারত। কিন্তু ওই বয়সের একটা ছেলে নিতান্তই অকর্মণ্য। সংসারের বোঝা বইবার তার শক্তিও নেই, অবসরও নেই।

সম্বল একটি বুদ্ধা পিসিমা। তিনি দিনে মরছেন, রাতে বাঁচছেন, মৃত্যু যদি এঁকে নিয়ে তাঁর কাঞ্চনমালাকে রেহাই দিত, কি সুখেরই না হ'ত!

বনমালী একটা দীর্ঘশ্বাস ফেলে সেই পিসিমারই ঘরের দিকে চললেন। এ ক'দিন যদি বা তিনি উঠে-হেঁটে বেড়াচ্ছিলেন, কাঞ্চনমালা যাওয়ার পর থেকে একেবারে শয্যা নিয়েছেন।

তার বিছানার পাশে ব'সে বনমালী শাস্ত্রের অনেক নিগূঢ় তত্ত্বকথা শোনালেন। এই জীবন যে নলিনীদলগত জলের মতো তরল—এই পৃথিবী যে পান্থনিবাস, মানুষ এখানে দু'দিনের জন্তে আসে এবং কাজ ফুরিয়ে গেলেই চলে যায় ইত্যাদি ইত্যাদি অনেক শাস্ত্রীয় বাক্যে পিসিমার অশ্রুশ্রোত কিছু পরিমাণে নিরুদ্ধ হ'ল সত্য, কিন্তু তিনি উঠে বসতে পারলেন না। শাস্ত্রবাক্য মনকে প্রবোধ দিতেই পারে, দেহে শক্তিসঞ্চার করতে পারে না। বনমালী বুঝলেন, এ বিপদে পিসিমার কাছ থেকে কয়েক গ্যালন অশ্রু ছাড়া আর কিছুই প্রাপ্তির সম্ভাবনা নেই। এই বানচাল সংসারতরঙ্গী চালাতে তিনি নিতান্তই অশক্ত।

প্রথম পক্ষের দুটি মেয়ে আছে বটে, কিন্তু তারা ঘরলী-গৃহিণী। দুজনেরই সম্পন্ন গৃহস্থ-বাড়ীতে বিবাহ হয়েছে। ক্ষেত-খামার, জোত-জমা, জন-মজুর প্রচুর। তাদের পক্ষে বড় জোর দু'দশ দিনের জন্তে এখানে আসা সম্ভব। তার বেশী নয়।

পত্নী-শোকের চেয়ে এই সব দুশ্চিন্তাই বনমালীর মনে প্রবল হয়ে উঠল। রাঁধা-বাড়া করবে কে? ছেলেপুলেদের নাওয়াবে-ধোয়াবে কে? বনমালী সম্পন্ন গৃহস্থ। তার সংসারটি ছোট নয়, কাজও কম নয়। কাঞ্চনমালা দিনরাত্রি খিটমিট করত ব'লে বনমালী কত বিরক্ত হতেন। এই নিয়ে স্বামী-স্ত্রীতে কতদিন কত ঝগড়াই হয়েছে। আজ বনমালী বুঝতে পারলেন, এতবড় বোঝা যাকে দিনের পর দিন বইতে হয়, শনিবার নেই, রবিবার নেই, ছুটি নেই, তার পক্ষে মেজাজ ঠিক রাখা সত্যিই বড় কঠিন।

বনমালীর দূর সম্পর্কের বিধবা একটি বোন আছে। সম্বন্ধটা দূর হলেও ক্রমাগত যাওয়া-আসা, মেলা-মেশায় সম্পর্কটা নিকটই। নির্ঝঙ্কাট

বিধবা স্ত্রীলোক, ছেলে-মেয়ে নেই। দেওর-ভাস্করের ঘরে উদয়াস্ত নিরবকাশ পরিশ্রমের বিনিময়ে দু'বেলা নির্যাতন এবং এক বেলা দুটো খেতে পায়। সেই যন্ত্রণায় অস্থির হয়ে কাঞ্চনমালার জীবিতকালে একবার সে কিছুদিনের জন্তে এখানে এসেছিল। ইচ্ছা ছিল, বৈধব্য জীবনের অবশিষ্টকাল ভায়ের আশ্রয়েই কাটিয়ে দেবে। কিন্তু মুখরা কাঞ্চনমালার জন্তে তার এখানকার অবস্থিতিকালও দীর্ঘ হতে পারেনি।

সেই বিশ্বতপ্রায় ইতিহাস স্মরণ ক'রে বনমালী দমে গেলেন। যেদিন সুরবালা চৌর্য্যাপরাধে বিতাড়িত হয়েছিল, সেদিন বনমালী নিঃশব্দে দাঁড়িয়ে দেখেছিলেন। তাকে রক্ষা করতে পারেননি, একটা সান্ত্বনার কথাও বলতে পারেননি। অথচ কলঙ্কটা যত বড়ই হোক, অপরাধটা তত বড় ক'রে দেখতে বনমালী অন্তত পারেননি।

দেবরের শিশুপুত্রের ঘুড়ির পয়সা জোগাবার জন্তে সুরবালা যদি সামান্য কিছু চাল চুরি ক'রে গোপনে বিক্রিই ক'রে থাকে, সেটা এমন একটা অপরাধ নয় যে তার জন্তে পাড়ার পাঁচজনকে ডেকে এনে পঞ্চায়েৎ বসাতে হবে। বনমালী ইচ্ছা করলে তাকে রক্ষা করতে পারতেন। কিন্তু তাঁর কেমন মনে হ'ল, স্বামীগৃহে নির্যাত্তিতা যে বিধবা ভ্রাতৃগৃহে এসেও দেবরপুত্রের মমতা বিশ্বত হতে পারে না, দেবর-ভাগুরের লাঞ্ছনা সত্ত্বেও তার অবলম্বনহীন জীবনের মূল শিকড়টি যে আসলে ওই নিষ্করণ স্বামীগৃহের মাটিতেই আবদ্ধ তাতে আর ভুল নেই। সেইখানেই তার ফিরে যাওয়া উচিত।

সেইদিন থেকে আজ পর্য্যন্ত যে-ভগিনীর একটা খোঁজ নেওয়ার আবশ্যক বিবেচনা করেননি, আজকে তারই কাছে গিয়ে কি ক'রে যে দাঁড়াবেন সেই ভেবে তিনি বিব্রত হয়ে উঠলেন।

কিন্তু বনমালীকে বিশেষ বিব্রত হতে হ'ল না।

একদিন সকালে মড়াকান্নার শব্দে ঘুম ভেঙে উঠেই দেখে, তারই বাড়ীর উঠানে ব'সে সুরবালা অতি করুণ কণ্ঠে মৃত ভ্রাতৃজায়ার উদ্দেশে শোক নিবেদন করছে।

বনমালী যেন আকাশের চাঁদ হাতে পেলেন। কৌচার খুঁটে অশ্রুমার্জনা ক'রে বললেন, সুরবালা এলি ?

কান্না থামিয়ে সুরবালা বললে, থাকতে পারলাম কই দাদা ? কিন্তু কাছেই তো থাকি, সে সময় একটা খবর দিয়ে আনাতেও তো পারতে।

অপ্রস্তুত হয়ে বনমালী বললেন, তখন সময় ছিল না দিদি। এখন সময় হতে তোকে আনবার কথাই ভাবছিলাম। বেশ হ'ল, তুই নিজেই এলি। এই তো দেখছিস ঘর-দোরের ছিরি। ওই দেখ ছেলেমেয়েগুলোর চেহারা। পিসিমা বোধ হয় এখনও ওঠেনইনি। এই সব দেখে-শুনে নিয়ে আমাদের এ যজ্ঞা থেকে নিষ্কৃতি দে ভাই, শেষ বয়সে এ আর আমার সহ হবে না।

শেষের দিকে তাঁর গলার স্বর ভারি হয়ে এল।

কান্নার শব্দে ছেলেমেয়েরা ইতিমধ্যেই পিসিমার কাছে এসে দাঁড়িয়েছিল। সুরবালা দু'হাত দিয়ে তাদের বুকের মধ্যে টেনে নিলে।

বনমালী সেদিকে একবার চেয়ে তাড়াতাড়ি পাশ কাটিয়ে চলে গেলেন। পত্নীবিয়োগের এত দিন পরে কান্না তাঁর গলার কাছ পর্য্যন্ত চলে উঠল। এতদিন পরে নিজেকে সম্বরণ করা তাঁর পক্ষে যেন অসম্ভব হয়ে উঠল।

তারপরে পিসিমা উঠলেন। পাড়া-প্রতিবেশী গৃহিণীরা এলেন।  
কর্মহীন দু-চার জন উলঙ্গ শিশুরও সমাবেশ হ'ল।

সবাই বললেন, বেশ হয়েছে, বেশ হয়েছে। তুই আসবি না তো কে  
আসবে? ওই তো পিসিকে দেখছি। ওর কি আর শক্তি আছে?  
যদিন না নতুন বোঁ আসছে, তদিন সব দেখে শোন, ছেলেমেয়েদের সময়ে  
দুটো খেতে দে, থাক।

বনমালী ফিরে এসে দেখলেন, উঠান ঝরঝরে নিকানো। ঘরের  
মেঝে, বারান্দা ঝকঝক করছে। অনেক দিন পরে বাড়ীর আবার শ্রী  
ফিরেছে। পত্নীবিয়োগবেদনা ভুলে বনমালীর ঠোঁটে পরিতৃপ্তির আভাস  
জাগল।

বারো বছর বয়সে সুরবালার বিবাহ হয়েছিল। পোনেরো বছরে  
বিধবা হয়। ছেলেপুলে হয়নি। স্বামীকে চেনবার সবে সুষোঁগ পেয়েছিল।  
নীড় বাঁধবার সাধ প্রতিপদের শশিলেখার মতো মনের আকাশে উঠতে না  
উঠতেই মিলিয়ে গিয়েছিল। স্বামীর মৃত্যুর পর তার কাজ হ'ল দাসীর।  
যা-কিছু শ্রমসাধ্য সেই সব কাজের ভার পড়ল তার উপর। তার কাজ  
শুধু খাটবার, শুধু হুকুম তামিল করবার। দেবার-খোবার সাজাবার-  
গোছাবার কাজ তার জায়গের। তাদেরই ঘর, তাদেরই সংসার। সে  
শুধু এক বেলা দু'টি অন্নের বিনিময়ে খাটে।

বনমালীর সংসারে এবারে এসে সে প্রথম গৃহিণীত্বের স্বাদ পেলে।  
বুঝা পিসি বিছানা ছেড়ে বড় একটা ওঠেন না। বনমালী বাইরে-বাইরেই  
ঘোরেন। ঘুম থেকে উঠে ঘর-দোর নিকোনো থেকে আরম্ভ ক'রে শয্যা

গ্রহণ করার পূর্বে বনমালীর কনিষ্ঠ সন্তানটিকে দুধ খাওয়ানোর হাঙ্গামা পোয়ানো পর্য্যন্ত সব কাজ একা তার। তাকে হুকুম করার কেউ নেই। যেটি সে নিজে না করবে সেইটিই হবে না। বাঁধবার জন্তে এমনি একটা ঘরেরই কল্পনা বোধ হয় তার অবচেতন মনের মধ্যে ছিল। তার আনন্দের আর সীমা রইল না।

প্রত্যেকটি ঘর সে আবার নতুন ক'রে নিজের মনের মত সাজিয়েছে। এদিকের খাট ওদিকে গেছে। ছবিগুলো ঝেড়ে-মুছে ফের নতুন ক'রে টাঙিয়েছে। বনমালীর শোবার ঘরে জোড়া-খাট ছিল। কাঞ্চনমালার মৃত্যুর পরে তার আর দরকার নেই। ছোট ছোট ছেলেমেয়েগুলি অল্প ঘরে তার কাছে শুচ্ছে। একখানি খাট সে সরিয়ে নিয়ে গেল পিসিমার ঘরে। গদির বিছানায় শুয়ে পিসিমা বড় সুখী। এতদিন তাঁকে মেঝের উপর শুতে হ'ত! খুশি হয়ে তিনি সুরবালার মাথায় হাত দিয়ে অনেক আলীর্কাদ করলেন।

বনমালীর জোড়াখাটের আর দরকার নেই সত্যি। তবু এত তাড়াতাড়ি একখানা খাট সরিয়ে নিয়ে যাওয়া তাঁর ভালো লাগল না। বহুকাল ধরে 'ওঘরে দু'খানি খাট পাতা ছিল। দুপুরে শুতে এসে তাঁর বড় ফাঁকা-ফাঁকা বোধ হ'ল।

জিজ্ঞাসা করলেন, সে-খাটখানা আবার কোথায় চালান করলি সুরো?

সুরবালা বললে, পিসিমার ঘরে। নীচে শুতে তাঁর বড় কষ্ট হচ্ছিল। বুড়ো মাল্লব!

বনমালী আর কিছু বলতে সাহস করলেন না। সুরবালা এবারে আর ভিক্ষুকের মতো আসেনি। বনমালীর গৃহে আজকে তার প্রয়োজন



অবিসম্বাদী। বনমালী চুপ ক'রে রইলেন। কিন্তু দুপুরে আর তাঁর ঘুম হ'ল না। তাঁর কেমন মনে হ'ল, শুধু পিসিমার প্রয়োজনেই খাটখানি ওঘরে অপস্থত হয়নি। এর মধ্যে আরও যেন কিছু আছে। এর মধ্যে কাঞ্চনমালার বিগত ব্যবহারের প্রতিশোধের প্রচ্ছন্ন ঝাঁঝও যেন পাওয়া যায়। কাঞ্চনমালার স্মৃতি অনন্তকাল ধ'রে বাঁচিয়ে রাখতে হবে, এমন পণ অবশ্য বনমালী করেনি। তাই ব'লে এত শীঘ্র তার হাতের সমস্ত স্পর্শ মুছে ফেলে দেবার প্রয়াসও তার শোভন মনে হ'ল না।

কিন্তু বনমালীর মনের কথা সুরবালা টের পেলে কি-না বোঝা গেল না। সে যথাপূর্ব্ব নিজের গৃহিণীপনায় মনোনিবেশ করলে। সে গৃহিণীপনা শান্ত এবং অহুচ্ছল না হতে পারে। ভরা বর্ষার উন্নত নদীর মতো তাতে উপদ্রব থাকতে পারে। কিন্তু তাকে তিরস্কার করা চলে না। পরিচ্ছন্ন গৃহসজ্জায়, ছেলেমেয়েগুলির দেহশ্রীতে তার পরিচয় এতই স্পষ্ট। এমন কি এই ক'মাসে বনমালীর শুষ্ক দেহেও একটুখানি নেয়াপাতি ভুঁড়ির উন্মেষ হয়েছে। এ নিয়ে বন্ধুমহলে আজকাল তাঁকে কিছু কিছু বিজ্ঞপও সহ্য করতে হয়।

বনমালী হাসে।

কাঞ্চনমালার হাতের রান্না সুরবালার মতো এমন সুন্দর ছিল না। তার খাওয়ানোও ছিল নিতান্ত ঘরোয়া ব্যাপার। তাতে আন্তরিকতা যদি বা ছিল, এমন যত্ন ছিল না। আর এ যেন সুরবালার গৃহে তার প্রাত্যহিক নিমন্ত্রণ।

কিন্তু এত ক'রেও সুরবালার মনের ভয় যায় না।

কে জানে তার এ গৃহিণীপনা কতদিনের। কবে হয়তো শুনবে,

বনমালীর বিবাহের দিন স্থির হয়েছে। একে বনমালীর বুড়ো বয়সের বিয়ে, তাতে এ কালের মেয়ে, নিতান্ত ছোট মেয়ে তো আর আসবে না। বিয়ের পর সংসারের ভার নিজের হাতে তুলে নিতে তার বেশী দিন হয়তো লাগবে না।

তখন ?

আবার যে-কে-সেই। দু'বেলা মুখ-ঝামটা খেয়েও এই ছেলে-মেয়েগুলি তাকেই মা বলে ডাকবে। তারই পিছু পিছু ঘুরবে। সুরবালা উদয়াস্ত খাটবে-খুটবে, ফরমাসমত রাঁধবে-বাড়বে। কিন্তু স্নুখে বসিয়ে কাউকে খেতে দিতে পারবে না। সেই যেমন কাঞ্চনমালার রাজত্ব ছিল। যেমন তার দেবরের সংসারে ছিল। অথচ স্নুখে বসিয়ে নিজের হাতে পরিবেশন ক'রে মেয়েমানুষ যদি খাওয়াতেই না পারে, তবে আর তার ইহজীবনে রইল কি ?

এত স্নুখেও সুরবালার স্নুখ নেই। তার কেবলই ভয় করে তার দুর্ভাগ্যে এত স্নুখ বুঝি সহিবে না।

এই ভয় ক্রমে উপসর্গে পরিণত হ'ল।

বাইরের ঘরে বনমালীকে বন্ধুবান্ধব নিয়ে পরিহাস করতে শুনলেই সে সব কাজ ফেলে রেখে আড়ি পেতে শোনে, কি কথা হচ্ছে। কোনো অপরিচিত লোককে আসতে দেখলেই ভয়ে তার বুক কঁপে ওঠে। কে যে কি মতলবে আনাগোনা করে কে বলতে পারে। বনমালীর মনের মধ্যেই যে ধীরে ধীরে আবার কি আকাজ্জক দানা বেঁধে উঠেছে, তাই বা কে জানে ?

অবশেষে কোশলে একদিন সুরবালা নিজেই কথাটা পাড়লে।

সুরবালা সেদিন অনেক বত্রে একটা নতুন তরকারি রেঁধেছিল।

তার আশ্বাদ গ্রহণ ক'রে বনমালী পুলকিত চিন্তে বললেন, তুই রাঁধিস বড় চমৎকার সুরো। সবাই বলছে, তোর হাতের রান্না খেয়ে আমার শরীর সেরে উঠেছে।

—আচ্ছা, হয়েছে!—বলে লজ্জায় আনন্দে সুরবালা তাড়াতাড়ি অন্ত দিকে মুখ ফিরিয়ে নিলে।

ওর লজ্জা দেখে বনমালী হেসে ফেললেন।

বললেন, সত্যি রে। লোকের কথা ছেড়ে দে, আমি নিজেই তো বুঝতে পারছি।

—ছাই পারছ!

ব'লে রান্নাঘর থেকে আর একটু তরকারি নিয়ে এসে সুরবালা ওর পাতে দিলে।

একটু পরে বেশ ভব্যযুক্ত হ'য়ে বললে, আমার মামা-স্বগুরের একটি মেয়ে আছে, বেশ বড়-সড়। হাসছ যে, বিশ্বাস হচ্ছে না?

হাসি থামিয়ে বনমালী বললেন, বিশ্বাস হবে না কেন? অনেকের মামাস্বগুরেরই তো বড় মেয়ে থাকে। তার পর কি হ'ল বল।

—বলছিলাম কি, তুমি অমত কোরো না। আমি বিয়ের জোগাড় করি। যদি দেখতে যেতে চাও তো—

—কিছু দরকার হবে না। কিন্তু তোর কি মাথা খারাপ হয়েছে সুরো? আমি এই বয়সে আবার বিয়ে করতে যাব কোন্‌ দুঃখে?

—এ বয়সে কি কেউ বিয়ে করে না?

—করুক গে। কিন্তু আমার অদৃষ্টে যদি বউ নিয়ে সংসার করাই থাকত তা হ'লে পর পর দুটো বউ মরবে কেন?

—তাই ব'লে—

স্বপ্নের ভাতগুলি তাড়াতাড়ি কোলের দিকে টেনে নিয়ে বনমালী বললেন, না, না সুরো। ওসব পাগলামি করিস নে। যে ক'টা দিন বাঁচি, এমনি ভাল-ভাল রান্না রেঁধে খাওয়া, ছেলে-পুলকের দেখ-শোন্। ব্যস্।

বনমালীর কথা শুনে সুরবালা খুশি হ'ল, কিন্তু সম্পূর্ণ আশ্বস্ত হতে পারলে না। পুরুষমানুষের মন বদলাতে কতক্ষণ! তাদের যত দরদ সংসারের উপর, তত দরদ ছেলে-মেয়ের উপর! তারা যে কি চায়, তা নিজেই জানে না। পুরুষমানুষকে সে বয়স্ক শিশু ছাড়া আর কিছুই ভাবতে পারে না। শিশুর মত তাদের চিন্তারও সামঞ্জস্য নেই, বুদ্ধিরও স্থিরতা নেই।

দেখতে দেখতে চারিদিক থেকে বনমালীর উপর আক্রমণ আরম্ভ হ'ল। বন্ধু-বান্ধব তো আছেই, সেদিন মুখ্যযোগিনিও এই নিয়ে যথেষ্ট অনুরোধ ক'রে গেলেন।

বললেন, ব্যাটা! ছেলে বিয়ে করবে না, এই কি কখনও হয় ঠাকুরপো? কি বল্ সুরো?

শাস্তকণ্ঠে সুরো বললে, তোমরাই বল বোদি। আমি ব'লে-ব'লে হয়রাণ হয়েছি।

বনমালী হেসে ফেললেন। বললেন, হয়রাণ হয়েছিস তো আবার গুঁকে ডেকে এনেছিস কেন?

এই প্রসঙ্গ ঠাট্টামাত্র সুরবালার মুখ শাদা হয়ে গিয়েছিল। সেদিকে লক্ষ্য না ক'রেই মুখ্যযোগিনি বললেন, আমাকে কেউ ডেকে আনেনি ভাই,

আমি নিজেই এসেছি পাড়াগুচ্ছ লোককে জিগ্যেস ক'রে দেখ, আমি উচিত কথা বলছি কি-না।

বনমালী হাত জোড় ক'রে বললে, পাড়াগুচ্ছ লোককে জিগ্যেস করতে হবে না বৌদি, কিন্তু আপনিই বলুন আমার বয়সটা কত ?

—কত শুনি ?

—পঞ্চাশ পেরিয়ে গেছে।

জিহ্বা ও তালুর সাহায্যে একটা অক্ষুট শব্দ ক'রে মুখ্যোগিন্দি সুরবালার দিকে চেয়ে বললেন, শুনলি কথা ? পঞ্চাশ পেরিয়ে গেছে ! পঞ্চাশ বছর আবার ব্যাটাছেলের একটা বয়স নাকি ?

মুখ্যোগিন্দির বোধ হয় কোনো স্বার্থ ছিল। কিন্তু তিনি স্মৃতিধা করতে পারলেন না। পিসিমার চোখের জল ব্যর্থ হ'ল। এমন কি, কন্যাদায়গ্রস্ত পিতার দলও একে একে হতাশ হয়ে ফিরে গেল। শেষ পর্যন্ত বন্ধুর দলও হাল ছেড়ে দিলে।

এমনি ক'রে প্রতিপক্ষ দলের সর্বদিকের আক্রমণ বনমালী প্রতিহত করলেন সত্য। তারা ব্যর্থ হয়ে ফিরেও গেল। কিন্তু সেই সঙ্গে বনমালীর মনোভূগের কতখানি ক্ষতি ক'রে দিয়ে গেল তা তখন টের পাওয়া গেল না বটে, কিন্তু কিছু দিন পরেই টের পাওয়া গেল।

বনমালী তখন রোগশয্যায়।

সাধারণ জ্বর। কঠিন কিছু নয়। কিন্তু উত্তাপ ৯৯ ছাড়াই আর বনমালীর জ্ঞান থাকে না। গানে-বক্তৃতায় হাসিতে কান্নায় চীৎকারে সে বাড়ীগুচ্ছ লোককে অস্থির ক'রে তোলে।

সুরবালা একা মেয়ে, কি করবে ? তবু ওরই মধ্যে দশবার এসে ওষুধটা খাইয়ে যায়, সাগুর বাটিটা এনে মুখে ধরে, হুঁটো ফল কুটে দিয়ে

যায়। কখনও বা একটু ব'সে মাথায় বাতাসও করে। আসলে ছেলে-গুলো হয়েছে দুষ্টুর শিরোমণি। সুস্থ অবস্থায় বাপের কাছে গিয়ে যদি বা একটু বসত, এখন আর কেউ তাঁর ছায়া মাড়ায় না। সুরবালা সেজ্ঞে তাদের তিরস্কারও করে, যদিও জানে শিশুর মন রোগীর কাছে কিছুতে বসে না।

এমনি একটা সময়ে ক'দিন রোগ ভোগের পর বনমালী একদিন সুরবালাকে ডেকে বললেন, তোর সেই মামাংগুরের মেয়ে না কে আছে বলছিলি সুরো, সেইখানেই বরং চেষ্টা কর। আর তো কোনো অসুবিধা নেই, কিন্তু এই অসুখের সময় স্ত্রী না হলে...

সুরবালার মুখের সমস্ত রক্ত নিমিষের মধ্যে যেন কোথায় উড়ে গেল।

বনমালী বলতে লাগলেন, রাত্রিটা কি ক'রে যে কাটে আমিই জানি। তেষ্ঠায় মরে গেলেও এক ফোঁটা জল দেবার কেউ নেই। ছেলেমেয়েগুলোও এমনই হারামজাদা হয়েছে যে, কেউ একটা উকি মারে না। সত্যি বলছি তোকে, আমার আর বিয়ের বয়স নেই, সে ইচ্ছেও নেই। কিন্তু তাই ব'লে এমন বেঘোরেও তো মরতে পারব না। রাত্রে একা থাকি, যদি ম'রেও যাই, ভোর না হ'লে একটা খবর পর্য্যন্ত কেউ পাবে না।

সুরবালার সমস্ত শরীর থর থর ক'রে কাঁপছিল নিজেকে সামলাবার জ্ঞে সে দরজার একটা পাটি শক্ত ক'রে ধ'রে নিঃশব্দে দাঁড়িয়ে রইল।

বনমালী আপন মনেই বলে চললেন, এখন বুঝছি, তাদের সকলের কথা অমান্ত ক'রে ভালো করিনি। তা সে বা হবার হয়েছে, এখন তুই যা খুশী কর, আমি বাধা দোব না।

সুরবালা কঠিনভাবে হাসলে। বললে, সে তো পরের কথা দাদা।

এখনই তো আর তোমার বিয়ে হ'তে পারে না। বউও কিছু এখনই এসে তোমার সেবায় ব'সে যেতে পারবে না।

নিজের অশোভন ব্যগ্রতায় লজ্জিত হয়ে বনমালী বললেন, না, না, সেই পরের কথাই বলছি।

সুরবালা নিঃশব্দে রান্নাঘরে ফিরে এল।

ভালো তরকারি রান্নার আগ্রহ আর তার নেই। কিন্তু এই কয় মাসের স্বাধীন এবং অব্যবহৃত গৃহিণীপনায় যে আনন্দের স্বাদ সে পেয়েছে তাকে বাঁচিয়ে রাখা যায় কি ক'রে? আনন্দসরোবরের জলে নেমে আবার সে ফিরে যাবে তার পুরাতন পচা নরককুণ্ডে?

সুরবালার মুখ কঠিন হয়ে উঠল।

বনমালী বিয়ে করবার জন্তে মনঃস্থির করেছেন। তাকে সে ভালো ক'রেই জানে। এর অর্থ, একবার তাঁর সেরে উঠতে যা দেবী। তারপর সব চেয়ে কাছে যে দিন পাওয়া যাবে সেই দিনেই বিবাহ স্থির হবে। তার পর নববধূ আসবে। হয়তো সে কাঞ্চনমালার মতো তার সঙ্গে দুর্ব্যবহার করবে, নয়তো সদয় ব্যবহারই করবে। কিন্তু এই অনুগ্রহ অথবা নিগ্রহের অর্থ কি? উভয় ক্ষেত্রেই তার অবস্থা পরিচারিকা অথবা আশ্রিতা আত্মীয়ার উপরে তো আর উঠবে না।

হায় ভগবান! যদি সুরবালাকে বনমালীর আত্মীয়া ক'রেই পাঠিয়েছিলে, আরও নিকটতর আত্মীয়া ক'রে পাঠাওনি কেন? তা হ'লে বনমালীর এই অসুখে আরও বেশী গুশ্রুয়া করা সম্ভব হ'ত। রাত্রে তাঁর নির্জন রোগ শয্যায় একাকী উপস্থিত থাকাও অসম্ভব হ'ত না। কিন্তু এ কি!

সুরবালা বনমালীর বড় পিসিমার জা-এর মেয়ে। নিজের জা-ও নয়,

স্বামীর খুড়তুত ভায়ের স্ত্রী। স্বামীর মৃত্যুর পর সেই জা বনমালীর বড় পিসীমার আশ্রয়েই ওঠেন এবং আরও কিছুকাল পরে তাঁরই হাতে আট বছরের সুরবালাকে সমর্পণ ক’রে স্বামীর অঙ্গুগমন করেন। সেই থেকে সুরবালা তার জ্যাঠাইমার কাছে মাহুষ। সেই সূত্রেই বনমালীর সঙ্গে আত্মীয়তা। সেই জ্যাঠাইমা আজ নেই। আছে সুরবালা আর বনমালী, আর সেই ছিন্ন তারে নতুন ক’রে জোড়া-তালি দেওয়া আত্মীয়তা। তারই উপর নির্ভর ক’রে বনমালীর রোগশয্যায় রাত্রি কাটানো চলে কি-না সংশয়ের বস্তু।

সমস্ত দিন ধ’রে সুরবালা কত কি ভাবলে, তার মাথাও নেই মুণ্ডও নেই। ছেলেগুলো কে যে পেট ভরে খেলে, আর কে খেলে না—চোখেও দেখার সময় পেলেন না। খাওয়ার শেষে পিসিমা একটুখানি আচারের জন্তো গলা ভেঙ্গে ফেললেন, তবু পেলেন না। তিন বারের ওষুধ বনমালী ছ’বারে খেলেন। আর সে নিজে ভাত বেড়ে সে ভাত হাঁড়িতেই ঢেলে রাখলে।

তারপরে সন্ধ্যাবেলায় অনেকদিন পরে চুলগুলো পরিপাটি ক’রে বাঁধলে। মুখে একটুখানি সাবানও গোপনে দিলে। রাত্রে ছেলেমেয়েদের খাইয়ে-শুইয়ে বনমালীর ঘরে এল।

তার পায়ের শব্দে চোখ মেলে বনমালী আশ্চর্যের সঙ্গে বললেন, সুরো ?

সুরবালা নীচে মেঝেয় নিজের জন্তো একখানা মাদুর পাতছিল।

সংক্ষেপে বললে, হুঁ।

—এইখানেই শুবি নাকি ?

—হুঁ।

একটা স্বস্তির নিশ্বাস ফেলে বনমালী বললেন, আমি বলতে পারছিলাম



না সুরো, কিন্তু জ্বর অবস্থায় একলা শুতে আমার বড় ভয় করে। তোর বৌদিকে কেবল স্বপ্ন দেখি। দেখে ভয় পাই। ভালোই হ'ল তুই এলি।

সুরবালা তাঁর মাথার শিয়রের বালিশটা ঠিক ক'রে দিয়ে ললাটে হাত বুলিয়ে বললে, এখন তো জ্বর নেই। ঘুমোও।

কোমল হাতের স্পর্শে তাঁর চোখ বন্ধ হয়ে এল। সুরবালার ঠাণ্ডা হাতখানি চোখের উপর রেখে জিজ্ঞাসা করলেন, কটা বাজে সুরো?

—কি জানি। দশটা বাজে বোধ হয়।

বনমালী আর কিছু বললেন না। শুধু ললাটে, মুখে, বুকে পরম আগ্রহে সেই শীতল হাতের স্পর্শ উপভোগ করতে লাগলেন।

সুরবালা কাঠের মতো শক্ত হয়ে সেইখানে ব'সে রইল।

\* \* \* \*

ভোরবেলায় ছেলেরা উঠে দেখলে, সুরবালা বারান্দায় একটা খুঁটিতে ঠেস দিয়ে উর্দ্ধমুখে ব'সে আছে। মুখ মড়ার মতো শাল, চোখে পলক পড়ে না, দুই কোণে দু'বিন্দু অশ্রু জমে আছে।

ছোট খোকা একটা ঠেলা দিয়ে ডাকলে, আমাদের খেতে দেবে না পিসি।

সে ডাকে সুরবালা একবার চমকে উঠল।

তারপর তাকে বুকে জড়িয়ে বললে, চল।

## মাকড়সার জাল

ছেলের চিঠিখানা হাতে পড়ামাত্র দামড়িরামের চোখে এই কঠিন কর্কশ পৃথিবীর চেহারা যেন বদলে গেল। তার আলোহীন অমুজ্জল ছোট ঘর, ঘরের মলিন দেয়াল, সমস্ত যেন উজ্জল হয়ে উঠলো। এই চিঠিখানার প্রত্যাশায় পোনেরো দিন ধ'রে সে দিন গুণ্ছে। কোনো কাজে মন বসে না। কাজ ফেলে দিনের মধ্যে বহুবার কেবলই ফিরে ফিরে এসে দেখে যায় পিওন তার দরজার ফাঁক দিয়ে কোনো চিঠি ফেলে দিয়ে গেছে কি না। বারে বারেই হতাশ হয়ে ফিরে যায়, তবু আবার ফিরে আসে।

পোনেরো দিন পরে সেই বহুপ্রত্যাশিত চিঠি অবশেষে এল। তার ছেলের নিজের হাতে লেখা চিঠি! কথাটা ভাবতেও দামড়িরামের হাসি আসে এই তো সেদিন তাকে দেখে এল, এক ফোঁটা ছোঁড়া। এর মধ্যে কত বড় সে হয়েছে যে, একেবারে নিজের হাতে চিঠি লিখছে!

দামড়িরাম একলা ঘরে দাঁড়িয়ে নিজের মনেই হাসতে লাগলো।

কিন্তু সময় সম্বন্ধে তার হিসাব ঠিক থাকে না। যাকে সেদিন মনে করছে, আসলে তা পাঁচ বৎসরের ঘটনা। পাঁচ বৎসর আগে এমনি একটা পূজার সময় সে দেশে গিয়েছিল। সেটা হচ্ছে মুন্সের জেলায়। যেখানে মুন্সের জেলা দ্বারভাঙ্গার সঙ্গে এসে মিশেছে তারই কাছাকাছি। অত দূরে প্রতি বৎসর যাওয়ার সুযোগ তার হয় না। সে রকম ছুটিও পায় না। সে জন্তে গত পাঁচটা বৎসরে আর সে যেতেও পারেনি।

এই পাঁচটা বৎসর তার কাছে বিভিন্ন রকম মনে হয়। কখনও এত

দীর্ঘ মনে হয় যে, ভাবতেও তার প্রাণটা হাঁফিয়ে ওঠে। ক্লাস্ত দিনের শেষে বাসায় ফিরে রাত্রে খাবার তৈরী করতে করতে উনানের আলোষ যাদের মুখ সে মনে করবার চেষ্টা করে, তাদের মুখ মনে পড়ে না। আবার কখনও মনে হয়, এই তো সেদিন। ক্ষুদ্র রঘুয়া উলঙ্গ দেহে বিরাটকায় মহিষটাকে ঠেঙাতে ঠেঙাতে চরাতে নিয়ে গেল। তার নিজের সামনে বড়শিতে ছোটো টাটকা কচি ভুট্টা পুড়ছে। লছমিয়া উঠানের মধ্য দিয়ে আসতে আসতে তার দিকে চেয়ে অকারণেই হাসলে।

এই তো সেদিন!

তবু সে পাঁচ বৎসরের কথা। সেদিনের ক্ষুদ্র রঘুয়া আজ নিজের হাতে বাপকে চিঠি লেখে! কে জানে লছমিয়া আর তেমন ক'রে অকারণে হাসতে পারে কি না!

পাঁচ বৎসর তো কম নয়।

এ বারে গিয়ে হয় তো সে আর রঘুয়াকে ধুলায়-ধূসর নগ্ন দেহে দেখতেই পাবে না। সকালে তার পাঠশালা, দুপুরে ক্ষেতের কাজ। কে জানে সে কত বড় হয়েছে!

দামড়িরাম চিঠিখানা উল্টে-পাল্টে দেখতে লাগলো। বড় বড় বাঁকা বাঁকা অক্ষর। বানান সর্বত্র ঠিক নেই। দুই একটা শব্দ মাঝে মাঝে ছেড়ে গেছে। ভুলে-ভরা চিঠির অক্ষরগুলো যেন শিশু রঘুয়ার মতো তার চোখের সামনে নৃত্য করতে লাগলো।

চিঠির প্রথমেই রঘুয়া প্রণাম দিয়েছে, শেষে আর একবার। আর মধ্যখানে লিখেছে, এবারে যখন দামড়িরাম যাবে তার জন্তে লাল-সাটিনের পা-জামা, নীল ফুল-তোলা সাটিনের আচকান এবং মাথায় জরির টুপি নিশ্চয় চাই।

বাপরে বাপ !

একেবারে সাটিনের আঁচকান, পাজামা আর জরির টুপি !

কিন্তু তখনই তার চোখের স্রুমুখে ভেসে উঠল, দূরে যতদূর দৃষ্টি চলে, কপির ক্ষেত নীলে ভাসছে। তার উপর ঘনিষে আসছে ধূসর পাহাড়ের ছায়া। আকাশে অন্তরাগের বর্ণচ্ছটা। আগে হরিণশিশুর মতো লাফিয়ে-লাফিয়ে চলেছে রঘুয়া। পিছনে সে আর লছমনিয়া। রঘুয়ার দিকে চেয়ে ওদের দুজনেরই একটা অপূর্ব আনন্দে গতি মন্ডর হয়ে আসছে। ওরা চলেছে সহরে, বাঙ্গালীবাবুর বাড়ীতে পূজো দেখতে...

দামড়িরাম স্থির করেছে, আর কিছু হোক না হোক, রঘুয়ার পোষাক একটা কেনাই চাই।

তার পক্ষে ব্যাপারটা খুব কষ্টকরও নয়। বলতে গেলে, রোজগার তার ভালোই। কোন্‌ একটা আফিসে সে বেয়ারাগিরি করে। সেখানে টাকা কুড়ি-বাইশ পায়। এর উপর সকালে খবরের কাগজ ফেরী করে। তাতেও আর গোটা বিশেক টাকা হয়। এর উপর এবং সেইটেই বড় আয়, তার কিছু মহাজনী কারবার আছে। আফিসের যে সমস্ত বাবু এবং সাহেব রেস খেলে, মাসের ১৫ তারিখের পর থেকেই তাদের টাকার দরকার হয়। একটু চড়া স্কুদে তাদের সে টাকা ধার দেয় এবং মাস-কাবারে মাইনে পেলেই স্কুদ সমেত টাকাটা পেয়ে যায়। পোনেরো তারিখের পরে আবার ধার দেয়। এমনি করে তার রোজগারের টাকা স্কুদে আসলে বেশ বেড়ে যায়।

দুপুর এবং বিকেল সে আফিসেই বন্ধ থাকে। কিন্তু সকালে তার

অবসর আছে। ভোর তিনটেয় উঠে তাকে খবরের কাগজের আফিসে আফিসে ছুটেতে হয়। সেখান থেকে তার প্রয়োজনমত কাগজ নিয়েই রাস্তায় হাঁটাহাঁটি আরম্ভ করে। তারপরে পোষাকের দোকান খুললেই সে ওরই মধ্যে বিশ্বাসের শো-কেসের সামনে এসে দাঁড়ায়। সাজানো পোষাকগুলোর দিকে সতৃষ্ণ নয়নে চেয়ে দেখে, কোন পোষাকটা রঘুয়াকে কেমন মানায়।

পূজোর তখনও মাস ছয়েক দেবী। দামড়িরামের পক্ষে ততদিন ধৈর্য্য ধারণ ক'রে থাকা অসম্ভব হয়ে উঠল।

খামের চিঠিখানা সব সময়ে তার শততালিযুক্ত মলিন পাঞ্জাবীর পকেটেই থাকে। অবসর পেলেই সেটা বার করে পড়ে, পরিচিত কাউকে পেলেই তাকে দেয়।

—দেখো তো ভেইয়া, কেয়া লিখা।

—কোন লিখা ?

দামড়ি সগর্বে বলে, মেরে লেড়কা।

লোকটা চিঠি পড়ে সহাস্ত্রে ফেরৎ দেয়।

বলে তব কেয়া ! লাগ যাও। জাস্তি তো নেহি, খালি সোয়াটিনকো আচকান গুর পায়জামা।

মুচকি হেসে দামড়ি বলে, বাস, উ তো ঠিক হয়। লেकिन মিলতা কাঁহা ?

—হাম কেয়া জানে। পুছো কিস্কে।

সবই ঠিক আছে। আচকান আর পায়জামা। দামড়িরাম যাকে পায় পুছিয়া বেড়ায়, কিন্তু সঠিক কেউ বলতে পারে না। সবাই বলে, দেখ, দোকানে দোকানে জিজ্ঞাসা কর। ক'লকাত্তা সহরে

বাঘের দুধ পাওয়া যায়, সোয়াটিনের আচকান পায়জামা তো সামান্য ব্যাপার !

দামড়িরাম একটা কথা বুলে যে, ইতিপূর্বে তার পরিচিত আর কেউ তার ছেলের জন্তে এই মহামূল্য পোষাক কেনেনি। কিনলে, ঠিক কোথায় পাওয়া যায় নিশ্চয়ই বলতে পারতো। সেই কথা ভেবে তার মন গর্বে এবং আনন্দে আরও ফুলে ওঠে।

সত্যি কথা বলতে কি, এই ক’দিনের মধ্যেই ওর চেহারা, চাল-চলন সব এমন বদলে গেল যে, বন্ধুরা ভয় করতে লাগলো, মাথা না খারাপ হ’য়ে যায়।

কিন্তু ঠিক মাথা খারাপের লক্ষণও নয়।

আগে সে যতখানা কাগজ নিত, এখন তার চেয়ে অনেক বাড়িয়ে দিয়েছে। হাঁকছে আরও জোরে; ছুটোছুটি অনেক বেড়েছে। এমন কি ছপুর্বে টিফিনে যে এক ঘণ্টা সময় পায়, তারও মধ্যে যতগুলো পারে টেলিগ্রাম বিক্রি করে। এমন কি’ ক’লকাতায় যখন ট্রাম পুড়ছে, গুলি চলছে, লোক মরছে, তখন যে সব জায়গায় কেউ যেতে সাহস করে না, সে সব জায়গায় সে নির্ভয়ে চলে যায়।

এমনি ক’রে তার আয় আরও বেড়ে গেল।

দামড়িরাম অবিশ্রান্ত খাটে, চরকির মতো ঘোরে, আর যাকে পায় তাকেই জিজ্ঞাসা করে, সোয়াটিনের আচকান আর পায়জামা কোথায় পাওয়া যায়। জরির টুপির খবর সে জানতে পেরেছে।

অবশেষে অবশিষ্ট খবরও পেল। একজন তাকে সন্ধান দিলে, কোথায় তা পাওয়া যেতে পারে এবং কত বা তার দাম পড়তে পারে।

অল্প সময় হ’লে দাম শুনে সে ভড়কে যেত। কিন্তু কি যেন ওর

হ'য়েছে। ডাইনে বাঁয়ে ধানমোন ধূসর পাহাড়, পদনিম্নে দিগন্তবিস্তৃত ঘন সবুজ কপির ক্ষেত, মাঝ দিয়ে আঁকা বাঁকা সরু আল পথ, তারই উপর সাটিনের পোষাক পরা রঘুয়া,—এই যখন সে কল্পনা করে তখন টাকা যেন আর তার কাছে টাকা বলে মনে হয় না।

কিন্তু সাটিন কিনতে গিয়ে সে পড়লো মুষ্কিলে। রঘুয়ার মাপ তার কাছে নেই। মাপ সে পাঠায়নি, পাঠাবার প্রয়োজনই বোধ করে নি।

হতবুদ্ধির মত সে চারিদিকে চাইলে।

দোকানে আরও কতগুলি ছেলে আছে নানা বয়সের। তারাও এসেছে কিনতে। তাদের দিকে চেয়েও একটা আন্দাজ করবার চেষ্টা করলে। কিন্তু কিছুতেই ঠিক করতে পারলে না। যেটির দিকে চায়, মনে হয় ওরই মতো হবে বোধ হয়।

অনেকক্ষণ তাদের দিকে চেয়ে ও দোকান থেকে বেরিয়ে এল। কোমরে গেঁজলেতে তার নোটের তাড়া। অনেক আশা নিয়ে এসেছিল সে কিনতে। কিন্তু হ'ল না।

মনটাই তার খারাপ হয়ে গেল।

অবশ্য এখনও অনেক সময় আছে। মুন্সের জেলা খুব বেশী দূরে নয়। আজকেই যদি সে চিঠি দেয়, হুগাখানেকের মধ্যে মাপ চলে আসবে। বড় জোর দশ দিন লাগবে। তাই সে করবে। তবু প্রথম চেষ্টাতেই নিরাশ হয়ে মনটা তার খারাপ হয়ে গেল।

একবার হাসিও এল। কত দিন হ'ল রঘুয়ার চিঠি এসেছে, কিন্তু

মাপের কথাটা একবারও তার মনে হয়নি। আশ্চর্য্য ! রঘুনা না হয় ছেলেমানুষ, কিন্তু সে তো আর ছেলেমানুষ নয়।

বাসায় ফেরামাত্র একটা হট্টগোল আরম্ভ হ'ল,—

—কি এনেছিস দেখি ! দেখি !

দামড়িরাম বুড়ো আঙ্গুল নাড়িয়ে বললে, কিছুই না।

—আরে মাপে কি হবে, তোর ছেলে তোর আন্দাজ নেই ?

লজ্জিত হাস্তে দামড়িরাম বললে, পাঁচ বছর দেখি নি।

কথাটা ভাববার মতো।

কিন্তু বন্ধুরা নিরুৎসাহ হ'ল না। পাশের একটা নয় দশ বছরের ছেলেকে দেখিয়ে বলল, এই রকমই হবে আর কি !

দামড়িরাম তীক্ষ্ণ দৃষ্টিতে তার দিকে চেয়ে দেখলে। বললে, ওর চেয়ে লম্বা হবে। স্বাস্থ্যটা ভালো কি না।

বন্ধুরা বললে, তাহ'লে ঐটের মতো ?

ব'লে আর একটি ছেলের দিকে আঙ্গুল দিয়ে দেখালে।

দামড়িরাম ভেবে বললে, আর একটুকু ছোট হবে। দেখি, সোজা হয়ে দাঁড়া দেখি ?

ছেলেটি হাসতে হাসতে সোজা হয়ে দাঁড়ালো।

—হ্যাঁ, আরেকটুকু ছোটই হবে বোধ হয়। ঠিক বুঝতে পাচ্ছি না।

দামড়িরাম আবার লজ্জিতভাবে হি-হি করে হাসলে। কিন্তু তখনই উৎসাহভরে হাতে তালি বাজিয়ে বললে, কুছ পরোয়া নেই ভাই। চিঠি ভেজ দিয়েছি, হপ্তার মধ্যে মাপ আযায়েগা।

কিন্তু মনটা তবু কেমন খচ্ খচ্ করতে লাগলো।



দামড়িরাম চিঠি দিলে, কিন্তু পোনরো দিনের মধ্যেও তার উত্তর না পেয়ে উদ্বিগ্ন হয়ে উঠলো।

নিজে সে খবরের কাগজ ফেরি করে। সকাল-বেলাতেই একখানা কাগজ উর্দ্ধে তুলে চীৎকার করতে করতে ছুটে, হো গিয়া হ্যায়, হো গিয়া হ্যায়!

কিন্তু কি যে হয়ে গেল, সে নিজেও জানে না।

যতদিন যায়, চিঠি আসে না, আর সে মুষড়ে পড়ে। এখন আর সে তেমন উৎসাহভরে জোরে জোরে হাঁকতে পারে না।

বেনেটোলার মোড়ে একটা মেসে সে কাগজ দেয়। ভদ্রলোক ষণ্টাখানেকের জন্তে কাগজখানা নেন, পড়েন, তারপরে আবার ফেরৎ দেন। দামড়িরাম কাগজখানা আবার পুরো দামে বিক্রি করে। তার সুবিধা এই যে, আধখানা কাগজের দাম সে শুধু শুধুই লাভ করে।

দামড়িরামের কাজ হয়েছে, প্রথম কাগজখানাই সে ছুটতে ছুটতে নিয়ে গিয়ে ভদ্রলোককে দেয়। অত ভোরে ভদ্রলোকের সব দিন হয় তো ঘুম ভাঙে না। যে-দিন ভাঙে, দামড়িরাম কাগজের বাণ্ডিল বগলে নিয়ে তাঁর দরজার চৌকাঠে উঁচু হয়ে বসে।

বলে, আগে হামকো মুঙ্গেরকা খবরচৌ বাতাইয়ে তো।

মুঙ্গেরের খবর কোনদিন থাকে, কোনদিন থাকে না। ভদ্রলোক তাকে প'ড়ে-প'ড়ে শোনান : কোথাও উন্নত জনতা রেল লাইন তুলছে, টেলিগ্রাফের তার কাটছে, রেল-স্টেশন, খানা আক্রমণ করছে,—বিনিময়ে গুলী খাচ্ছে, গ্রেপ্তার হচ্ছে, পাইকারী জরিমানা দিচ্ছে। সব দিকে

ট্রেন চলছে না, ডাক যেতে দেবী হচ্ছে, আরও কত কি। এই সবই অবশ্য তার মুন্সের জেলায় নয়। এক একদিন এক এক জায়গার খবর। কিন্তু এর মধ্যে মুন্সেরও আছে।

যে-দিন মুন্সেরের কোনো খবর থাকে না, সে-দিন দামড়িরাম খুশী হয়। বলে, আর সব ঠিক হো গিয়া হ্যায়, না বাবুজী ?

বাবুজী তামাক টানতে টানতে বলেন, কি জানি বাবা।

দামড়িরাম বিজ্ঞের মতো বলে, উ তো ঠিক বাৎ বাবুজী। হামকো মালুম হোতা, পূজাকা বিচমে সব ঠিক হো যায়ে গা।

সে কাগজ আকাশে তুলে ছুটে ছুটে বেরিয়ে পড়ে।

কিন্তু যে-দিন মুন্সেরের খবর থাকে, সে-দিন সে দ'মে যায়।

—তব তো বহুৎ মুস্কিলকা বাৎ হ্যায় বাবুজী !

বাবুজী সাড়া দেন না।

দামড়িরামের বুকে যেন একটা জলদল পাথর চেপে বসে। নিশ্বাস নিতে কষ্ট হয়।

সে আন্তে আন্তে বেরিয়ে আসে। হাতের কাগজগুলো তার কাছে ভারি মনে হয়। প্রভাতের সোনালী আলো, পথে-পথে ছেলেমেয়ের হুড়াহুড়ি কিছুই তার ভাল লাগে না। হাতের কাগজগুলো পরিচিত অগ্নি হকারকে দিয়ে সে বাসায় ফিরে আসে।

বিস্মিত হকার বলে, কেয়া হ্যায় দামড়ি ?

—তবীয়ৎ ঠিক নেহি হ্যায়।

কিন্তু বাসায় ফিরেও সে নিশ্চিন্ত হতে পারে না। তার বুকের মধ্যে কি যেন একটা তোলপাড় করতে চায়, কিন্তু তার পথ পাচ্ছে না। তাই কোথাও তাকে স্থির হতে দিচ্ছে না।

সে একবার শোয়, একবার উঠে বসে। কখনও বা সঙ্কীর্ণ ঘরের মধ্যে অস্থিরভাবে পাইচারী করে। কিন্তু কিছুতেই শান্তি পায় না।

অবশেষে পাড়ায় বাঁকের মুখে দাঁড়ায় বসে বাবুরা যেখানে চায়ের পেয়ালা সামনে নিয়ে খবরের কাগজ পড়ে, সেইখানে গিয়ে নিঃশব্দে একপাশে বসে। তাদের উদ্দাম রাজনৈতিক আলোচনা শোনে। কিন্তু যা শোনে, তাতে তার বুকের রক্ত একেবারে শুকিয়ে যায়।

তবু নিষ্কৃতি নেই।

খবরের কাগজ অল্প হকারকে দেওয়া যায়। লাভটা নাই পেল, আসল দামটাই ফেরৎ পাবে। কিন্তু আপিসের কাজে তো আর বদলি চলবে না। সে কাজ তার নিজেকেই করতে হবে।

দামড়িরাম মাথায় দু'ঘটি জল ঢেলে হোটেলের যায়। সেখানে দু'টি থেয়ে আপিস যাবে।

অবশেষে পূজা এসে গেল। মধ্যে আর দু'টি দিন বাকী।

রঘুয়ার কোন চিঠিই এল না। না চিঠি, না মাপ। কিন্তু তার জন্তো লাল সাটিনের পায়জামা, ফুলতোলা নীল সাটিনের আঁচকান, এবং জরির টুপী দামাড়িরাম কিনবেই।

যে ছেলেটিকে মাথায় রঘুয়ায় মতো হবে বলে তার মনে হ'ল, তারই মাপে সে কিনলে। হয় তো একটু বড় বড় হবে, তা হোক। কিছুদিন পরতে পারবে। ওদের এখন বাড়ার বয়স। এ মাসের জামা ছ'মাস পরে আর গায়ে হয় না।

দাম লাগলো অনেকগুলো টাকা। কিন্তু তা গায়ে লাগলো না।

বাসায় গিয়ে মলিন বরের স্তিমিত আলোকেও সেগুলো খুলতেই চোখের সামনে যেন ঝলমল ক'রে উঠলো। রঘুয়ার মুখ তার ভালো মনে পড়ে না। সে যে কত বড় হয়েছে তাও জানা নেই। তবু এই সুন্দর ঝলমলে পোষাকে তাকে কল্পনা করতেই দামড়িরামের মনও আনন্দে ঝলমল ক'রে উঠল।

ষ্টেশনে সে রোজই গিয়ে খবর নেয়। ট্রেনের গোল এখনো ভাল ক'রে মেটেনি সে খবরও সে জানে। কিন্তু তবু তাকে যেতে হবেই। পূজার ছুটির দু'দিন আগেই এক মাসের জন্তে বিনা মাইনের ছুটি নিয়ে সে বেরিয়ে পড়লো।

ছুটির দু'দিন আগে, তবু ভিড় বেশ। কিন্তু ওরই মধ্যে কোন রকমে একটু বসবার জায়গা সে ক'রে নিল এবং বর্ধমানের পৌছবার আগেই পাশের লোকটির সঙ্গে বেশ আলাপ জমিয়ে নিলে। সে যাবে আরও দূরে, পাটনা ছাড়িয়ে।

লোকটি ভালো। মেছুয়াবাজারে তার কয়লার দোকান আছে। রামজীর রূপায় মন্দ চলে না। ছেলে লায়েক হয়েছে। ছ'মাস ধরে তাকে দোকান চালানো শিখিয়ে, সে এখন দেশে চললো। এখন আর ফিরবে না।

দামড়িরামের রঘুয়ার কথা মনে হ'ল। মনে হ'ল সে-ও বুড়ো হয়ে আসছে, শরীরে আর বল নেই তেমন। মাঝে মাঝে মাথা ঘোরে। একটুতে ক্লান্ত হয়। তারও যেন বিশ্রাম নেবার সময় হয়ে আসছে।

মনে হ'ল রঘুয়াও তার লায়েক হয়েছে। নিজের হাতে সে চিঠি লিখতে পারে। ন'দশ বছর বয়সও তো নিতান্ত কম নয়। স্থির করলে ফেরার সময় তাকে কলকাতা নিয়ে আসতে হবে। লেখা

পড়া যা হয়েছে ওতেই হবে। এবার সাইকেল চড়া শেখাতে হবে। কোন কাগজের আপিস কোথায় চেনাতে হবে। সঙ্গে ক'রে ক'রে ঘোরাতে হবে। মাঝে মাঝে খবরের কাগজও বিক্রী করাতে হবে। এ সবের সময় কম লাগবে না। তার শরীর মজবুৎ থাকতে-থাকতেই এ সব শেখানো দরকার।

না, আর বিলম্ব করা চলবে না।

খবরের কাগজ বিক্রীতে 'নফা' কম নয়। বহুলোক শুধু খবরের কাগজ বিক্রী ক'রে 'লাল' হয়ে গেছে। নসিবে থাকলে রঘুয়ার পক্ষে লাল হওয়াও অসম্ভব নয়।

সন্ধ্যা অনেকক্ষণ হয়ে গেছে। অন্ধকারের মধ্য দিয়ে হু-হু শব্দে ট্রেন ছুটে চলেছে।

দামড়িরামের তন্দ্রা আসছিল। আশা, আনন্দ, স্বপ্নে ভরা সুন্দর তন্দ্রা। তারই মধ্যে ট্রেন চলেছে তার নিজের আনন্দে।

যখন ট্রেন কিউলে পৌঁছলো তখন পাশের সেই কয়লাওয়ালার ধাক্কায় তার ঘুম ভাঙলো। আর কয়েকটি স্টেশন পরেই তার নিজের গ্রামের স্টেশন।

কিন্তু উঠতে চেষ্টা ক'রেও দামড়িরাম উঠতে পারে না। তার মাথাটা কে যেন প্রচণ্ড জোরে বেঞ্চের উপর চেপে ধরেছে। কে যেন তাকে আঁঠেপৃষ্ঠে বেঁধে ফেলেছে।

তার প্রবল অর। চোখ রক্তবর্ণ। কিন্তু জ্ঞান আছে।

ট্রেনের সহযাত্রীরা ব্যস্ত হয়ে উঠলো।

—সঙ্গে কেউ আছে ?

কেউ নেই। কিন্তু ভরসা আছে, স্টেশনে নামিয়ে দিলে সে যেতে

পারবে। স্টেশনের পাশেই তার গ্রাম। চেষ্টা করলে হেঁটেই যেতে পারবে। নয় তো কারও কাঁধে ভর করে। তার লোকের অভাব হবে না।

জিনিসপত্র সঙ্গে বেশী কিছু ছিল না। সহযাত্রীরা ধরাধরি ক'রে তাকে নামিয়ে দিলে। সঙ্গে সঙ্গে তার পোটলাটিও। তার ফাঁক দিয়ে দেখা যাচ্ছে, লাল সাটিনের পায়জামার একটা প্রান্ত।

কয়লাওয়ালা সহাস্ত্রে জিজ্ঞাসা করলে, সাহেব-জাদাকো ?

দামড়িরাম হেসে বললে, হ্যাঁ জি। মেরে গরিব-জাদাকো।

সে তখন ঠক ঠক ক'রে জরের ধমকে কাঁপছে। দাঁড়াবার সামর্থ্য নেই। ট্রেন চলে গেল। পুটলিটিকে কোলে ক'রে সেইখানে প্র্যাটফর্মের উপরই ব'সে পড়লো।

স্টেশনের লোকেরা ধরাধরি ক'রে তাকে স্টেশনে নিয়ে এসে একটা বেঞ্চে গুইয়ে দেয়। তার বাড়ীতে খবর দিতে আপনার লোকরা ছুটতে ছুটতে এল। আলুথালু বেশে এল লছমনিয়া।

তখনও দামড়িরামের জ্ঞান আছে।

পুঁটলির একপ্রান্তে ঊকি দিচ্ছে লাল সাটিনের পায়জামা। সেই ইঙ্গিত ক'রে লছমিয়াকে বললে, রঘুয়াকো।

রঘুয়ার পায়জামা দেখবামাত্র লছমনিয়া আর নিজেকে সম্বরণ করতে পারলে না। একটা অব্যক্ত শব্দ ক'রে মুচ্ছিত হয়ে পড়ে গেল।

দামড়িরাম প্রথমটা লাল চোখ মেলে সকলের দিকে অবাক হয়ে চাইতে লাগলো। কিন্তু ব্যাপারটা বুঝতে তার দেরি হল না। পুঁটলিটা হাত থেকে নীচে পড়ে গেল।

একুশ দিন পরে যখন তার জ্ঞান হ'ল, তখন সে নিজের ঘরে মলিন কাঁথায় শুয়ে।

চারিদিকে চোখ মেলে চেয়ে কি যেন মনে করবার চেষ্টা করলে, কিন্তু পারলে না। শ্রান্তভাবে চোখ বন্ধ করলে।

ঘরের কোণে একটি মাকড়সা নূতন শিকারের জন্তে তার জালখানা গভীর মনোযোগে রিপু করছিল।

## একাকিনী

ডক্টর ঞ্বেশ দত্ত বিলেত থেকে এম, আর, সি, পি, ডিগ্রী নিয়ে ফিরে এল যেদিন, তার ছ'মাস পরেই ক'লকাতার মেডিকাল কলেজে চাকরী পেল। যারা ঞ্বেশকে চেনে, তারা বলবে এতে খুশি হবার কিছু নেই। ক'লকাতা মেডিকাল কলেজের সমস্ত পরীক্ষায় সে ফার্স্ট হয়েছে। বিলেতের পরীক্ষার ফলও তার খুব ভালো। সে যদি স্বাধীনভাবে প্র্যাকটিস করতো তাহ'লে আরও অনেক বেশী টাকা রোজগার করতে পারতো। নামও হোত ঢের বেশী।

কিন্তু ঞ্বেশকে যারা জানে, তারা বলবে, এই ঠিক হয়েছে। স্বাধীন-ভাবে প্র্যাকটিস করতে গেলে যে সময়ানুবর্তিতা, অর্থের প্রতি আকর্ষণ এবং আরও আনুযঙ্গিক অনেক কিছুর প্রয়োজন, তা তার মোটেই নেই। সে ঢিলাঢালা স্বভাবের লোক। প্র্যাকটিস করার যোগ্যতা তার নেই। তার যোগ্যতা গবেষণা কাজে। আহার-নিদ্রা ভুলে ঘণ্টার পর ঘণ্টা সে পড়ে যেতে পারে, কিম্বা ল্যাবরেটরীতে গবেষণা করতে পারে। এ কাজে যে অবসরের প্রয়োজন, তা চাকরীতেই মিলতে পারে। সেই কথা বুঝেই সে মেডিকাল কলেজে চাকরী নিলে।

তার অন্তরঙ্গ বন্ধুরা বললে, ঞ্বেশ ভালোই করেছে। তার কাছে চিকিৎসা-বিজ্ঞানের অনেক প্রত্যাশা আছে।

চাকরী পেয়ে ঞ্বেশ মেডিকাল কলেজের কাছাকাছি একটা ছোট বাড়ী নিলে। সে অবিবাহিত। চিকিৎসা-বিজ্ঞানের মুখ চেয়ে বিবাহ



করবে না স্থির করেছে। নিজের সমস্ত জীবন এবং সমস্ত মনোযোগ অথওভাবে গবেষণাতে নিয়োগ করাই তার সঙ্কল্প। সুতরাং ছোট বাড়ীই তার যথেষ্ট।

উপরে তিনখানি ঘর। একটিতে সে শোয়, একটি তার ল্যাবরেটরী, আর একটা প'ড়েই আছে। নিচে একটা বসবার ঘর আছে। কিন্তু সেখানে বসে কমই। তার বন্ধু-বান্ধবের সংখ্যা অল্প। যারা দেখা করতে আসে তাদের সংখ্যা আরও অল্প। সুতরাং নিচের বসবার ঘরে নামবার প্রয়োজন ক'চিৎ হয়। বিশেষ তার সময়ের বেশিভাগ কাটে মেডিকাল কলেজেই।

এই ছোট বাড়ীতে একটি ঠাকুর এবং একটি চাকর নিয়ে তার সংসার।

ঠাকুর যে খুব ভালো রাঁধে তা নয়। চাকর যে ঘর-দোর খুব পরিষ্কার রাখে তাও বলা যায় না। কিন্তু ঞ্জবেশের সুবিধা এই যে, সে রান্নার জহরী নয়। ক্ষুধার সময় যা-হোক কিছু পেলেই তার শান্তি। এবং ঘর-দোর যতই অপরিষ্কার থাক, খেটেখুটে এসে বাইরের দিকের বারান্দায় ইজি চেয়ারটা পেতে বসতে পেলেই তার শান্তি।

এমনি করে তার দিন চলে।

ইতিমধ্যে একটা অঘটন ঘটলো।

শীতের রাত্রি। একে অন্ধকার রাত্রি, তায় ব্ল্যাক-আউট। তার উপর ফিস্‌ফিস্‌ বৃষ্টি পড়ছিলো। পথ বিজন। দোকান পাট বন্ধ। ক'লকাতা সুখসুখ। কোনো বাড়ীর খড়খড়ির ফাঁক দিয়েও এতটুকু

আলো আসছিল না। ব্যাফ্ল ওয়ালের অন্তরালে ভিখারীরাও নিশ্চিন্তে নিদ্রা যাচ্ছিল।

কলেজে একটা জরুরী কাজ সেরে ফ্রবেশ গলি পথে বাড়ী ফিরছিল। কাছেই বাড়ী। টর্চের আলোয় পথ দেখে দেখে হেঁটেই আসছিল।

হঠাৎ সামনের খোলা জমিটার ওদিকের কোণে মনে হ'ল শাদা মতো কি যেন একটা পড়ে রয়েছে।

প্রথমে সে খেয়াল করলো না। কিন্তু আবার একবার টর্চের আলোটা পড়তেই মনে হ'ল, কি ওটা?

নিজের বাড়ীর সামনে এসে ফ্রবেশ দাঁড়ালো। সেখান থেকে জায়গাটা দূরে নয়। দরজার কড়া নাড়বার আগে আর একবার আলোটা ফেললে।

শাদা মতো কি একটাই বটে। পুঁটলি নয়, তার চেয়েও বড়।

ফ্রবেশ কড়া নাড়তেই চাকর চোখ মুছতে মুছতে এসে দরজাটা খুলে দিলে। কিন্তু ফ্রবেশ তখনই বাড়ীর ভিতর ঢুকলো না। আর একবার সেদিকে আলোটা ফেললে।

চাকরটাকে বললে, দেখ তো, ওটা কি পড়ে রয়েছে?

একে মাঘের শীত। তার কনকনে হাওয়া দিচ্ছে এবং ফিস্‌ফিস্‌ বৃষ্টি। এমনতরো আবহাওয়ায় তার কৌতূহলও মিইয়ে গিয়েছিল। তবু বাধ্য হয়ে যেতে হ'ল।

কিন্তু গিয়ে যা দেখলে, তাতে তার কণ্ঠস্বর বন্ধ হয়ে গেল।

কোনোক্রমে বললে, শিগগির আসুন।

ফ্রবেশ গিয়ে দেখে একটি স্ত্রীলোক। সর্ব্বাঙ্গে কাপড় জড়িয়ে পড়ে আছে। দেহ কাঠের মতো শক্ত হয়ে গেছে।

চাকরটা ফিস ফিস করে বললে, মরে গেছে নাকি ?

ঋবেশ উত্তর দিলে না। সেইখানে হাঁটুগেড়ে বসে অতি সম্ভর্পণে প্রথমে নাড়ী, তারপরে বুকের স্পন্দন পরীক্ষা করলে।

বললে, মরেনি। এক কাজ কর দিকি। একে ধরাধরি করে বাড়ীতে নিয়ে যেতে হবে।

তাই হ'ল।

ঋবেশের কাছে ব্র্যাণ্ডি ছিল। চাকরটাকে একটু দুধ গরম ক'রে আনতে বললে।

ঘরের উজ্জ্বল আলোয় ঋবেশ দেখলে, মেয়েটির বয়স বেশি নয়, কুড়ি-একুশ। হাতে দু'গাছি পিতলের চুড়ি। পরণে মিলের আটপোরে শাড়ি। সিঁথিতে সিন্দূর নেই। বিধবাও হতে পারে, কুমারীও হতে পারে।

অনেক চেষ্টায় বহুক্ষণ পরে তার জ্ঞান হ'ল। কিন্তু খুব দুর্বল। তখনও তার কথা বলবার শক্তি নেই। সে যে কে, কোথা থেকে আসছে, এই বর্ষণসিক্ত শীতের রাত্রে কেনই বা মাঠের মধ্যে পড়ে ছিল, কিছুই জানা গেল না। কেবল বোঝা গেল, মেয়েটি ভদ্রঘরের।

একখানি ঘর ঋবেশের বাড়তি ছিল। সে রাত্রেই মতো সেইখানে তার শোবার ব্যবস্থা করা হ'ল।

পরের দিন সকালে ঋবেশের কলেজে ডিউটি ছিল। একটু চা খেয়েই সে বেরিয়ে গেল। মেয়েটির সঙ্গে তার দেখা হ'লো না। শুধু চাকরকে জিজ্ঞাসা করে জানতে পারলে, মেয়েটি উঠেছে, চা খাচ্ছে।

কলেজ থেকে ঞ্বেশ যখন ফিরলে তখন বেলা বারোটা বেজে গেছে।  
 নান ক'রে এসে সে খেতে বসলো।

ঠাকুরকে জিজ্ঞাসা করলে, মেয়েটির খাওয়া হয়েছে ?

—না, বাবু।

—সে কি ! এখনও খাওয়া হয়নি ?

—কিছুতেই খেতে চাইলেন না বাবু। বললেন, আপনার খাওয়া  
 হলে পরে খাবেন।

ঞ্বেশ আর কিছু বললে না।

খাওয়ার পরে ঞ্বেশের একটু দিবানিদ্রার অভ্যাস আছে,—  
 পেনেরো-কুড়ি মিনিটের জন্তে। কিন্তু গত রাত্রে ভালো ঘুম না  
 হওয়ায় নিদ্রা থেকে যখন উঠলো, তখন তিনটে। পশ্চিমের জানলার  
 বহু রঙের কাচের ভিতর দিয়ে বহু রঙের আলো এসে পড়েছে তার  
 বিছানায়।

এত দেরী তার বড় একটা হয় না।

কিছুকাল থেকে সে একটা কঠিন গবেষণায় ব্যস্ত আছে। বাতজ্বরের  
 পর ছোট ছোট ছেলেমেয়েদের যে হৃদরোগ হয়, তাই তার গবেষণার  
 বিষয়। এখনও পর্যন্ত এই রোগের কারণ নিশ্চয় ক'রে জানা যায়নি।  
 কেউ বলেন, *Streptococcus rheumaticus*, কেউ বলেন অণুবীক্ষণেও  
 দেখা যায় না এমনতরো সূক্ষ্ম একটা virus, কেউ বলেন allergy এর  
 জন্তে দায়ী। ঞ্বেশ এই নিয়েই গবেষণা করছে।

ঞ্বেশ ধড়মড় ক'রে বিছানা ছেড়ে উঠলো।

এই সময়টা সে নিজের ল্যাবরেটরীতেই কাজ করে। তাড়াতাড়ি মুখ  
 হাত ধুয়ে তারই জন্তে প্রস্তুত হ'ল।

তার সাড়া পেয়ে চাকরটা এসে দোরগোড়ায় দাঁড়ালো ।

ঋবেশ বললে, ঠাকুরকে চা তৈরী করতে বল ।

একটু ইতস্ততঃ করে চাকরটা বললে, ঠাকুর তো নেই বাবু ।

—কোথায় গেল ?

—কাপড় কিনতে ।

—এই সময় কাপড় কিনতে ? তুই চা তৈরী করতে পারিস ?

দরজার অন্তরালে মুখ সরিয়ে নিয়ে গিয়ে সে লজ্জিতভাবে হাসলে ।

উড়িয়া থেকে এসে এই ক' বছরে সে অনেক কিছু শিখেছে । কিন্তু চা তৈরীটা তার কিছুতেই আসে না । হয় হালকা হয়, নয় কড়া হয় । হয় চিনি বেশী হয়, নয় কম হয় । কিছুতেই ঠিকমতো হয় না ।

হঠাৎ ঋবেশের মেয়েটির কথা মনে পড়লো ।

ইঙ্গিতে জিজ্ঞাসা করলে, কি করছে রে ?

—পড়ছেন ।

ঋবেশ আর কিছু বললে না । এপ্রনটা গায়ে দিয়ে ল্যাবরেটরী চলে গেল ।

কিছুক্ষণ পরে ঠুকঠাক শব্দে চমকে পিছন ফিরে দেখে, মেয়েটি এসে দাঁড়িয়েছে । তার এক হাতে চাষের পেয়ালা, অগ্নি হাতে খাবারের থালা ।

ঋবেশ চাইতেই সে জিজ্ঞাসা করলে, এগুলো কোথায় রাখব ?

উঁচু টুলটা থেকে ঋবেশ নেমে এল ।

ঘরের এক পাশে একটা ইজি চেয়ার আছে । ক্লান্ত হ'লে সেইটেয় ব'সে সে বিশ্রাম করে । পাশে একটা টিপয় । ঋবেশ টিপয়ের উপর চা আর খাবার রাখতে বললে ।

মেয়েটি সেগুলো নামিয়ে রেখে নিঃশব্দে দাঁড়িয়ে রইল।  
 ঋবেশও ইজি চেয়ারে বসে নিঃশব্দে খাবার খেতে লাগলো।  
 একটু পরে জিজ্ঞাসা করলে, আপনি কি আমাকে কিছু বলবেন?  
 মেয়েটি যেন শক্তি সঞ্চয়ের জন্তে দরজার পাশে দেওয়ালে ঠেস  
 দিয়ে দাঁড়ালো।

তারপর বললে, আমাকে আপনি বাঁচালেন কেন?  
 প্রশ্নের ধরণে এবং কণ্ঠস্বরের বলিষ্ঠতায় ঋবেশ চমকে উঠলো।  
 বিহ্বল দৃষ্টিতে মেয়েটির দিকে সে চেয়ে রইল। পরশে তার লাল  
 চওড়া পাড়ের একখানা মিলের শাড়ী। সম্ভবতঃ এইখানা কিনতেই  
 ঠাকুর বাইরে গিয়েছিল। মাথার চুল এলো ক'রে পিঠে ছড়ানো।  
 নিরাভরণ দুটি বাহু কোলের কাছে নিবদ্ধ। চোখ যেন জ্বলছে।

বিহ্বলতার ধাক্কা কাটিয়ে ঋবেশ হাসলে। বললে, শোনেননি আমি  
 ডাক্তার। মানুষকে বাঁচানোই তো আমার পেশা।

মেয়েটি হাসলো না। বললে, তাই। নইলে মানুষ হিসাবে আমাকে  
 বাঁচাতে চাইতেন না।

ঋবেশ বিস্মিতভাবে বললে, কেন? মানুষ কি মানুষকে বাঁচায় না?

—সব মানুষকে নয়। অন্ততঃ আমাকে নয়। আমার বাঁচবার  
 কোন সার্থকতা নেই।

—এ কথা বলছেন কেন?

—বলছি এইজন্তে যে, আমার ইতিহাস আপনি কিছুই জানেন না।  
 জানলে নিশ্চয়ই আমাকে বাঁচাতে চাইতেন না।

ঋবেশ চায়ের পেয়ালাটা টিপয়ের উপর ঠক করে নামিয়ে রাখলে।  
 বললে, তবুও চাইতাম।

—সমস্ত ইতিহাস জানলেও ?

বিরক্তভাবে ঞ্বেশ বললে, আপনি বার বার ইতিহাসের কথা বলছেন কেন ? আমি এইটুকু জেনেছি যে আপনি শিক্ষিতা, ভদ্রমহিলা, আমার শ্রদ্ধার পাত্রী। এর বেশী কোনো মহিলার সম্বন্ধে আর কি জানবার থাকতে পারে ?

মেয়েটি ঞ্বেশের মুখের উপর থেকে স্থির দৃষ্টি নামিয়ে নিয়ে নিঃশব্দে দাঁড়িয়ে রইল।

কিছুক্ষণ পরে বললে, আচ্ছা আমার সম্বন্ধে জানবার যেন কিছুই রইল না। ডাক্তার হিসেবে না হয় আমাকে বাঁচিয়েও তুললেন। কিন্তু এইবার আমাকে কোথায় পাঠাবেন ?

—যেখানে আপনি ইচ্ছা করবেন।

—আমার কোথাও যাওয়ার ইচ্ছা নেই। কোথাও যাওয়ার জায়গাও নেই।

এবারে ঞ্বেশ একটু থমকে গেল। বললে, কেন, যেখানে ছিলেন ?

—অবলাশ্রমে ? সেইখান থেকেই তো মরণ পণ ক’রে পালিয়ে এসেছি।

—তাহ’লে বাপের বাড়ী ? কিম্বা...

—আর কিম্বা নেই। একমাত্র বাপের বাড়ীই আছে। কিন্তু সেখানকার দরজা বন্ধ। আপনি কি জানেন না, অবলাশ্রমে কারা এসে আশ্রয় নেয় ?

এতক্ষণে ঞ্বেশ ব্যাপারটা বুঝলে।

বললে, জানি। তাহ’লে কি করতে চান ?

—মরতে চাই।

—সে তো আছেই। তাছাড়া ?

—তাছাড়া আর কি করতে পারি বলুন ? কিছু লেখাপড়া করেছি। কিন্তু সে এমন কিছু নয়, যার জোরে একটা মাষ্টারীও পাওয়া যেতে পারে। আর যুবতী মেয়ের অর্থোপার্জনের একমাত্র যে পথ তার চেয়ে মৃত্যু ভালো।

ঋবেশ একটি সিগারেট ধরিয়ে নিঃশব্দে টানতে লাগলো।

অনেকক্ষণ পরে বললে, তাছাড়াও পথ নিশ্চয় আছে। যদি নাই থাকে, আপনি আমার এখানেই থাকতে পারেন।

—আপনার এখানে ?—মেয়েটি বিস্মিতভাবে বললে,—আপনি আমাকে যাবজ্জীবন খেতে-পরতে দেবেন ?

—দিলামই বা।

—কেন দেবেন ?

ঋবেশ এবার আঁবার বিরক্ত হ'ল। বললে, এমন কি কেউ দেয় না ? মনে করুন, আমার খেয়াল।

মেয়েটি এবারে হেসে ফেললে। বললে, আপনার যেন খেয়াল। কিন্তু অকারণে সে অর্থ আমি নোব কি ক'রে ?

ঋবেশ একটু ভেবে বললে, অকারণে নিতে আপত্তি থাকে, কাজ করেই নেবেন। অনেক কাজ আপনি করতে পারেন। দেখছেন আমার খাওয়া-দাওয়া ঘর-দোরের অবস্থা। এর পেছনে খাটবার আছে। আমার কাগজপত্র যেরকম অগোছালো থাকে সেগুলো গোছাতেও আপনাকে অনেক খাটতে হবে। বিলেতে যাকে বলে house keeping, আপনি সেই কাজের ভার নিতে পারেন।



মেয়েটি কি যেন ভাবলে। বললে, তা যেন নিলাম। কিন্তু আপনার স্ত্রী কি তা পছন্দ করবেন ?

স্ত্রীর প্রসঙ্গে ধ্রুবশ হো হো ক'রে হেসে উঠলো।

বললে, যার অস্তিত্ব নেই তা নিয়ে দুর্ভাবনা করতে একমাত্র মেয়েরাই পারেন। কিন্তু আর নয়, আমার অনেক সময় আপনি নষ্ট করেছেন। এবারে দয়া করে যান।

ধ্রুবশ উঠে দাঁড়ালো।

মেয়েটির নাম লীলা।

লীলা রইলো এবং অল্পদিনের মধ্যেই থাকার সার্থকতা প্রতিপন্ন করল। ধ্রুবশ তার স্বাভাবিক অসামান্য অল্পমনস্কতা সত্ত্বেও বুঝলে, ঘরদোরের শ্রী ফিরেছে, কাপড়-জামা ভদ্র হয়েছে, দরকারী কাগজ-পত্র এখন আর হারায় না এবং আহাৰ্য্যের স্বাদ বদলেছে। এমন কি তার নিজের চেহারাতেও পরিবর্তন এসেছে।

এতে সে খুশি হ'ল,—নিজের জন্তেও এবং লীলার জন্তেও। এক জোড়া তীক্ষ্ণ চক্ষু সকল সময়েই তার সুখ-সুবিধার জন্তে সতর্ক হয়ে আছে, এই উপলব্ধির একটা বিশেষ আনন্দ আছে। এখন অনেক রাতে বাড়ী ফিরতেও তার আনন্দ লাগে। ঘুমন্ত ঠাকুর-চাকরকে কড়া নেড়ে নেড়ে জাগাতে হয় না। লীলা জেগেই থাকে। দরজায় জুতোর শব্দ পেলেই হাসিমুখে দরজা খুলে দেয়।

অনুযোগ করে, অনেক রাত্রি হয়েছে।

ধ্রুবশ বলে, মোটে একটা। কিন্তু আপনি জেগে আছেন কেন ?

—নইলে আপনি খেতে দেবেন কেন ?

যুমন্ত ঠাকুর-চাকরের দিকে অঙ্গুলী দেখিয়ে সিঁড়িতে উঠতে উঠতে ঙ্গবেশ বলে, খেতে তো ওদেরও দিচ্ছি। ওদের তো সেজন্তে যুমতে অঙ্গুবিধা হয় না।

ঘরের মধ্যে খাবার টেবিলটা মুছতে মুছতে লীলা জবাব দেয়, ওদের কথা ছেড়ে দিন। ওদের দশ দোর খোলা আছে। কিন্তু আমাকে আপনি তাড়িয়ে দিলে যাব কোথায় ?

—সে একটা কথা বটে !

লীলা একটা আশ্চর্য্য ভঙ্গীতে ওর দিকে কটাক্ষ হেনে বলে, এইবার পোষাক ছাড়ুন। আপনার খাবার আনছি। দুটো খেতে দিচ্ছেন বলে আর বেশী কষ্ট দেবেন না।

পোনেরো মিনিটের মধ্যে লীলা খাবার নিয়ে আসে।

—এখনো গরম আছে দেখছি।

লীলা লজ্জায় মুখ ফিরিয়ে নেয়।

—এও বোধ হয় দুটো খাওয়া পরার বিনিময়ে ?

—আবার কি ?

ঙ্গবেশ বলে, হঁ।

সপ্তাহ দুয়েক পরে ঙ্গবেশ পোষাক পরে কলেজে বেরুবে এমন সময় চাকরটা এসে একটা চিরকুট দিলে।

—কি এটা ?

চাকরটা বললে, দিদিমণি দিলেন।

পড়ে ঙ্গবেশ দেখে একটা ফর্দ। দরজা জানালায় তার পর্দার বালাই  
কোনোকালেই নেই। তারই জন্তে কয়েক গজ কাপড় প্রয়োজন।

ঙ্গবেশ বিহ্বলচিত্তে বললে, সর্বনাশ কাও! কোথায় তোর দিদিমণি?  
লীলা এসে বললে, কি বলছেন?

ঙ্গবেশ হাতের ফর্দটা তুলে বললে, এ সব কোথায় পাওয়া যায়?

—সে আমি কি জানি? কোথাও পাওয়া যায় নিশ্চয়ই। নইলে...

—নইলে লোকেরা জানালায় পর্দা লাগায় কি করে? আচ্ছা,  
সে না হয় আমি জেনে নোব। কিন্তু বিকেলের দিকে আপনার কি  
অবসর আছে?

—আছে বললে কি মাইনে কেটে নেবেন?

ঙ্গবেশ বললে, নেওয়াই নিয়ম। কিন্তু এক্ষেত্রে তার ব্যতিক্রম হবে।  
শুভ্রন, আজ বিকেলের দিকে আমি বরং একটু সকাল সকাল ফিরব।  
আপনি তৈরী থাকবেন। দুজনে গিয়ে কিনে আনা যাবে। আমার এ  
সম্বন্ধে কোনো পছন্দই নেই।

—বেশ।

এই প্রথম ঙ্গবেশ ওকে নিয়ে বেড়াতে বেরলো।

এর দিন কয়েক পরে, রাত্রি তখন অনেক, বাইরে ঝিপঝিপ বৃষ্টি  
হচ্ছিল। ঙ্গবেশ খাটে শুয়ে শুয়ে বই পড়ছিল।

দরজার বাইরে থেকে লীলার কণ্ঠস্বর শোনা গেল, আসতে পারি?

—নিশ্চয় পারেন।—ঙ্গবেশ ধড়মড় করে উঠে বসলো।—ওটা কি?  
কফি? বাঃ!

কফির পেয়ালাটা নামিয়ে রেখে লীলা বললে, ঝিপঝিপ বৃষ্টি পড়ছে।  
ঘুম এল না। বাইরে এসে দেখি, আপনার ঘরে আলো জ্বলছে।

ভাবলাম, এ সময়ে এক পেয়ালা কফি খাওয়াতে পারলে আপনি নিশ্চয় খুশি হবেন।

ঋবেশ হেসে বললে, খুব খুশি হয়েছি। সত্যি কথা বলতে কি, খোলা বই সামনে নিয়ে কি যেন ভাবছিলাম। কি যে ভাবছিলাম, সে আমিও জানি না। এখন বুঝছি, এই কফির কথাই ভাবছিলাম। কিন্তু আপনি ঘুমোননি যে ?

—বুষ্টির রাত্রে কিছুতেই আমার ঘুম আসে না।

—আশ্চর্য্য তো !

—আশ্চর্য্যই বটে। এমনি এক বুষ্টির রাত্রে একজনের হাত ধরে ঘর থেকে বাইরে এসেছিলাম। আবার এমনি একটা বুষ্টির রাত্রে আর একজনের সঙ্গে একদিন বাইরে থেকে ঘরে এলাম। বোধ করি, সেই জন্তেই এমন হয়।

ব'লে অল্প দিকে চেয়ে এমন এক রকম ক'রে লীলা হাসলে যে, কেমন একটা অস্বস্তিতে ঋবেশের মুখের হাসি মিলিয়ে গেল।

গম্ভীরভাবে বললে, ও সব কথা মনে ক'রে লাভ নেই। রাত্রি অনেক হয়েছে। শুতে যান।

—হ্যাঁ যাই।

ব'লে লীলা শ্রান্তভাবে উঠে দাঁড়ালো। ঋবেশের মনে হ'ল, একটা মস্ত বড় দীর্ঘশ্বাস প্রবল চেষ্টায় চেপে সে যেন চ'লে গেল।

দরজা বন্ধ ক'রে আলো নিভিয়ে দিয়ে ঋবেশ গুয়ে পড়লো।

শীত শেষ হয়ে বসন্ত এল এবং তার পরে গ্রীষ্মকাল। গরম বেশি পড়েনি। সবে গরমের আমেজ দিয়েছে।

সন্ধ্যার পরে ওদের বিলেত-ফেরৎ ডাক্তারদের একটা ডিনার পাটি

ছিল। ঞ্বেশ বলেই গিয়েছিল, তার ফিরতে রাত হবে। স্ততরাং চিন্তার কারণ ছিল না। পার্টি থেকে ও গেল ওর একটি বন্ধুর বাড়ী। সেখান থেকে যখন ফিরলো তখন রাত্রি একটা।

চাকরটা বোধ করি লীলার বিশেষ হুকুমে দরজার কাছেই গুথে ছিল। কড়া নাড়তেই দরজা খুলে দিলে।

—তোদের সব থাওয়া হয়েছে ?

—হ্যাঁ বাবু।

ঞবেশ শিষ দিতে দিতে উপরে চলে এল। তার শোবার ঘরের জানালা দিয়ে আলো জ্বলছে দেখে তার ধারণা হ'ল, লীলা এখনও জেগেই আছে। কিন্তু দরজা খুলেই সে দাঁড়িয়ে পড়লো।

লীলা তারই শোবার ঘরে আছে বটে, কিন্তু জেগে নয়, ঘুমিয়ে এবং তারই বিছানায়। মাথার উপর পাখাটা অল্প অল্প ঘুরছে। তারই হাওয়ায় ওর শাড়ী চঞ্চল হয়ে উঠেছে। শ্বাসপ্রশ্বাসের সঙ্গে সঙ্গে ওর তনুদেহ আন্দোলিত হচ্ছে। ঘরের ভিতরকার ব্ল্যাক-আউটের অবগুষ্ঠিত আলো ওর ঈষদ্ব্যক্ত বৃকে এ বিচিত্র রঙের শাড়ীর উপর এসে পড়েছে।

ঞবেশ আর দাঁড়িয়ে থাকতে সাহস করলে না। অত্যন্ত সন্তর্পণে দরজা বন্ধ করে ল্যাবরেটরী ঘরে ফিরে এল। কেনন যেন ওর ভয় হ'ল। লীলার চোখের দিকে চাইলে এখন মাঝে মাঝেই ওর ভয় হয়। লীলার চোখে কিসের যেন ক্ষুধা।

তবু এর আগে আর কোনো দিন লীলা তার বিছানায় এসে শোয়নি।

ঞবেশ ল্যাবরেটরী ঘরের দরজা ভিতর থেকে বন্ধ করে দিয়ে ইজিচেয়ারে ফিরে এল এবং এক সময় ঘুমিয়ে গেল।

পরদিন সকালে লীলা যখন চা নিয়ে এল, ঞ্বেশ তখন ওর মুখের দিকে চাইতে পারছে না।

নতমুখে লীলা বললে, কাল ভারি লজ্জা দিয়েছেন।

—কেন ?

লীলা সে প্রশ্নের আর উত্তর দিলে না। বললে, সত্যি কথাই বলি, আপনার বিছানাটা দেখে ভারী লোভ হ'ল। ইচ্ছা হ'ল একটু শুই। ভেবেছিলাম, আপনার সাড়া পেলেই উঠে পড়ব। কিন্তু চুরি ধরা পড়ে গেল। এমনই ঘুমিয়ে পড়লাম যে, কখন আপনি এলেন, কখনই বা চলে গেলেন, টেরই পেলাম না।

জড়িতকণ্ঠে ঞ্বেশ বললে, আপনি ঘুমুচ্ছেন দেখে আর জাগালাম না।

—এখানে শুতে আপনার খুব কষ্ট হয়েছে।

ঞ্বেশ তাড়াতাড়ি বললে, কিছুমাত্র না। এ আমার খুব অভ্যাস আছে। কাজ করতে করতে কত রাত্রি যে এখানেই ঘুমিয়েছি তার ইয়ত্তা নেই।

লীলা বললে, ওটা বাজে কথা। আসলে কেন যে আমাকে আপনি জাগাননি সে আমি জানি।

—কি জানেন ?

—জাগাতে গেলে পাছে আমার গায়ে হাত নিতে হয় বলেই জাগাননি।

—কক্ষণো না।

নয় ?—লীলা কোতুকভরে ওর দিকে চাইলে এবং অনাবৃত একখানি হাত ওর দিকে বাড়িয়ে দিয়ে বললে,—আচ্ছা, আমার গায়ে হাত দিন তো দেখি।

ঋবেশ রীতিমতো দমে গেল। ওর গলায় টোষ্টের একটা টুকরো  
কিছা কি যেন আটকে গেছে।

অস্পষ্ট স্বরে বললে, সে আর এমন কি ?

—কিছুই নয়। কিন্তু সেও আপনি পারেন না।

ঋবেশ কোথায় যেন খোঁচা খেলে।

বললে, পারি না ?

—না। দিন তো দেখি ?

ঋবেশ টপ্ ক'রে আগুলের প্রান্ত দিয়ে ওর বাহুর একস্থান স্পর্শ  
ক'রে বললে, এটো তো দিলাম।

কিন্তু সে-হাত আর সরিয়ে নিতে পারলে না। লীলা খিল খিল ক'রে  
হেসে ওর হাত নিজের দুই মুঠোর মধ্যে শক্ত ক'রে চেপে ধ'রে বললে,  
এইবার ! এ হাত যদি না ছাড়ি, কি করবেন ?

ঋবেশের সমস্ত শরীর তখন অবশ হয়ে এসেছে।

শুধু বললে, বাঃ !

লীলার চোখে ধীরে ধীরে একটা হতাশ বিষণ্ণ দৃষ্টি ফুটে উঠলো।  
আন্তে আন্তে ওর হাতটা ছেড়ে দিয়ে বেরিয়ে গেল।

দুপুরে কলেজ থেকে খুব ভয়ে ভয়েই ঋবেশ ফিরে এল।

খাবার সময় লীলা তার সামনে এল না। তাতে সে আরও ভয়  
পেয়ে গেল।

চুপি চুপি চাকরকে জিজ্ঞাসা করলে, তোদের দিদিমণি কোথায় রে ?

—তিনি তো চলে গেছেন বাবু ?

মুখের ভাত ঋবেশের গলায় আটকে গেল।

—সে কি ?

—তাই তো গেলেন বাবু। জিগ্যেস করলাম, কেন যাচ্ছেন দ্বিদিগি ? বললেন, যেতে তো একদিন হ'তই সুবল। পরের বাড়ীতে তো বেশিদিন থাকা যায় না। তার চেয়ে এখন যাওয়াই ভালো।

ঋবেশ নিঃশব্দে চেয়ে রইল।

চাকরটা বলতে লাগলো :

—কিছুই নিয়ে যাননি বাবু। এক বস্ত্রে গেছেন। কেবল আলমারী খুলে দশটা টাকা নিয়ে আঁচলের খুটে বাঁধলেন। হাসতে হাসতে বললেন, দশটি টাকা নিয়ে গেলাম। তোমার বাবুকে বোলো সুবল, এ বোধ হয় আর শোধ করার সুযোগ হবে না।

চোখের জল গোপন করার জন্তে সুবল দ্বারের অন্তরালে মুখ সরিয়ে নিলে। বললে :

—বলে গেলেন, তুমি তো বাবুর পুরাণো চাকর সুবল, বাবুকে তুমি ভালোবাসো। তোমাকেই বলে গেলাম, আমি নেই বলে বাবুর খাওয়ার যেন অযত্ন না হয়।

ঋবেশ হঠাৎ জিগ্যেস করলে, কোথায় গেছেন জানিস ?

—কিছুতেই বললেন না বাবু।

ঋবেশের খাওয়া হ'ল না। মুখ-হাত ধুয়ে বিছানায় বসে একটা সিগারেট ধরালে। বিছানায় শুলো, কিন্তু চোখে ঘুম এল না। একটি মেয়ে নিরাপদ নিশ্চিত আশ্রয়, সসন্মান জীবনযাত্রা ছেড়ে একাকিনী কোথায় বেরিয়ে গেল, কেনই বা চ'লে গেল। এই প্রশ্ন যতই ভাবে কিছুতেই এর আর কিনারা করতে পারে না।



## জগিতা

আকাশ সকাল থেকেই মেঘাচ্ছন্ন।

রবিবারের সকাল। কাজের কোনো তাড়া ছিল না। বাইরের সঞ্চরণশীল জনতার দিকে চেয়ে নিঃশব্দে বসে ছিলাম। কিছুই ভালো লাগছিল না।

এমন সময় মেঘের ফাঁক থেকে বিদ্যাতের মতন সেই জনতার ভিতর থেকে বেরিয়ে এল নবেন্দু। পথ থেকে একেবারে আমার ঘরের মধ্যে।

নবেন্দু মোটা মাইনের সরকারী কর্মচারী। আয়েসী লোক। এমন একটা মেঘাচ্ছন্ন সকালে সে যে কোনো কারণেই বেরুতে পারে, ভাবতেও পারিনি। তাকে লেখে আমি যুগপৎ বিস্মিত এবং পুলকিত হয়ে চীংকার করে উঠলাম!

—কি ব্যাপার! নবেন্দু? তুমি? এই বাদলার দিনে? বসো, বসো।

হাতের ছাতাটা বন্ধ করে নবেন্দু সন্তর্পণে ঘরেব একটা কোণে রাখলে। তারপর পাশের চেয়ারে বসে হাসলে।

বললে, মেয়েটার জন্তে ক’টা টুকিটাকি জিনিস কেনবার ছিল। তাই এদিকে এসেছিলাম। ভাবলাম, অনেক দিন তোমার সঙ্গে দেখা নেই, এতদূর এলাম যদি, একবার দেখাটা করে যাই।

—বেশ করেছ। একটু চা খাবে? ওরে...

চায়ের কথা বলে দিলাম ।

নবেন্দু বললে, তাছাড়া তোমার সঙ্গে দেখা করবার বিশেষ দরকারও ছিল ।

সে মিটিমিটি হাসতে লাগলো ।

বললাম, বলে ফেল ।

বললে, তোমার “পাছনিবাস” বলে একখানা বই আছে না ?

—আছে বোধ হয় । তারপরে ?

—বইখানা পড়লাম ।

—বল কি হে ! এ যে আমার কাছে একটা দস্তুরমত সংবাদ ! তুমি নিজে পড়লে ?

—ঠাট্টা করছ ?

—ঠাট্টা নয় । বাঙালী কলেজ থেকে বেরিয়ে বই বড় একটা ছোঁয় না । যারা ছোঁয়, তারা ইংরাজি বই-ই ছোঁয় । এ অবস্থায় কেউ একখানা বাঙলা বই পড়েছে শুনলে চমকে উঠতে হয় । কিনে পড়লে ?

নবেন্দু বললে, না, কিনে নয় । গৃহিণী পাড়ার লাইব্রেরির মেম্বার । সেদিন দুপুরে ঘুম আসছিল না । হাতের কাছে বইখানা পেলাম । দেখলাম, তোমার লেখা । পড়তে বসলাম । কিন্তু তুমি একটা অন্তায় করেছে ।

অবিচলিতভাবে বললাম, সে আর আমার পক্ষে এমন একটা অসম্ভব কি ?

উত্তরের ভঙ্গিতে নবেন্দু হেসে ফেললে ।

বললে, আমাকেই নিয়ে বই লিখেছ । স্মরণ্য আমাকে এক কপি উপহার দেওয়া তোমার উচিত ছিল । যাক্গে । যা বলতে এসেছি শোন ।

নবেন্দু বলে কি ! ওকে নিয়ে বই লিখেছি ? ওর সঙ্গে তখন আমার পরিচয়ই ছিল না বোধ হয়। কিন্তু বইখানার প্লট আমার নিজেরই ভালো মনে আসছিল না।

নিরীহভাবে বললাম, বল।

—তপনের সঙ্গে শ্রামলীর ফের দেখা হয়েছে।

নবেন্দু আবার আগের মতো মিটিমিটি হাসতে লাগলো।

গল্পের প্লটটা মনে করবার চেষ্টা করতে করতে বললাম, বল কি হে ! কোথায় ?

—দেওবরে। দিন পনেরো আগে।

—Good. এ যে চমৎকার একটা গল্পের প্লট। তারপর ? সে যে অনেক দিনের কথা। চিনতে পারলে ?

—আমি পারিনি। পারা সম্ভবও নয়। ওর সেই ছিপছিপে চেহারা আর নেই। বেশ স্থূল হয়েছে। অনেকগুলি ছেলেমেয়ে দেখলাম। মুখের সেই ছেলেমানুষী ভাবও আর নেই। কেমন একটা গাঙ্গুীর্ষ এসেছে। চোখের দৃষ্টিতেও আর সেই চঞ্চলতা নেই। তাতেও একটা প্রশান্তি এসেছে।

নবেন্দু আবার হাসলে।

বললে, তাতো আসবেই। অনেক দিন হয়ে গেল যে। সেও ছেলেমানুষ থাকতে পারে না, আমিও না। কিন্তু ও আমাকে ঠিক চিনেছিল। পথে দেখা। পাশ কাটিয়ে চলে আসছিলাম। জিগ্যেস করলে, মাষ্টারমশাই না ? চমকে উঠলাম। কোনোকালে যে মাষ্টারি করেছি, তাও আর মনে পড়ে না। কিন্তু তখনই চিনতে পারলাম।

জিজ্ঞাসা করলাম, তারপরে ?

নবেন্দু বললে, বলছি। কিন্তু তোমার চা কোথায় ?

চা ? চায়ের কথা শ্রামলীর শেষটুকু শোনবার আগ্রহে ভুলেই গিয়েছিলাম।

তাড়াতাড়ি বললাম, দাঁড়াও দেখি।

চা এল। সঙ্গে আরও কিছু কিছু অল্পপান। বোঝা গেল, এই জন্মেই চা দিতে দেরি হচ্ছিল।

সেগুলো ওর দিকে এগিয়ে দিয়ে রুদ্ধনিশ্বাসে প্রশ্ন করলাম, তারপরে ?

নবেন্দু বলতে লাগলো :

সেখান থেকে আমাকে ও ওর বাড়িতে টেনে নিয়ে গেল। মন্ত বড় বাড়ি। অনেক চাকর-বাকর। সুন্দর স্বাস্থ্যবান ছেলেমেয়ে। ঘরের মধ্যে মূল্যবান আসবাবপত্র। ওর নিজেরও গায়ে এক-গা গহনা। দেখলাম, বেশ আঁছে। বড় মেয়েটির বিয়ে দিয়েছে কোথাকার এক রায়-বাহাদুরের ছেলের সঙ্গে। বড় ছেলে স্কুলে পড়ছে। আর কি চাও ?

চায়ের পেয়ালায় চুমুক দিয়ে নবেন্দু আমার দিকে চেয়ে হাসলে।

আমি নিঃশব্দে জিজ্ঞাসু দৃষ্টিতে ওর দিকে চেয়ে রইলাম।

নবেন্দু আবার বলতে লাগলো :

মহামুশ্কিলে পড়েছে। স্বামী কলকাতার অনারারী ম্যাজিস্ট্রেট। তাঁর কলকাতা ছেড়ে যাওয়ার উপায় নেই। ডাকের গোলমালে চিঠিপত্রও নিয়মিত পাচ্ছে না, টেলিগ্রামও নাকি সময়ে পৌঁছচ্ছে না।

বললে, কি করি বলুন তো মাষ্টারমশাই ? সেই ডিসেম্বরে এসেছি। এখানকার এই দ্রুত গরমও কাটিয়েছি। কিন্তু এখন চিঠিপত্র না

পাওয়ার ফলে যেন আরও অসহ্য হয়ে উঠেছে। কেমন আছে সব, তাই বা কে জানে ?

আমার সামনে স্বামীর সঙ্কটে আগ্রহ প্রকাশ করেই ও যেন হঠাৎ লজ্জিত হয়ে পড়লো।

বললাম, ভাবছ কেন ? ভালোই আছেন। দেখছ তো চারদিকের অবস্থা।

—সেই তো মুশ্কিল হয়েছে। মাঝে মাঝে ইচ্ছা করে, সবশুদ্ধ কলকাতা পালাই। কিন্তু ঠিক এই সময়েই রেল বন্ধ হল।

—সেই ত আরও মুশ্কিল।

—এমন করে আরও কতদিন থাকতে হবে বলতে পারেন ?

হেসে বললাম, জানি না।

বললে, টাকাপয়সা হু হু করে উড়ে যাচ্ছে। সে যাকগে। কিন্তু এই দেখুন, ছেলেটার পড়া একেবারে বন্ধ। দিনরাত্তির বাগানে প্রজাপতির পিছনে ছুটোছুটি করছে।

—এখানে কি টিউটর পাওয়া যাচ্ছে না ?

—তা যাবে না কেন ? একটা রেখেছি ও ত্রিশ টাকা মাইনে দিয়ে। কিন্তু যাই বলুন না কেন, আমিতো দেখছি স্কুল না থাকলে ছেলেদের পড়া হয় না।

—সে ঠিক।

—মাষ্টার সকালে-সন্ধ্যায় আসেন, পড়িয়ে যান। আর সমস্ত ছুপুর ওরা বাগানময় দাঁপাদাঁপি করে বেড়ায়।

—এর উপর আবার উনি ঠিক করেছিলেন, বড় মেয়েটিকেও এখানে আনতে। ভাগ্যিস সে আসেনি। আমি কোনো রকমে আছি, কিন্তু সে কেঁদে-কেটে অনর্থ করত।

এ বিষয়ে আমার কিছু বলবার ছিল না। চুপ করে রইলাম।

ও জিজ্ঞাসা করলে, বাবা মারা গেছেন শুনেছেন বোধ হয় ?

—নিশ্চয়। হঠাৎ মারা গেলেন, না ?

—হঠাৎ ঠিক নয়। ভুগছিলেনই। তবে এত শিগ্গির যাবেন, তা কেউ ভাবিনি। ছোট ভাইটি বিলেতে। আমি কলকাতায়। মা একা বাবাকে নিয়ে মধুপুরে। টেলিগ্রাম পেয়ে আমরা যেদিন গেলাম তার পরের দিনই মারা গেলেন।

শ্রামলী একটা দীর্ঘশ্বাস ফেললে। আমিও নিঃশব্দে বসে রইলাম।  
মিথ্যে সাঙ্ঘন্যার কথা কি বদব ?

তখনই ও ভিতরে চলে গেল এবং একটু পরে চা নিয়ে উপস্থিত হল।

তখন সব সন্ধ্যা।

শ্রামলী হাসতে হাসতে বললে, আপনি কিন্তু আমাকে চিনতে পারেননি।

লজ্জিতভাবে বললাম, না।

—খুব মোটা হয়ে গেছি ?

—খুব না। তবু...

—তবু হয়েছে অনেকটা। সে তুলনায় আপনার পরিবর্তন ঢের কম।  
আমি দেখেই চিনেছিলাম।

—চিনতে আমিও পারতাম। আসল কথা...

বাধা দিয়ে ও বললে, যাক্গে। আসল কথাই জিগ্যোস্ করা হয়নি।  
কোথায় উঠেছেন ?

এতক্ষণ পরে আমার একটা হাসবার উপলক্ষ হ'ল।

বললাম, সে একটা হাসির কথা। এখানে আমারও একটা ছোট

বাড়ি আছে। ডিসেম্বরে আমিও মেয়েছেলে পাঠালাম। তারপরে আজ শীত, কাল গরম, পরশু বৃষ্টি—এমনি করেই চলছিল। ইতিমধ্যে ট্রেন বন্ধ হয়ে গেল। চিঠি লিখি, জবাব পাই না। টেলিগ্রাম করি, তারও সেই অবস্থা। অবশেষে ক’দিনের ছুটি নিয়ে বেরিয়ে পড়লাম। তারপরে কেমন করে এলাম জানো?

আমার কথা ও যে ভালো করে শুনছিল, তা মনে হল না।

অশ্রুমনস্কভাবে মাথা নেড়ে বললে, না।

—খানিকটা রেল, খানিকটা মোটর বাসে, বাকিটা হেঁটে!

নিজের রোমাঞ্চকর অভিযানে গর্বিতভাবে হাসলাম।

ও বললে, খুব কষ্ট হয়েছে তো তাহলে?

বললাম, তাই কি কষ্টের শেষ হয়েছে? এসে দেখি বাড়ি খালি।

মালী বললে, এক বাবু এসে মা-জীদার দুমকা নিয়ে গেছেন। সেখানে আমার শালা থাকে। বুঝলাম, ব্যাপার দেখে সেই এসে নিয়ে গিয়েছে।

শ্রামলী ব্যস্তভাবে উঠে পড়লো।

বললে, সে কি! তাহলে এখানেই আপনি থাকেন। বেশ লোক তো আপনি!

আমি বাধা দিয়ে বললাম, না, না। কিছু দরকার হবে না। শোন, বলছি...

ও কিন্তু ফিরেও চাইলো না। ভিতরে চলে গেল।

একটু পরে ফিরে এসে বললে, আপনার বাসাটা কোথায় বলুন? মালী গিয়ে খবর দিয়ে আসবে, বাসায় আপনি আর ফিরবেন না।

ব্যস্তভাবে বললাম, সে কি ! কাল সকালেই আমাকে দুমকা যেতে হবে যে !

—বেশ তো, সকালেই যাবেন ।

শ্রামলী একজেরী ছোটবেলা থেকেই ।

গল্প ক্রমেই জমে আসছে ।

বললাম, আর এক পেয়ালা চা হোক নবেন্দু ?

নবেন্দু বললে, আপত্তি নেই । কিন্তু এবারে যেন আর অনুপান না থাকে ।

আমি উঠছিলাম । কিন্তু পর্দার অন্তরালে চুড়ির শব্দে বুঝলাম, তার প্রয়োজন নেই ।

সিগারেটের টিনটা এগিয়ে দিয়ে বললাম, তার পরে বল ।

নবেন্দু বলতে লাগলো :

খাওয়ার সময় শ্রামলী কাছে বসে যখন খাওয়াতে লাগলো, তখন বেশ লাগছিল ।

খাওয়া-দাওয়ার পরে শোবার ঘরে খাটে এসে বসে সিগারেট খাচ্ছি, একটু পরে পান মুখে নিয়ে শ্রামলী এল ।

খাটের থেকে দূরে একটা নীচু টুলে বসে বললে, আপনার সঙ্গে আর কখনও যে দেখা হবে স্বপ্নেও ভাবিনি । খুব আশ্চর্যভাবে দেখা হয়ে গেল, না ?

—সত্যি । তোমার কথা আমি কিন্তু অনেক সময় ভেবেছি ।

শ্রামলী হেসে ফেললে ।



বললে, মিথ্যে কথা রাখুন। ছেলেপুলে কি ?

—দুটি ছেলে, দুটি মেয়ে।

—মেয়েটি বড় ?

—না ছেলেটি।

—পড়ছে ?

—হাঁ।

—বড় মেয়ের এখনও বিয়ের বয়স হয়নি ?

—না।

—দুমকাতাই কি আপনার খুঁজরবাড়ি ?

—না, শালা সেখানে চাকরী করেন।

শ্রামলী এ প্রসঙ্গে আর কিছু জিজ্ঞাসা করলে না।

আমি হেসে জিজ্ঞাসা করলাম, আমাদের বিয়ে হবে না শুনে, কী কান্না তুমি কেঁদেছিলে মনে আছে ?

—আর আপনি ?

—আমিও কেঁদেছিলাম।

ও অন্তরিকে চেয়ে কি যেন মনে করে হাসলে।

বললে, এখন মনে হয় ছেলেমানুষী, না ?

—হ্যাঁ।—আমিও হাসলাম।

আমার সামনের টিপয়ে ডিবে-ভর্তি পান এবং এক কোটো জর্দা।

বললে, আপনি পান খাচ্ছেন না যে ?

—পান তো আমি বেশি খাই না।

—জর্দা ?

—একেবারেই না।

—কিন্তু আগে খুব খেতেন মনে হচ্ছে যেন।

—তোমার ভুল হচ্ছে।

কি যেন চিন্তা করে শ্রামলী বললে, তা হবে। আপনার আগে আর একটি বুড়ো মাষ্টার ছিলেন, তিনিই খেতেন বোধ হয়। যেদিন পড়ায় ফাঁকি দেওয়ার ইচ্ছে হ'ত, তাঁকে প্রচুর পান জর্দা ঘুস দিয়ে নিষ্কৃতি পেতাম।

শ্রামলী হাসতে লাগলো।

বললে, ঠিক। আপনি নয়, সেই বুড়ো মাষ্টার। অথচ আপনি খেতেন ভেবে এক কোটো জর্দা আনালাম।

জিজ্ঞাসা করলাম, বৌদিকে তোমার মনে পড়ে?

—বাঃ, তাঁকে মনে পড়বে না? কেমন আছেন তিনি?

—বছরখানেক হ'ল মারা গেছেন।

—মারা গেছেন! আহা! কি হয়েছিল? ছেলেপুলে কি?

—টাইফয়েড, হয়েছিল। ছেলেপুলে অনেকগুলি। বোধ করি, আট-ন'টি।

—আহা!

শ্রামলী নিঃশব্দে বোধ করি বৌদির কথাই ভাবতে লাগলো।

হঠাৎ বললে, আপনার দাদা কি আর বিয়ে করেছেন?

উত্তর দিতে লজ্জা পেলাম। মাথা নীচু ক'রে বললাম, মাস ছয় হ'ল করেছেন।

কিন্তু ও যেন তাতে কিছুমাত্র বিস্মিত বা বিরক্ত হ'ল না।

বললে, বেশ করেছেন। নইলে অতগুলি কাচা-বাচা নিয়ে বিব্রত হতেন।

তারপরই বললে, ছুমকা থেকে আপনি ক'লকাতা ফিরবেন তো ?

—ফিরতেই হবে। চাকরী।

বললে, আচ্ছা, ঠিকানা দিলে ঠাঁর সঙ্গে দেখা করার আপনার সুবিধা হবে ?

—কেন হবে না ?

—আর কিছু নয়, ঠাঁর আবার সায়টিকা আছে। যখন বস্ত্রণা আরম্ভ হয়, পাঁচ-সাতদিন অজ্ঞান হয়ে পড়ে থাকেন। কেউ তো নেই সেখানে। ঠাকুর আর চাকর। চোদ্দ দিন চিঠি পাইনি। ভাবছি, কেমন যে আছেন।

ও করুণনেত্রে আমার দিকে চেয়ে রইল।

বললাম, আমি গিয়েই দেখা করব। তুমি কিছু ভয় পেও না। ডাকের গোলমালেই বোধ হয়...

—আমারও তাই মনে হয়।

হঠাৎ পাশের ঘরে যেন একটা অব্যক্ত গোঙানির শব্দ উঠলো। আমি চমকে উঠেছিলাম।

শ্রামলী হেসে বললে, ও কিছু নয়। খোকাটা সারাদিন পাড়ার ছেলেদের সঙ্গে দুষ্টুমি করে। আর রাতে তাই স্বপ্ন দেখে চ্যাঁচায়। কিন্তু রাত হয়েছে, এবার আপনি ঘুমোন।

ও চলে যাচ্ছিল।

হঠাৎ ডাকলাম, শ্রামলী

আমার কর্ণস্বরে ও যেন একবার চমকে উঠলো। কিন্তু তখনই শান্তস্বরে বললে, না, আর শ্রামলী নয়। এবার ঘুমোন। রাত অনেক হয়েছে।

ঘড়িতে দেখি, রাত তখন দুটো। চারিদিক নিস্তব্ধ। শ্রামলীর ঘরের দরজা বন্ধ করার শব্দ পাওয়া গেল। ধমক-খাওয়া শিশুর মতো আমিও গুয়ে পড়লাম।

এই পর্য্যন্ত ব'লে নবেন্দু চুপ করল।

আমি জিজ্ঞাসা করলাম, এই শেষ? আর কিছু নেই?

নবেন্দু বললে :

পরের দিন সকালে যখন বেরুচ্ছি, আমার হাতে একখানা বই দিয়ে বললে, এটা নিয়ে যান।

দেখি রবীন্দ্রনাথের “ক্ষণিকা”। কুড়ি বছর আগে ওর জন্মদিনে খুব গোপনে উপহার দিয়েছিলাম।

ব্যথিত কণ্ঠে বললাম, ফিরিয়ে দিলে?

হেসে বললে, যাকে দেওয়া হয়েছিল সে কবে ফুরিয়ে গেছে। আমার কাছে পড়ে থেকে কি হ'ত?

বললাম, কিন্তু যে দিয়েছিল তাকেই বা খুঁজে পাচ্ছি কোথায়?

একটু ভেবে বললে, সে ঠিক।

বইখানা তার বড় ছেলেটিকে দিয়ে চলে এলাম।

নবেন্দু একটা সিগারেট ধরালে।

খানিক পরে বললে, আচ্ছা, তুমি তো বই-টাই লেখ। বলতে পারো মানুষকে ভালোবাসার কোনো অর্থ হয়?

আমি চুপ ক'রে রইলাম।

নবেন্দু বললে, মনে কর নদী। সে তো জল ছাড়া আর কিছুই নয়। কিন্তু সেই জল অহর্নিশি বয়ে চলেছে। তার ধারা বদলাচ্ছে। তেমনি তো মানুষ। প্রত্যেকটি মুহূর্ত তার এক একটি জীবন। ধর শ্যামলী। সেদিন তাকে চিনতেই পারলাম না। তাহ'লে কুড়ি বছর আগে সেদিন একান্ত করে যাকে ভালোবেসেছিলাম, সে কে? কোথায়ই বা গেল?

নবেন্দু আবার বললে, তাহ'লে কি বলবো ভালবাসা জীবধর্মের উপাদান ছাড়া আর কিছুই নয়? নইলে সেদিন রাত্রে অমন করে ওকে ডেকেছিলাম কেন?

এ কথারও উত্তর আমার জানা নেই। আমি চুপ করেই রইলাম।

## নহবৎ

জেল-গেট থেকে সুপ্রকাশ যখন বেরিয়ে এল, তখন বেলা দুটো।  
পরণে তার খদরের ধুতি পাঞ্জাবী, মাথায় গান্ধীটুপি।

ছ'মাস পরে সুপ্রকাশ বাইরের মুক্তির মধ্যে এসে দাঁড়ালো। গভীর  
বিশ্ময়ে একবার সে উল্কাকাশের দিকে, একবার সম্মুখের চলমান ট্রাম-  
বাসগুলির দিকে চাইলে।

দিনটা শারদীয়া পঞ্চমী।

আকাশের গায়ে লঘু শাদা মেঘের মন্থরতায় যেন ছুটির বার্তা লেখা  
আছে। জনতার চঞ্চলতায় সেই আনন্দ যেন ঝিলমিলিয়ে উঠেছে।  
চারিদিকে যেন কাজ শেষ করার অপরিসীম তাড়া পড়ে গেছে।

সুপ্রকাশ যেন কার প্রত্যাশায় একটু বিলম্ব করলে। কর্মব্যস্ত  
অপরিচিত জনতার মধ্যে কাকে যেন খুঁজলে।

কিন্তু মিথ্যে খোঁজা।

সে যে আজকে ছাড়া পাবে অসীমার তা জানার কথা নয়। বস্তুতঃ  
সকাল ন'টা পর্যন্ত সে নিজেই জানতো না, সে আজকে ছাড়া পাবে।  
হিসাব মতো তার ছাড়া পাওয়ার কথা লক্ষ্মীপূজার দিন। এ মুক্তি  
নিতান্তই অপ্রত্যাশিত।

সুপ্রকাশ তার জিনিসপত্র নিয়ে একটা ট্যাক্সিতে উঠে বসলো। এবং  
একটু পরেই একটা হোটেলে এসে উপস্থিত হ'ল।

কে জানে, অসীমা এখনও ক'লকাতায় আছে কি না। ওদের কলেজের ছুটি বোধ হয় আগেই হয়ে গেছে।

সুপ্রকাশ হাত-মুখ ধোওয়ার আগে তাঁকে টেলিফোন করতে গেল :

হ্যালো, অসীমা আছে ? আমি সুপ্রকাশ।

হ্যালো ! সুপ্রকাশদা ? কি আশ্চর্য্য ! কখন ছাড়া পেলেন তুমি ?

আধঘণ্টা আগে। শোন। আমি ভেবেছিলাম, তুমি চলে গেছ।

চলেই যেতাম সুপ্রকাশদা। এখন দেখছি, একসঙ্গে যাব' বলেই বোধ হয় আটকে গেছি। এক মিনিট দাঁড়াও।

সুপ্রকাশ দাঁড়িয়ে রইল। মনে হ'ল, অসীমা যেন কার সঙ্গে কথা বলতে গেল। একটু পরেই আবার তার কণ্ঠস্বর শোনা গেল :

হ্যালো, সুপ্রকাশদা, শোন।

বল।

মামীমা বলছেন, তুমি আজকে এইখানেই থাকবে। এখান থেকে আজকে সন্ধ্যার গাড়ীতে আমরা দুজনেই বাড়ী যাব। তুমি কোথায় উঠেছ ?

হোটেল।

তাহ'লে জিনিসপত্র নিয়ে তুমি এখনই চলে আসছ তো ? সময় বেশি নেই কিন্তু।

সুপ্রকাশ হাত-বড়িটা দেখলে। সময় বেশি নেই সত্যি।

বললে, কিন্তু জিনিসপত্র নিয়ে ?

আচ্ছা, থাক তাহ'লে। তুমিই এস। ষ্টেশনে যাওয়ার পথে ওগুলো নিলেই চলবে। দেরী কোরো না। বুকলে ?

যে আজ্ঞে।

সুপ্রকাশ রিসিভারটা নামিয়ে রেখে শিস্ দিতে দিতে বেরিয়ে এল। দেৱী হবার বিশেষ কারণ নেই। জিনিসপত্র সামান্যই। যা আছে তারও বাঁধন খোলা হয়নি। কেবল দাড়িটা কামাতে হবে। আর বেশ ক'রে সাবান মেখে স্নানটা করতে হবে। ছ'মাসের কারাজীবনে যে ক্লেশ তার দেহে-মনে সঞ্চিত হ'য়েছে, তা ধুয়ে ফেলা দরকার।

অসীমা থাকে মামার বাড়ীতে, এবং সেই বাড়ীটা সুপ্রকাশের অপরিচিত নয়। পরস্তু বহু সন্ধ্যা সেখানে তার কেটেছে। কতদিন সেখানে থাওয়া-দাওয়া ক'রেছে। অসীমার মামা এবং মামীমা তাকে বিশেষ স্নেহ করেন।

সুপ্রকাশ এবং অসীমা জানে না, কিন্তু স্নেহ নিতান্ত অকারণ নয়।

অসীমার চেয়ে এক বছরের বড় একটি মামাতো দিদি আছে। অল্পদিন হ'ল মেয়েটির বিয়ে হয়ে গেছে। কিন্তু তার আগে অসীমার মামা এবং মামী উভয়েরই দৃষ্টি সুপ্রকাশের উপর পড়েছিল। সুপ্রকাশ তখন সবে ক'লকাতার একটি কলেজে প্রোফেসরী পেয়েছে। সেই সময় অসীমার দিদিই গোপনে তার মাকে জানিয়েছিল, ও চেষ্টা নিষ্ফল। কারণ সুপ্রকাশ এবং অসীমা পরস্পরকে ভালোবাসে। মামী তাতে ছুঃখিত হননি। বরং আনন্দমিশ্রিত কোতুকই অনুভব ক'রেছিলেন। বিবাহের প্রস্তাব আর উত্থাপিত হয়নি।

ওরা দুজন কিন্তু তা জানতো না। বরং ওদের দুজনের ধারণা ওদের মনের গোপন কথা ওরা দুজন ছাড়া সংসারে আর কেউ জানে না। গোপনতার একটা রহস্য আছে। সেই রহস্যের জন্তে বহু লোকের মধ্যেও



পরস্পরের সাহচর্য্যে ওরা একটা অনির্কচনীয় বিশেষ আনন্দ উপভোগ করত।

অথচ সংসারে যারা অভিজ্ঞ ব্যক্তি, নিজের সংসার চালিয়ে এবং অত্নের সংসার চালাতে সাহায্য ক'রে গাঁরা মাথার চুল পাকিয়েছেন, তাঁদের কাছে ওদের দুজনের এই সম্পর্কের চেয়ে অবিশ্বাস্য এবং অসম্ভব ঘটনা আর কিছু নেই।

কেন বলি :

দেবীপুরের মুখ্যো এবং চাটুয্যে উভয় বংশই সম্মানিত এবং সম্ভ্রান্ত বংশ। মুখ্যোয়ারাই গ্রামের আদি জমিদার। সাত পুরুষ আগে এই বংশের হরিহর এবং ধনঞ্জয় দুই ভাই ছিলেন। দুই ভাই যখন পৃথক হলেন তখন হরিহরের তরফ বড় তরফ এবং ধনঞ্জয়ের তরফ ছোট তরফ নামে অভিহিত হ'ল। ধনঞ্জয়ের পুত্র সন্তান ছিল না। একটি মাত্র কন্যা। কন্যাটির তিনি বিবাহ দিলেন নিজ গ্রামের বিশ্বনাথ বাঁড়ুয্যের সঙ্গে। মুখ্যো বংশের অর্দ্ধেক সম্পত্তি বাঁড়ুয্যে বংশের হাতে চ'লে গেল, এটা মুখ্যোদের পক্ষে প্রীতির বিষয় হ'ল না। এই সময় থেকেই বিষয়-সম্পত্তি নিয়ে উভয় পরিবারে দাঙ্গা-হাঙ্গামা এবং গোলযোগ আরম্ভ হ'ল।

আরও দুই পুরুষ পরে বিশ্বনাথের পৌত্র শত্ৰুনাথও একটি মাত্র কন্যা সন্তান রেখে মারা গেলেন। মারা যাওয়ার পূর্বে তিনিও নিজ গ্রামের হরসুন্দর চাটুয্যের সঙ্গে মেয়ের বিয়ে দিয়ে গেলেন।

মুখ্যোদের অর্দ্ধেক সম্পত্তি আবার হাত বদলало,—বাঁড়ুয্যে বংশ থেকে চাটুয্যে বংশে। কিন্তু তাতে মুখ্যোদের মনোভাবের কোনো পরিবর্তন হ'ল না। গোলযোগ যেমন চলছিলো তেমনি চলতে লাগলো।

এখনও উভয় পরিবারের মধ্যে গোটা তিনেক জটিল মামলা তার জটিলতর অসংখ্য শাখা-প্রশাখা নিয়ে তিন কোর্টের মধ্যে ঘোরাঘুরি করছে।

বিষয়-সম্পত্তি ভাগ হয়ে গেছে। রক্তের সম্পর্কও ছিন্ন হয়েছে। কিন্তু মামলার অচ্ছেদ্য বন্ধনে উভয় পরিবার এখনও বাঁধা রয়েছে।

আরও একটি বন্ধন আছে। কুলদেবতা সিংহবাহিনী এবং তাঁর দেবোত্তর সম্পত্তির বন্ধন।

ধনঞ্জয় এবং হরিহর একটা ব্যবস্থা ক'রে গিয়েছিলেন যে, দেবোত্তর সম্পত্তি ভাগ হতে পারবে না। উভয় পরিবারে যিনি বয়োজ্যেষ্ঠ তাঁরই হাতে থাকবে দেবোত্তর পরিচালনার ভার।

আরও একটা ব্যবস্থা আছে। পৃথক কোনো দুর্গা প্রতিমা আনার বিধান নাই। পূজা সিংহবাহিনী দেবীরই হবে। দুর্গা পূজার সাধারণ পদ্ধতিতেই পূজা সম্পন্ন হবে।

এই ব্যবস্থা বিবাদ-বিসম্বাদ, মামলা-মোকদ্দমা সত্ত্বেও আজও বলবৎ আছে।

সুপ্রকাশ মুখ্যে বাড়ীর বর্তমান জমিদার হুযিকেশবাবুর একমাত্র পুত্র, এবং অসীমা চাটুয্যে বাড়ীর বর্তমান জমিদার ধূর্জটিবাবুর একমাত্র কন্যা।

সুপ্রকাশ কংগ্রেসের লোক। খদ্দর পরে, আন্দোলনের সময় জেলে যায় এবং অবসর সময়ে কংগ্রেসের কাজও কিছু কিছু করে। কিন্তু তাতে হুযিকেশবাবুর সম্মতি এবং সমর্থন নেই। বরং তাঁর মতের বিরুদ্ধেই করে।

হুযিকেশ, এবং ধূর্জটিবাবুও, জমিদার লোক। কখনও প্রজার সঙ্গে, কখনও তাঁদের নিজেদের মধ্যে ফোজদারী লেগেই আছে। হাকিম

থেকে আরম্ভ ক'রে দারোগা-কনেষ্টবল পর্য্যন্ত সকলেরই সঙ্গে তাঁদের মানিয়ে চলতে হয়।

সত্য কথা বলতে কি, এবারে হৃষিকেশবাবু এবং ধূর্জটি বাবু দুজনের মধ্যে একটি অনারারী ম্যাজিষ্ট্রেট পদ নিয়ে প্রতিযোগিতা চলছিলো। হৃষিকেশবাবুর সম্ভাবনাই বেশি ছিল। কিন্তু ভেস্টে দিলে সুপ্রকাশ।

যেদিন সুপ্রকাশের জেলের খবর এল হৃষিকেশ বাবুর কাছে, সেইদিন ধূর্জটিবাবুর কাছে এল অনারারী ম্যাজিষ্ট্রেটের নিয়োগপত্র। এবং সেইদিন সন্ধ্যায় যখন চাটুয্যেদের কাছারীতে বাজনা বাজিয়ে উৎসব সুরু হ'ল, হৃষিকেশবাবুর সন্দেহ রইল না যে, এই আনন্দের অর্ধেক অনারারী ম্যাজিষ্ট্রেটের জন্তে আর অর্ধেক সুপ্রকাশের জেলের জন্ত।

অগ্নিগর্ত পাহাড়ের মতো হৃষিকেশবাবু মনে-মনে গর্জন করতে লাগলেন। ধূর্জটিবাবু মুখ্যোদের কাছারীতে বড় একটা আসেন না। কিন্তু পরের দিন খুব ভক্তিভরে এসে হৃষিকেশবাবুর পায়ের ধূলা নিলেন।

হৃষিকেশবাবু উচ্চহাস্য ক'রে তাঁকে আলিঙ্গন করলেন।

বললেন, আরে বিলক্ষণ! ধূর্জটি, তুমি হ'লে গিয়ে একটা হাকিম লোক। কবে একদিন তোমার কাঠগড়ায় হাত জোড় ক'রে দাঁড়াতে হয়। আমি শুনেছি, সব শুনেছি। বোসো, বোসো।

ধূর্জটিবাবু বিনীতভাবে বললেন, কী যে বলেন দাদা। যা হয়েছে, সে আপনাদেরই পাঁচজনের আশীর্বাদে। কিন্তু এ কি শুনছি দাদা?

—কি শুনছ ভাই? হৃষিকেশবাবুর ললাটে ভ্রুকূটির রেখা মুহূর্তের জন্ত বৃদ্ধি বা পড়লো। কিন্তু তখনই মিলিয়ে গেল।

—সুপ্রকাশের নাকি জেল হয়েছে?

এবারে সকলকে সচকিত ক'রে হৃষিকেশবাবু অটুহাস্য ক'রে উঠলেন :

—এই ব্যাপার ! আমি ভেবেছিলাম, কি বুঝি বা দুঃসংবাদ আছে । হাঁ ভাই, সুপ্রকাশ আমাদের মুখ উজ্জ্বল ক’রে জেলেই গেছে । খবরটা শুনে ভাবলাম, তোমার নহবতের সঙ্গে আমিও এ কাছারীতে একটা নহবৎ জুড়ে দিই । কিন্তু...

সেয়ানে সেয়ানে কোলাকুলি ।

ধূর্জটিবাবু প্রথমটা চমকে গিয়েছিলেন । তার পর সামলে নিয়ে বললেন, কিন্তু আমাদের নিত্য হাকিম আর দারোগা নিয়ে কারবার । আমাদের ঘরে...

—এই কথা ! তুমি ঠিক ধরেছ । সেইজন্তেই তো নহবৎ আর বসলাম না । কিন্তু কথাটা কি জান ভায়া, আমাদের কারবার তো এবার গুটিয়ে আনার সময় হয়েছে ।

গভীরভাবে ধূর্জটিবাবু বললেন, তা তো বুঝলাম দাদা । কিন্তু সরকার সাহেব যা কড়া ম্যাজিস্ট্রেট, তিনি বোধ হয় এতে...

কিন্তু হাষিকেশবাবু যেন ধূর্জটিবাবুর কাছে হারমানবেন না পণ করেছেন ।

ধূর্জটিবাবুর মুখের কথাটা লুফে নিয়ে বললেন, খুশি হবেন না । তাও জানি । সেও এক পর্ব আছে, তাঁকে খুশি করা । কিন্তু আসল কথাটা কি জান...

হাষিকেশ যেন মস্ত বড় একটা গোপন রহস্য উদ্ঘাটন করবার জন্তে ভালো ক’রে নড়ে চড়ে বসলেন ।

বললেন, কথা আর কিছুই নয় । আমরা, মুখ্যোরা, তো দৌহিত্রসূত্রে জমিদারী পাইনি । এ আমাদের একদিন লাঠির জোরে দখল করে নিতে হয়েছে । লাঠি আর নেই, কিন্তু জোরটা যে এখনও রয়েছে, ছেলেদের রক্তে তার পরিচয় গেলে মনে বড় আনন্দ হয় । বুঝলে না ভায়া ?

ভায়া বুঝলেন কি না বোঝা গেল না। কিন্তু ‘দৌহিত্রসূত্রে’র উল্লেখ কে যেন তাঁর মুখে কালি লেপে দিলে।

তিনি উঠতে উঠতে বললেন, কি জানি দাদা, কি ক’রে আপনার হাসি আসছে। আমার তো শুনে পর্য্যন্ত মনটা ভালো নেই। দুধের ছেলে, কে জানে এতক্ষণ ঘানিই টানছে, না দড়িই পাকাচ্ছে, কথায় বলে জেল !

—ও কি ! উঠলে যে ! একটু চা খেয়ে যাও।

হাত জোড় ক’রে ধূর্জটিবাবু বললেন, আর একদিন এসে খাব দাদা। এ তো নিজেদেরই বাড়ী !

তিনি আর দাঁড়ালেন না।

হৃষিকেশবাবু আপন মনেই একটু কুটিল হেসে ভিতরে চলে গেলেন। বোধ করি, সরকার সাহেবকে কি ক’রে খুশি করা যায় তারই উপায় নির্দ্ধারণের জন্তে।

সুপ্রকাশ এবং অসীমা যখন ষ্টেশনে এসে পৌঁছুলো, তখন ট্রেন ছাড়ার বেশি দেরী নেই। ওরা টিকেট ক’রে একটা ইন্টার ক্লাশের কামরায় যখন বসলো, তার মিনিট দুয়েক পরেই ট্রেন ছেড়ে দিলে।

পঞ্চমীর দিন ভিড় বড় হয় না। ভিড়টা ষষ্ঠীর দিনই বেশি হয়। ওরা যে কামরায় এসে উঠলো, তাতে পাঁচ-ছ’জনের বেশি লোক ছিল না। কিছুদূর গিয়ে তারাও নেমে গেল।

চারিদিক চাঁদের আলোয় ফুট ফুট করছে। অল্প ঠাণ্ডা, মিষ্টি হাওয়া এসে যেন গায়ে হাত বুলোচ্ছে। লাইনের পাশের কাটিংএর জলে চাঁদ যেন নান করছে। হুলে হুলে কাশ ফুলগুলি যেন তাকে ডাকছে।

অসীমা জিজ্ঞাসা করলে, তুমি যাচ্ছ, বাড়ীর লোকেরা জানেন ?

সুপ্রকাশ হেসে বললে, কি ক'রে জানবেন ? আজ সকাল ন'টা পর্য্যন্ত আমি নিজেই জানতাম না। কিন্তু কি আশ্চর্য্য জানো, বেরিয়ে এসেই চারিদিকে চাইলাম তোমার খোঁজে। মনে হয়েছিল, যদি কোনো যাহুমস্ত্রে খবরটা জেনে তুমি উপস্থিত থাকো তো বেশ হয়।

—তবু তো পেলে আমাঘ। কিন্তু যদি আমি মহালয়ার দিনেই চলে যেতাম ?

সুপ্রকাশ উদ্ধাকাশের বাকা চাঁদ, ঢেউ-খেলানো সবুজ ধানের ক্ষেত, কাশবনের দিকে চাইলে। বললে, ভারি বিশ্রী লাগতো তাহ'লে।

—অথচ মহালয়ার দিন না যাবার কোনো কারণ ছিল না। মামীমার অসুখ। কিন্তু সে কিছুই নয়। অথচ রয়ে গেলাম। এখন বুঝছি কেন ?

—কেন বল তো ?

—কি জানি কেন ?—অসীমা জানালায় বাইরে চেয়ে হাসতে লাগলো।

অসীমা আবার বললে, এবারে তোমার শরীর ভালো দেখাচ্ছে না তো।

—না। তুমি যেদিন দেখা করতে গেলে তার পরেই জ্বর পড়েছিলাম। মোটে পাঁচ-ছ'দিন হ'ল পথ্যি করেছি।

একটা উদ্বিগ্ন দৃষ্টি ওর সর্করাগে বুলিয়ে অসীমা জিজ্ঞাসা করলে, তাহ'লে ? খবর দাওনি, পালকী আসবে না। অতর্খানি পথ এই শরীরে যাবে কি ক'রে ?

—যেমন ক'রে যাই। মানে হেঁটে। পালকীতে কি কখনও গিয়েছি যে, আজ যাব ?

—কিন্তু তোমার শরীর যে দুর্বল।

সুপ্রকাশ হাসলে। বললে, এই শরীরেও তোমার স্মার্টকেস, আমার স্মার্টকেস, এমন কি তার উপরে তোমাকে চাপিয়েও ওই পথটা হেঁটে যেতে পারি। তা জানো?

কিন্তু এতেও অসীমা আশ্বস্ত হ'ল না। বিরক্তভাবে বললে, জানি। তুমি খুব বীরপুরুষ!

অসীমা নিঃশব্দে জানালার বাইরে চেয়ে রইল। সুপ্রকাশ তার একখানি হাত ধীরে ধীরে ওর কাঁধের উপর রাখলে। কিন্তু অসীমা তাতে সাড়া দিলে না। তেমনি নিঃশব্দে বাইরে চেয়ে রইল।

একটু পরে অসীমা বললে, আচ্ছা সামনের ষ্টেশনে নেমে বাড়ীতে একটা টেলিগ্রাম ক'রে দিলে কখন পাবে?

—আমরা বাড়ী পৌছবার আধ ঘণ্টা পরে।

অসীমা রাগতে গিয়ে হেসে ফেললে। বললে, আমাদের বাড়ী পৌছতে আর কতক্ষণ লাগবে? এক ঘণ্টা? চমৎকার হবে। তোমার সামনে দিয়ে পালকী হাঁকিয়ে আমি চলে যাব। পিছু পিছু স্মার্টকেস মাথায় ক'রে তুমি এসো। আর ভাবতে পারি না। শুই একটু।

অসীমা ক্লান্তিভরে সেইখানে শুয়ে পড়লো।

সুপ্রকাশ ওর মাথাটা সম্মুখে নিজের কোলের উপর তুলে নিলে। অসীমা বাধা দিলে না। শুধু একটু হাসলো।

কিন্তু ষ্টেশনে যখন ওরা নামলো, অসীমা কিছুতেই পালকিতে উঠলো না। শুধু দুজনের স্মার্টকেস দুটো তাতে তুলে দিলে।

সুপ্রকাশ বললে, আর তুমি?

—আমি তোমার সঙ্গে হেঁটে যাব।

—চমৎকার! আর দু'জনেরই বাড়ীর কথা তো জানো।

অসীমা বিরক্তভাবে বললে, আমি কিছুই জানি না সুপ্রকাশনা।  
 হাঁটবার কথা ভাবতেই আমার বিরক্ত লাগছে। কিন্তু এই রাতে তোমাকে  
 একলা হেঁটে যেতে কিছুতেই দোব না। চলো।

ব'লে নিজেই আগে-আগে চলতে শুরু করলে।

গ্রামের স্বল্পবাস নিরীহগোছের লোকগুলিকে বাইরে থেকে দেখে যতটা  
 বোকা মনে হয়, আসলে ততটা বোকা তারা নয়।

ধূর্জটিবাবুর মেয়ের পক্ষে হৃষিকেশবাবুর ছেলের জন্তে এতখানি আগ্রহ  
 প্রকাশ, নির্জন মাঠের মধ্যে দিয়ে দুটি তরুণ-তরুণীর একেলা পথ-চলা তাদের  
 ওষ্ঠপ্রান্তে একটা ঝাঁক হাসি ফুটিয়ে তুললে। কথাটা গ্রামের মধ্যে পরের  
 দিনই রাষ্ট্র হ'ল। এবং দুই বাড়ীর কর্তার কানে পৌঁছতেও বিলম্ব হ'ল না।

তারা চেপে গেলেন। কিন্তু তাঁদের গৃহিণীরা শঙ্কিত হলেন। তাঁদের  
 শঙ্কা হ'ল প্রতিবেশিনীদের জন্তে। জিহ্বা এ সব ব্যাপারে সাধারণতঃই  
 অসতর্ক।

কথাটা সুপ্রকাশের এবং অসীমার কানেও গেল। সুপ্রকাশ বিরক্ত  
 হ'ল এবং অসীমা গ্রাহ্যই করলে না। সুপ্রকাশ এত বিরক্ত হ'ল যে,  
 মায়ের কাছে স্পষ্টই গিয়ে বললে, অসীমাকে সে বিয়ে করবে।

বললেন, বলিস কি রে! পাগল ছেলে! ঠুঁকে তো জানিস।  
 চাটুষ্যে বাড়ীর মেয়ে উনি কিছুতেই আনবেন না।

সুপ্রকাশ আর কিছু বললে না।

মহাসমারোহে সপ্তমী পূজা হয়ে গেল।

দেবোত্তরের পূজা। সেবাহিত হিসাবে হৃষিকেশবাবু এবং ধূর্জটিবাবু  
 উভয়েই পট্টবস্ত্র প'রে উপস্থিত থাকেন। পরস্পরের মধ্যে মৌখিক কোনো



বিরোধ নেই। দেখলে বোঝার উপায় নেই, তাঁদের মধ্যে গোটা দশেক জটিল মামলা চলছে।

ধূর্জটিবাবু বললেন, সূত্রকাশের শরীরটা বড় খারাপ দেখলাম।

—হঁ। বলছে, জ্বর হয়েছিল।

ধূর্জটিবাবুর মুখে একটা কুটিল হাসির রেখা খেলে গেল।

বললেন, সরকার সাহেব বলছিলেন...

এমন সময় টেলিগ্রাফ পিওন একখানা টেলিগ্রাম দিয়ে গেল।

সই ক'রে হৃষিকেশবাবু টেলিগ্রামটা পড়তে লাগলেন। সঙ্গে সঙ্গে তাঁর মুখ আনন্দে উদ্ভাসিত হয়ে উঠলো। টেলিগ্রাম পিওন তখনও দাঁড়িয়ে ছিল। হৃষিকেশবাবু তৎক্ষণাৎ চীৎকার ক'রে হুকুম দিলেন, ওকে ধুতি-চাদর আর পাঁচটা টাকা বকশিস দিতে।

ধূর্জটিবাবুর পক্ষে ধৈর্য্য রক্ষা করা ক্রমেই কঠিন হচ্ছিল।

জিজ্ঞাসা করলেন, কি ওটা?

হৃষিকেশবাবু টেলিগ্রামটা তাঁর সম্মুখে ফেলে দিলেন।

টেলিগ্রামখানা পড়তে পড়তে ধূর্জটিবাবুর মুখ কালো হয়ে উঠল। প্রভিকাস্টারের মামলায় হৃষিকেশবাবু খরচাসমেত ডিক্রি পেয়েছেন।

হৃষিকেশবাবু বললেন, এর জন্তে একটা নহবৎ বসানো উচিত। কি বল ভায়া?

ভায়া সাড়া দিলেন না।

হৃষিকেশবাবু তাঁর নিজের বাড়ীর ফটকে নহবতের হুকুম দিলেন।

কিন্তু তখনই একটা চাকর এসে বললে, গিন্নীমা ডাকছেন।

টেলিগ্রামটা গিন্নিকে দেখাবার জন্তে হৃষিকেশবাবু উঠলেন।

ধূজটিবাবুকে বললেন, একটু বোসো ভায়া। তোমার বৌদিদির তলব।  
অমান্ত করার তো জো নেই।

হাসতে হাসতে হৃষিকেশবাবু চলে গেলেন। রাত তখন দশটা।

গৃহিণী নিচেই ছিলেন। হৃষিকেশবাবুকে তিনি উপরে নিয়ে এলেন।

বললেন, সর্ব্বকাশ কাণ্ড! সূত্রকাশকে পাওয়া যাচ্ছে না।

—তার মানে?

—লক্ষণ এসেছিল। বলছে, তাকে আর অসীমাকে সে ন'টার  
গাড়ীতে উঠতে দেখেছে।

—বল কি?

গৃহিণী সাড়া দিলেন না। হৃষিকেশবাবুর হাতে তখনও টেলিগ্রামের  
গোলাপী কাগজখানা যেন হাসছে।

বাইরে নহবৎ বাজতে শুরু করেছে।

## তিন পুরুষের কাহিনী

মাহুঘের খেয়ালের অন্ত নাই। নহিলে অকস্মাৎ জুটমিল দেখিবার সঙ্কল্প করিয়া যে একদিন ট্রেনে চড়িয়া বসিব, একথা কে ভাবিয়াছিল !

ছিলাম প্রায় চার-পাঁচ জন। উঠিলাম এক বন্ধুর গৃহে। বন্ধুটি মিলেরই একজন উঁচুদরের কর্মচারী। তিনি মিলের সমস্ত তন্ন তন্ন করিয়া দেখাইলেন, আহাৰ্য্য দিলেন, পানীয় দিলেন, ত্রুটি কোথাও রাখিলেন না। স্তবরাং তাঁহাকে ধন্যবাদ।

হ্যাঁ, মিল বটে। প্রায় মাইল দুয়েক জায়গা জুড়িয়া যেন একটা নগর বসাইয়া দিয়াছে। বাবুদের বাসা, কুলিদের বাসা, রাস্তা, ঘাট, কলের জল, ইলেকট্রিক আলো কিছুই বাদ যায় নাই। একদিকে কয়েকটা বড় বড় হাতাওয়ালা বাংলো; সেগুলো শ্বেতাঙ্গ কর্মচারীদের জন্য,—যেন একদল ব্রাহ্মণ নিজেদের গুচিতা বাঁচাইয়া দূরে ফলাহারে বসিয়াছে।

লোকেরও সংখ্যা নাই। ওখানে কয়েকটা বাঙ্গালীবাবু ছিন্ন মলিন বস্ত্রে টেবিলে বসিয়া হিসাব কষিতেছে, আর কয়েকটা কাণে পেন্সিল গুঁজিয়া কণ্ঠাকর্তার মতো ছুটাছুটি করিতেছে। সেখানে কয়েকজন মাথা গুঁজিয়া গভীর মনোনিবেশের সঙ্গে চটের উপর নম্বর দিতেছে; দূর হইতে ভাবিয়াছিলাম, ইহারা বুঝিবা একটা কিছু আবিষ্কারের চেষ্টায় আছে। একদল মাদ্রাজী কুলি-রমণী দল পাকাইয়া সেদিক হইতে এদিকে আসিতেছে। সাহেব-বাবু-কুলী, স্ত্রী-পুরুষ, যেন একটা মেলা বসাইয়া দিয়াছে।

এই মিল ! যেন একটা দৈত্যের বিরাট প্রাণস্পন্দনের মধ্যে দাঁড়াইয়া হাঁফাইতেছে...

যেন একটা শ্রামসন্ দন্ধ চোখ দুইটা বৃজিয়া শক্তির অহঙ্কারে শিকল বাজাইতেছে...

যেন একটা সমুদ্র অধীর গর্জনে পৃথিবীর শিরায়-শিরায় নিজের প্রাণস্পন্দন সঞ্চারিত করিতেছে...

শ্রামসনই বটে ;—যেন একগাছি চুলের মধ্যে সমস্ত শক্তি লুকাইয়া রাখিয়া মহামানবকে দাঁত বাহির করিয়া ভেঙচাইতেছে ; বলিলাম,—  
বাঃ ! এই বটে,—প্রাণস্পন্দনের গোমুখী !

বন্ধু হাসিলেন,—যেনন হাসে ভোরের বেলায় পাণ্ডুর তারা—বলিলেন,  
—এই নয়, আরও আছে,—হাঃ হাঃ, প্রাণস্পন্দনের গোমুখী !

সত্য । আরও আছে ।

মিলের বাঁশী বাজিল,—বাঁশী তো নয়, যেন একটা ক্ষুধার্ত শকুনের আর্তনাদ !

ব্যাস্ ।

দৈত্যের প্রাণস্পন্দন থামিল...

শ্রামসনের শিকলের বন্ধনী বন্ধ হইল...

যেন ম্যাজিক !

খোলা গেট দিয়া হাজার হাজার স্ত্রী পুরুষ বাহির হইয়া আসিল । কী সর্ব্বনাশ ! একটা মস্ত পিঁজরাপোলের দ্বার খোলা পাইয়া দলে দলে মুমূর্ষু জানোয়ার পৃথিবীর বুকের উপর শোভাযাত্রা বাহির করিল না কি ?

যেন কলের কোলে সমস্ত রস নিঃশেষে নিঙড়াইয়া দিয়া হাজার হাজার ইক্ষুদণ্ড মাথায় পাগড়ী জড়াইয়া সান্ধ্য ভ্রমণে বাহির হইয়াছে ।

কী ভয়ানক ! যেন চুষিয়া খাইয়াছে !

বলিলাম,—এরা আবার কারা ?

বন্ধু উত্তর দিলেন না। দূরে গুটি পাঁচেক বাবলা গাছের আড়ালে  
সূর্য্য অস্ত যাইতেছিল, সেদিকে চাহিয়া রহিলেন।

এ দৃশ্য দেখা যায় না ; চোখ জ্বালা করে।

বলিলাম,—চল ঐ পুকুরটার ধারে একটু বসা যাক্ গে।

ছোট্ট পুকুর। এদিকে বাঁধান ঘাট ; ওদিকে কয়েকটা তালের গাছ পাখা  
নাড়িতেছে।

মন ভারি হইয়া গিয়াছে ; যেন বর্ষার ভিজা হাওয়া।

কথা কওয়া যায় না।

কয়েকটা লোক নিঃশব্দে পুকুরে পা ধুইয়া চলিয়া গেল।—গুধু জলের  
শব্দ হইল থল্ থল্।

একটু দূরে একটা প্রকাণ্ড বাড়ী হাড় বাহির করা একশো বছরের  
বুড়ার মতো ফোকলা দাঁত বাহির করিয়া দাঁড়াইয়া আছে।

এদিকে—ওদিকে—সেদিকে কয়েকটা আশ্রয়গড়ার ঝোপ ভানুকের  
মতো জ্বরের ঘোরে ধুঁকিতেছে।

চারিদিকে মাঠ ; দূরে দু'দিকে দুইটা মিল, রণশ্রান্ত ষাঁড়ের মতো  
গর্জন করিতেছে।

মাঠময় চাঁদের আলো ফ্যাল ফ্যাল করিয়া চাহিয়া আছে।

নিঃশব্দ।

বন্ধু বলিলেন,—এই পুকুরের ইতিহাস,—শুনবে ?

কথা कहিলাম না । বাড় নাড়িয়া জানাইলাম, শুনিব ।

দূরের পোড়ো বাড়ীটার দিকে চাহিয়া বন্ধু বলিতে লাগিলেন :

একশো বছর আগে চারিদিকে যতটা দেখা যায়, এবং সম্ভবতঃ, যতটা দেখা যায় না তারও খানিকটা ছিল রায় বাবুদের জমিদারী । দুর্দর্শ জমিদার ; যাদের ভয়ে বাঘে-বলদে এক ঘাটে জল খেত ।

তারও আগের ইতিহাস ? ঠিক জানিনে । তবে সে বোধ হয় ডাকাতি, কিম্বা লাঠির জোরের কাহিনী এমন একটা কিছু হবে । তাদের রক্তে ডাকাতের বীজ আছে । তাতেই মনে হয়.....

কিন্তু, সে যাক্ ।

একশো বছরের ইতিহাস,—ভালো জানা যায় না । ওই গাঁয়ের এক বুড়োর কাছে শোনা । তিন পুরুষের ইতিহাস সে জানে ।

বলে, মিল তো সেদিনে হোল বাবু ; সবাই দেখেছে । তখন এই সমস্তটা জায়গা ছিল জঙ্গল । দিনে লোকে যেতে ভয় পেত । তারও আগে ওখানে ছিল গাঁ । কতই বা লোক হবে ! ঘর কতক তাঁতী, কয়েক ঘর চাষী, কিছু বামুন-কায়েত ভদ্রলোক । চারিদিকে মাটির ঘর, খড়ের চাল, মধ্যেখানে বাবুদের প্রকাণ্ড বড় রাজবাড়ীর মতো বাড়ী । কিছুই তো রইল না বাবু ; রইল শুধু বাবুদের ওই জিরজিরে একটুকরো লালান আর ওই খিড়কীর পুকুরটুকু ।

বন্ধু চুপ করিলেন ।

রাত্রির কালো জলের উপর ঢেউয়ের লীলা ;—বেশ লাগে ।

ভাবিলাম, তাই বটে ! চারিদিকে পাটীল-ঘেরা ছোট্ট একটুখানি খিড়কীর পুকুর । হয় তো তখন ছিল পদ্মফুলে ভরা । বাবুদের বাড়ীর

সুন্দরীরা হয় তো ওইখানে বুক ডুবাইয়া বসিতেন। কোটি কোটি পদ্মের পরাগকণা ঢেউয়ের দোলায় হুলিতে হুলিতে বকে আসিয়া স্পর্শ করিত। খিড়কীর পুকুর ; লজ্জাই বা কি, মাথার-বুকের কাপড় যদি খুলিয়াই যায়। হয় তো ছোট্ট ছোট্ট ফুলের মতো থুকীরা ঘড়া নিয়ে ওই অতদূর অবধি সাতারও দিত। এই যে ঘাট, ইহার উপর আলতা-পরা কতগুলি চরণ পদ্মফুলের মতো শোভায়-শোভায় ফুটিয়া উঠিত, কে জানে। এই আলিসা, হয় তো সন্ধ্যার সময় চাঁদিনী রাত্রে ইহারই উপর বসিয়া কচি কচি বধুগুলি চুপে চুপে গত রাত্রে গল্প করিত। হয় তো, অনেক কথা শুনিয়াছে, এই ফুলে ভরা লেবুগাছটি। সেদিনও হয় তো এমনি করিয়া ইহার ফুলগুলি নিঃশব্দে বধুগুলির কবরীর উপর ঝরিয়াছিল। অতি মমতায়, সন্তর্পণে তাহার দুইটা পাতা স্পর্শ করিলাম।

অনেকক্ষণ পরে জিজ্ঞাসা করিলাম,—আর সেই বাবুৱা !

—সেই কথাই বলব ; বাবুদের শেষ তিন পুরুষের ইতিহাস। বলিয়া একটু থামিয়া বন্ধু ধীরে ধীরে বলিতে লাগিলেন :

শেষ দুর্দ্ধর্ষ জমিদার বলতে হোলে ব্রজেন্দ্রবাবুকেই বলতে হয়। লম্বা-চওড়া চেহারা, ফুটফুটে রং, গোঁফ দাড়ি কামানো। ছটি পাতলা ঠোঁট দৃঢ় সম্বন্ধ, উন্নত ললাট। বুড়োর কাছে শুনেছি।

বুড়া বলে, এমন গোঁয়ার দেখিনি, বাবু। জ্যান্ত মানুষ থামের সঙ্গে গেঁথেছে।—চুপি-চুপি বলে ; এখনও তার ভয় যায় নি।

শিহরিয়া উঠিলাম !

—জ্যান্ত মানুষ থামের সঙ্গে গেঁথেছে কি ?

—তাই গেঁথেছিল। কিন্তু, তাতে চমকাবার কিছুই নেই। সেকালে এমন ঘটনা বিরল ছিল না। বলতো, প্রজা শাসন না করলে জমিদারী চলে না। ব্যাপার এমন কিছুই নয়। ব্রজেন্দ্রবাবুর মেয়ের বিয়ে। একটি ছোকরা, বোধ করি সে কলকাতায় পড়ে birth right এর সন্ধান পেয়েছিল। গ্রামে ফিরে এসে প্রজাদের মধ্যে আন্দোলন চালাতে শুরু করলে। বল্লে, জমিদারের মেয়ের বিয়ে, তাতে প্রজা কেন তার খরচ বইবে? প্রজার মেয়ের বিয়ে হ'লে জমিদার তার খরচ বয়? জমিদার তাকে বাড়ীতে নিমন্ত্রণ করে নিয়ে এসে খুন করে একদম থামের সঙ্গে গেঁথে ফেলে।

আবার কেউ বলে.....কিন্তু, সে থাক্ গে, সে একটা অবৈধ প্রেমের কাহিনী, যার সঙ্গে জমিদার দুহিতার না কি সংশ্রব ছিল।

মোট কথা, এরই ফলে জমিদারের অর্ধেক সম্পত্তি বন্ধক গেল। তা যাক, কিন্তু সম্পত্তি দিয়ে পাপ ঢাকা পড়ল। পুত্র হারার চোখের জল? দুনিয়ার কত হতভাগ্যের চোখের জল অহর্নিশি ঝরছে তার সন্ধান রাখতে গেলে পাগল হ'য়ে যেতে হয়।

সম্পত্তি অর্ধেক গেল, কিন্তু চাল সমানই রইল; বরং নেকিকে আসল বানাতে গিয়ে মাজাঘষা বেড়েই গেল। ফাঁকির বাজারেই তো আড়ম্বরের রেওয়াজ বেশী। নইলে দাঁড়ি পাল্লা ঠিক থাকে না।

বললাম না, এদের রক্তে ডাকাতির বীজ আছে।

ব্রজেন্দ্রবাবু ছিল যেন সে যুগের মোগল বাদশা;—সে যেন হুকুম করবার জন্তেই জন্মেছিল। তার বড় বড় টানা টানা চোখ, আর পাতলা দুটি ঠোঁটের সামনে দাঁড়িয়ে অতিবড় দুঃসাহসীরও ঠোঁট বন্ধ হ'য়ে যেত;—এমনই রাশভারী।



কেনারাম মণ্ডলের ছেলে কলকাতায় পড়তে গিয়ে ইংরিজি চুল ছেটে এল। ব্রজেন্দ্রবাবু কেনারামকে সদরে ডেকে এনে জিজ্ঞেস করলেন,—বাবু, তোমার ছেলেটি কোথায় ?

কেনারাম পুত্র-সৌভাগ্যের গর্বে উল্লসিত হ'য়ে বাবুকে প্রণাম করে বললে,—আজ্ঞে, তাকে কলকাতায় পড়তে পাঠিয়েছি। তার মুখের বদি ইংরিজি শোনেন, বাবু.....

এতগুলি কথা এক সঙ্গে বাবুর সামনে বলবার সৌভাগ্য কেনারামের কখনও হয় নি।

বাবু মধ্য পথে থামিয়ে বললেন,—সে আর একদিনে হবে বাবু। আপাততঃ তার মাথাটা কামিয়ে দাও ; আর ইস্কুল থেকে ছাড়িয়ে নিয়ে কৃষিকর্মে লাগাও।

কেনারাম তো অবাক !

তার ইচ্ছে ছিল, জিজ্ঞেস করে, কেন ? কিন্তু বাবুর চোখের পানে তাকিয়ে যেন সংস্কারের বশে বললে—যে আজ্ঞে।

—যাও, এই জন্তই ডেকেছিলাম।

তারপরে সুরু হোল ভাঙ্গন।

ব্রজেন্দ্রবাবুর ছেলে মহেন্দ্রবাবু। কিছুদিন কলেজে পড়েছিলেন। সাম্য-মৈত্রী-স্বাধীনতা, সোশ্যালিজম্ সম্বন্ধেও তাঁর পড়া ছিল। পড়া ছিল বললে কম বলা হয়, দুনিয়ার ইতিহাস ও রাষ্ট্রনীতি সম্বন্ধে তাঁর যথেষ্ট অধিকার ছিল।

যেন ভুলে এই বংশে জন্মেছিলেন ;—বিধাতার ভুল। বাপের মতো

টানা-টানা চোখ,—উজ্জ্বল, তেজস্বী ; কিন্তু ঠোট দুটিতে সরলতা মাথানো ;—আশ্চর্য্য সন্মিলন !

পড়াটা ছিল তাঁর রোগ বল্লেই হয়। তাই ছেলের পড়ার দিকেই তাঁর দরদ ছিল বেশী।

এইটেই তাঁর জীবনের ট্রাজেডি।

বেশীদিনের তো কথা নয়! সবাই জানে, কি খরচটাই তিনি করেছিলেন, এই একটি মাত্র ছেলের পেছনে।

এখন তিনি থাকতেন কলকাতাতেই। কিছুদিন আগেই গ্রামে এমন ম্যালেরিয়া সুরূ হয় যে, গ্রাম উজাড় হ'য়ে গেল। যা ছ'চার ঘর ছিল, কেউ এখানে কেউ সেখানে পালিয়ে বাঁচল। জমিদার চলে গেলেন কলকাতায়। তার পরে, না ফিরে এলেন তিনি, না এল তাঁর প্রজারা।

মাটির ঘর দু'দিনের অনাদরেই খুর খুর করে মাটির বুকে ঝরে পড়ল। বাবুদের দালান ক্রমে ক্রমে ধ্বংস হ'য়ে যেতে লাগল। আজ আর বোঝাও যায় না, এখানে ছিল গ্রাম।

যেন উপকথা! যেন মরণ কাঠির স্পর্শে এক মুহূর্ত্তেই সমস্তটুকু মরে গেল! জীবন কাঠি? —কে জানে?.....সে দরদী কই?

ঋণ ক্রমে বেড়েই চলে ; যেন আসলের নাগাল ধরতে রেস দিচ্ছে।

দুর্ভাবনায় মহেন্দ্রবাবুর রক্ত মগজে ওঠে ; রাতে ঘুম হয় না। হায় রে, তবু কাউকে মুখ ফুটে বলবার পথ নেই,—মাগুষের সম্ভ্রম এমনি ঠুনকো ; হাওয়ার ভারে মাটিতে নেতিয়ে পড়ে। এই তো জীবনের ট্রাজেডি! বুক ফেটে যায়, তবু কাঁদবার উপায় নেই ;—যেন চোরের মা।

ছেলে বলে, বাবা, আজকে হেডমাষ্টারের farewell ; আমি টাকার খাতার দশ টাকা সহ করে এসেছি।

বাপের বুক কঁপে ওঠে। তবু ছেলের মাথাটিকে বুকের কাছে টেনে বলেন,—বেশ তো, নিয়ে যেও।

হায় রে বলা কি যায় ! এই চাকর, শুকুমার, লাবণ্য-ঢল-ঢল শিশুকে বলা কি যায়, যে নেই, টাকা নেই ! দুঃখের আগুনের স্পর্শ থেকে একে তো বাঁচাতেই হবে ! সোণার চেন বাঁধা যদি যায় তো যাক। সে সহিবে খুব ;—সহিবে না এই অফুটন্ত পুষ্পকোরকটিকে তপ্ত কড়ায় ছেড়ে দেওয়া। না, না, না, বাপের প্রাণে সব সহিতে পারে, কিন্তু একমাত্র পুত্রকে দুঃখ দেওয়া তার সহিবে না।

পাওনাদার আসে,—বলে,—আর তো পারা যায় না মহেন্দ্রবাবু, সুদ যে আসলকে ছাড়িয়ে যায়।

মহেন্দ্রবাবু মহাসমাদরে তাকে পাশে বসিয়ে বলেন,—যাক না ছাড়িয়ে, দেখি কতদূর ছাড়ায়। এমনই কি বেশী হয়েছে সুদ ?

পাওনাদার চোখ কপালে তুলে বলে,—বলেন কি মশাই ? আপনার জমিদারী বেচলে কত দাম হবে জানেন ?

শিউরে ওঠেন মহেন্দ্রবাবু ! জমিদারী বেচলে ? কি বলে ও ! কত দিনের কত পুরুষের রক্ত দিয়ে তৈরী এই জমিদারী, এ যাবে পরের হাতে, ঋণের দ্বায়ে ? কত দাম এই জমিদারীর ? হাসিও আসে। মাথার পাগড়ী বেঁধে সুদের সুদ আদায় করা যার পেশা, জীবনটা যে টাকা-আনা-পাই দিয়ে হিসেব মিলিয়ে রেখে দিয়েছে, সে জানবে জমিদারীর দাম ! এ কথার উত্তর নেই।

পাওনাদার বলে,—শোধ করবার ইচ্ছে যদি থাকতো মশাই, তা'হলে

চাল কমিয়ে ঋণের আল বাঁধতেন। ঋণে যার গলা ডুবে, তার মোটরে চড়ে হাওয়া খাওয়াও মানায় না, ছেলের পেছনে তিনটে মাষ্টার রাখাও মানায় না।

ছ'চোখে আগুন জ্বলে ওঠে! যা মনে আসে তাই যে বলে এ!

তাই তো বলে। বলে,—যা ভালো বোঝেন করুন। আমি আরও মাস দুই অপেক্ষা করব। তারপরে.....

বুক জ্বালা করে,...কঁাদতে ইচ্ছা হয়...

কোথায় অশ্রু! ছ'চোখে ডাকাতির আগুন ঝলকে উঠে! যেন শুকতারাতে আগুন লেগেছে।

একটু পরেই হাসি আসে। মনে-মনেই বলেন,—অতি ছোট এরা। এদের ওপরও রাগ করে! এদের ছোঁয়া লাগলেও মন অশুচি হয়ে যায়।

গায়ের জামা-কাপড় ছেড়ে ফেলে বেয়ারাকে দিয়ে দেন। বলেন,— এগুলো তুই পরিস, আর ওই চেয়ারটা.. চেয়ারটাকে...যা হয় করিস... ওটাকে জালিয়েই ফেলিস।

গৃহিণী বলেন, তুমি দিন-দিন কি হয়ে যাচ্ছ?

মহেন্দ্রবাবু হাসেন, যেন ঝরা-গোলাপের পাপড়ি। বলেন—কি হয়ে যাচ্ছি?

—তা কি টের পাওনা? চোখের কোণে কালি পড়েছে, রং হয়েছে ফ্যাকাসে। তোমার পানে চাওয়া যায় না। যতই দেখছি, বুকের রক্ত যেন জ্বল হয়ে যাচ্ছে। কেন অত ভাব?

কান্নায় স্বর অবরুদ্ধ হয়ে আসে।

আদর করে কাছে টেনে এনে মহেন্দ্রবাবু বলেন,—কিছু ভাবিনে, কিছু হইনি, তোমার মিথ্যে ভয় সুরমা, আমি বেশ আছি।

—ওগো, আমায় মিথ্যে আশ্বাস দিও না। ফাঁকি দিয়ে আমার চোখ এড়ান যায় না। কি তোমাব দৃঃখ আমায় বল।

হায় রে, দৃঃখের কি সীমা আছে ;—সমুদ্র। কোন্টা বলবেন, কোন্টা বলা যায় ! তবু আনন্দে মহেন্দ্রের দৃষ্টি ঝাপ্সা হয়ে যায়।

—বল, আমায় বল, কোথায় তোমার ব্যথা ! ঋণের কথা ভাব ? কত সে ঋণ ? আমার গহনাগুলো যদি……

এবারে হাসি আসে ! মনে মনে মহেন্দ্রবাবু বলেন,—ওগো কত তোমার গহনা, কতই বা তার দাম ! সমুদ্র বোজাতে চাও মুঠো-মুঠো বালু দিয়ে ! মহেন্দ্রবাবু চুপ করেই থাকেন।

কিন্তু যার চোখের সামনে স্বামীর দেহ দিনে-দিনে তিলে-তিলে শুকিয়ে যায়, চুপ করে কি তাকে এড়ান যায় ! সুরমা ছাড়েন না, বলেন,—তাতেও শোধ যাবে না ? চুপ করে থেকো না। আমার কথার উত্তর দাও।

—তুমি কেন ব্যস্ত হও, সুরমা। আমি সেজন্তো মোটে ভাবিনে। সে ঠিক হয়ে যাবে অখন।

সুরমা তবু ছাড়েন না, বলেন,—হ্যাঁ, ঠিক হবে,—ছাই ঠিক হবে। আমি জানি, আমার কপাল ভাঙ্গবে। না, না, সে হবে না। তুমি যে আমারই চোখের স্রুখে দিন-দিন শুকিয়ে যাবে, সে হোতে দোব না। যেমন করেই হোক, ঋণ শোধ দিতেই হবে।

নারীর সরলতায় হাসি আসে। বলেন,—কিন্তু সে কি করে শুনি।

মাথা ছুলিয়ে সুরমা বলেন,—সে আমি জানিনে। কিন্তু, যেমন করেই হোক ;—সর্বস্ব বাঁধা দিয়েও।

মহেন্দ্র হুঁষ্টুমির হাসি হেসে বলেন,—আমার সর্বস্ব বলতে তো তুমি ।  
কিন্তু, তোমাকে বাঁধা দেবার জায়গা...

লজ্জায় সুরমার মুখ রাঙ্গা হয়ে ওঠে,—পঞ্চদশী নববধূর লজ্জা ।  
বলেন,—যাও । আমি নাকি তাই বলছি । আচ্ছা, জমিদারী...

আর্ন্ত কণ্ঠে মহেন্দ্রবাবু বলেন,—জমিদারীর কি করতে বল ?

অশ্রুট স্বরে সুরমা বললেন,—যদি বিক্রি ..

মহেন্দ্রবাবুর চোখে আবার আগুন জলে ওঠে ।

ভয়ে-ভয়ে সুরমা বলেন,—ওগো, তুমি রাগ কোরো না । জমিদারী  
দিয়ে যদি তোমায় ফিরে পাই, সেই আমার ঢের । আমার আর কে  
আছে । সুরমার চোখ ছাপিয়ে হু হু করে অশ্রু ঝরে ।

মহেন্দ্রবাবু শান্ত কণ্ঠে বলেন,—খোকা বুঝি এল সুরমা । তার খাবার  
দাও গে ।

কারো দুঃখ কেউ বোঝেন নি । সুরমা বোঝেন নি কোথায় স্বামীর  
ব্যথা ; মহেন্দ্রও বোঝেন নি কোথায় সুরমার ব্যথা ।

এমনি ভুল বোঝার মধ্যে দুজনের মাঝে বেড়ে ওঠে ব্যবধান ।

আর খোকা ? সে কারও দুঃখই বোঝে নি । তার আবদার সনানে  
চলেছে । হু হু করে জলের মতো টাকা খরচ হয় ।

সেদিন দোল পূর্ণিমা । রঙের ধূম লেগেছে ।

খোকা মুঠো-মুঠো আবার নিয়ে বাশের জামা-কাপড় রঙে ভরিয়ে  
দিচ্ছিল । রঙই দিচ্ছে, রঙই দিচ্ছে, যেন রঙ দেওয়ার আর শেষ নেই ।

হঠাৎ দোরের পর্দা ফাঁক করে সুরমা ডাকলেন, থোকা। বলেই চলে যাচ্ছিলেন।

কিছুদিন থেকেই স্বামী-স্ত্রীতে কথা বন্ধ।

কি মনে হোল, মহেন্দ্রবাবু দোরের কাছ পর্যন্ত গিয়ে ডাকলেন,—শোন।

মুখ না ফিরিয়েই সুরমা বললেন,—বল।

গলার স্বর নামিয়ে মুখে হাসি এনে মহেন্দ্র বললেন,—আজকে দোল।

—সে জানি,—বলেই সুরমা চলে গেলেন।

হতভঙ্গের মতো মহেন্দ্র তার প্রতিধ্বনি করলেন,—সে জানি। দোরের কাছে কাঠ হয়ে দাঁড়িয়ে রইলেন।

শেষ, শেষ, শেষ !.....

সুরমাও তার কাছ থেকে সরে যেতে চায়। পোনের বছরের দোলও পথের মধ্যে এমনি করে হঠাৎ থেমে যায়,—এমনি ছুনিয়া !

আস্তে আস্তে মহেন্দ্রবাবু তাঁর আসনে এসে বসলেন।

পোনের বছরের পোনেরটি দোলপূর্ণিমার স্মৃতি...

জমিদারী...জমিদারী...জমিদারী। সকলের নজর পড়েছে এই জমিদারীর ওপর ; পাওনাদারেরও, সুরমারও। দাঁতে দাঁত টিপে মহেন্দ্র বললেন, কিন্তু একে বাঁচাবোই সকলের লুক্কৃষ্টি থেকে।

থোকা বললে,—মাথা নামাও না, বাবা। আমি তোমার মাথায় রঙ দিতে পারছি না যে।

বাইরে পায়ের শব্দ হোল।

মহেন্দ্র শব্দ হয়ে বসলেন। আপন মনে বললেন, আঁসুক সুরমা। দোলের স্মৃতি আমিও তুললাম।

পর্দার ফাঁকে উকি দিল একঘোড়া গৌফ।

পাওনাদার কৃতার্থের মতো হেসে বললে,—খবর দিয়ে আসিনি,—  
পাছে বলে পাঠান, বাড়ী নেই।

তবে সুরমা নয়। মহেন্দ্র ফ্যাল-ফ্যাল করে চেয়ে রইলেন। কি  
বলে এ!

পাওনাদার বলতে লাগল,—জগুস সাহেবের সঙ্গে কথা করে এলাম।  
তিনি জুটমিল খুলতে চান, এ খবর সত্যি।

—বাঁচা গেল। কিন্তু, আমায় কি করতে বলেন?

—তিনি আপনার জমিদারীটা কিনতে রাজি হয়েছেন। সাত লাখ  
টাকা পর্যন্ত উঠেছেন, আরও লাখখানেক খুব টেনে টুনে ধরলে হয়তো  
উঠতে পারেন।

মহেন্দ্রবাবু চেয়ারের দুটা হাতা দু'হাতে শক্ত করে চেপে ধরলেন।  
তঁার চোখ দুটো দপ্ ক'রে জলে উঠলো।

আপনমনে পাওনাদার বলে চললো,—এর চেয়ে বেশী দাম  
আপনি যতই চেষ্টা করুন পাবেন না। কি বলেন, আমি কথা  
দিয়ে আসি।

আঘাত...আঘাত...আঘাত...

তাকে নিতান্ত অসহায় পেয়ে অক্টি ছোট যে সেও আঘাত দেবার  
স্পর্ধা পেয়েছে! কিন্তু আঘাত সওয়ারও সীমা আছে।

—একটু বসুন, আমি আসছি।

মিনিট দশেক পরে মহেন্দ্রবাবু ফিরে এলেন।

সঙ্গে সঙ্গে গোটাকয়েক পিস্তলের আওয়াজ হোল।

থোকা আর্ন্তনাদ করে উঠল।



লাস-দাসী, লোকজন ছুটে এসে দেখলে, সেই ধূমাকীর্ণ ঘরের দুকোণে  
হুজনের দেহ ছটফট করছে।

ভলকে-ভলকে রক্ত, ঘর ভেসে যায়...

কতক্ষণ চুপ করিয়া বসিয়াছিলাম জানি না। কাছে এবং দূরে  
কোনও শব্দ নাই।

শুধু দূরে হৃদিকে দুইটা মিল নিঃশব্দে ধূম উদ্গীরণ করিতেছে।

পুকুরের নিস্তব্ধ জলে একটা ব্যাং লাফাইয়া পড়িল—টুপ্।

বলিলাম, চল, ওঠা যাক।

নিঃশব্দে হুজনে পথ চলিতে লাগিলাম।

হঠাৎ একসময়ে জিজ্ঞাসা করিলাম,—আর থোকা?

বন্ধু চমকাইয়া উঠিলেন,—কে থোকা?

—থোকা আজও বেঁচে আছে?

—এই মিলেই চটের ওপর নম্বর দেয়।

বুকের মধ্যে কেমন করিয়া উঠিল...

আজও দোল। কুলীদের মধ্যে এখনও দোলের উন্মত্ত কদর্য  
কোলাহল থামে নাই। এক বৎসরের দোল এক দিনেই ইহার। বৃষ্টি  
খেলিয়া লইতে চায়।

একদল কুলিবালক নিরীহ ভালোমামুষ ভাবিয়া আমাদের গায়ে রঙ  
দ্বিতে ছুটিয়া আসিল। বোধ করি বন্ধুকে দেখিয়াই অকস্মাৎ থমকিয়া

দাঁড়াইল। “বাপ্‌পা হো, বড়াবাবু” বলিয়াই চীৎকার করিয়া যে যে-দিকে পারিল উর্দ্ধশ্বাসে পলাইয়া গেল। শুধু একটা বছর দশেকের ছেলে দুই হাতে নর্দমায় ভেজান ঞ্চাকড়া লইয়া বুকি সঙ্গীদের কাণ্ড দেখিয়া অবাক হইয়া দাঁড়াইয়া রহিল।

আমি গম্ভীরভাবে বলিলাম,—এইও বাচ্চা, রঙ মৎ দেনা।

ছেলেটি তাহার বড়-বড় টানা চোখ দুইটা মোলয়া বলিল,—আমি তোমার গায়ে রঙ দিই নি।

বা রে! বাংলা বলে!

অকস্মাৎ পিঠের উপর একটা ঞ্চাকড়া পড়িল;—কি দুর্গন্ধ! ছেলেটি কদর্যা চীৎকার করিতে করিতে অন্ধকারে মিশিয়া গেল।

বন্ধু একটা দীর্ঘশ্বাস ফেলিয়া বলিলেন,—ওটি খোকার ছেলে।

## জ্যাঠামশাই

বরেন্দ্রশঙ্কর শিবশঙ্করের বৈমাত্র ভায়ের ছেলে। কিন্তু বাইরে থেকে তা বোঝবার উপায় নেই।

মাত্র একটা মাঠের দু'পাশে দু'জনের বাড়ী। দু'খানা বাড়ীই মস্ত বড়। কিন্তু এই একটা মাঠের ব্যবধান কেন যে কিছুতেই লুপ্ত হ'ল না সে কথা জানতে গেলে আগের ইতিহাস জানা প্রয়োজন।

রায় বংশ বহুকাল থেকে এই গ্রামে বাস ক'রে আসছেন। ধনী এবং প্রবল প্রতাপাশ্রিত জমিদার ব'লে তাঁদের খ্যাতি বহুদূর পর্য্যন্ত বিস্তৃত। শিবশঙ্করের পিতা বরদাশঙ্করের সময়েও সেই খ্যাতি ক্ষুণ্ণ হয়নি। এর প্রধান কারণ, তাঁদের বংশে পুত্র-সন্তানের সংখ্যা বরাবরই অল্প। কোনো পুরুষেই শেষ পর্য্যন্ত একটির বেশী সন্তান বাঁচেনি।

শিবশঙ্করের বয়স যখন নয়-দশ বৎসর তখন তাঁর মাতৃ-বিয়োগ হয়। বৎসরান্তে বরদাশঙ্কর পুনরায় দার পরিগ্রহ করেন। এবং বৎসর দুই-তিন পরে বরেন্দ্রশঙ্করের পিতা দিব্যেন্দুশঙ্কর জন্মগ্রহণ করেন।

বিমাতা কোনো দিনই শিবশঙ্করকে স্নেহের চক্ষে দেখতে পারেননি। দিব্যেন্দুশঙ্করের জন্মের পর তিনি পিতার আদর থেকেও বঞ্চিত হলেন। তখন তাঁর বয়স তেরো-চৌদ্দ বৎসর। বাড়ীতে আর তৃতীয় কোনো আত্মীয় না থাকায় তখন থেকেই তিনি নিঃসঙ্গ। সেই নিঃসঙ্গতা দূর করবার জন্তে তাঁকে বাইরে থেকে সঙ্গী সংগ্রহ করতে হয়েছিল।

এ জিনিসটা এ বংশে এই প্রথম। বংশের আভিজাত্য রক্ষা করবার

জন্তে তাঁদের বংশে কেউ কখনও বাইরের কারও সঙ্গে সমানে-সমানে মিলতেন না। সমবয়সীর অভাব এই বাড়ীতে চিরকালই। কিন্তু জনক-জননী ও পরিবারভুক্ত অগ্রাগ্র আত্মীয়-স্বজনের স্নেহে সঙ্গীর অভাব কাউকে বোধ করতে হয়নি। জনক-জননীর স্নেহের অভাবেই যে বালক শিবশঙ্করকে বংশের চিরাচরিত প্রথার ব্যতিক্রম করতে হয়েছিল এ কথা অনুমান করা যায়।

এর জন্তে তাঁকে তিরস্কার, লাঞ্ছনা এবং নির্যাতন যথেষ্ট সহ্য করতে হ'ত। দুর্দান্ত বলিষ্ঠ বালক নিঃশব্দ ক্রোধে সেই অত্যাচার সহ্য করত। এর ফল হয়েছিল এই যে, শিবশঙ্কর দিব্যেন্দুশঙ্করকেই তার লাঞ্ছনা ও অনাদরের কারণ ব'লে অনুভব করতে লাগলেন। প্রাচীন দাসীমহল এবং বাইরের সঙ্গীমহল থেকে এই অনুভূতিকে বেগবান করার প্রয়াসেরও অভাব ঘটেনি।

আর একটি বিষয়েও শিবশঙ্কর এই বংশের চিরাচরিত প্রথা অতিক্রম করেছিলেন। সেটি বিদ্যাশিক্ষা বিষয়ে। এ বংশে পাঠশালে যাওয়া প্রথা ছিল না। কারণ সেখানে আরও পাঁচজন বাইরের ছেলের সঙ্গে মিশতে হয়। একজন পণ্ডিত এসে ছেলেদের পড়িয়ে যেতেন। এই পড়া কোনো ক্ষেত্রেই প্রয়োজনের অতিরিক্তকে অতিক্রম করেনি। কঠোর হস্তে জমিদারী চালাবার জন্তে যেটুকু শিক্ষা নিতান্ত অপরিহার্য ছিল, কোনো বালক বাহুল্যবোধে তার বেশি আর কিছু গ্রহণ করেনি। শিবশঙ্কর সেই সাধারণ প্রথার মধ্যে নিজেকে সীমাবদ্ধ রাখেননি। পণ্ডিত মহাশয়ের যতটুকু বিদ্যা ছিল সমস্ত তিনি নিঃশেষে নির্দয়ভাবে শোষণ করে নিতেন। পণ্ডিত মহাশয়ের পড়া শেষ ক'রে শিবশঙ্কর ইংরেজী পড়বার জন্তে একজন শিক্ষকও রেখেছিলেন। বরদাশঙ্কর ইচ্ছার বিরুদ্ধেও তাতে সন্মত হতে বাধ্য হয়েছিলেন।

নির্দয়তা শিবশঙ্করের চরিত্রে একটা বৈশিষ্ট্য পরিণত হয়েছিল। কি সঙ্গীদের সঙ্গে খেলার ক্ষেত্রে, কি পড়াশুনায়—কোথাও তাঁর মনে দয়ার লেশমাত্র ছিল না। নিত্য নতুন নির্দয় খেলার তিনি ছিলেন আবিষ্কারক। এই নির্দয়তা পড়ার ক্ষেত্রে সুপরিষ্কৃত ছিল। বলিষ্ঠ শিশু যেমন নিষ্ঠুরভাবে মাতৃসুত পান করে, শিক্ষকের কাছ থেকেও তেমনি নির্দয়ভাবে তিনি বিছা আহরণ করতেন।

এই নির্দয়তাই একদিন তাঁর জীবনের গতি অপ্রত্যাশিত ভাবে পরিবর্তিত করেছিল।

বিমাতার নির্দয়তায় এবং পিতার ঔদাসীন্নে তাঁর মনে কোমলতা প্রশ্রয় পায়নি। তার প্রতিক্রিয়ারূপ দিব্যেন্দুশঙ্করের উপর তাঁর যেন একটা জাতক্রোধ বেড়ে উঠেছিল। অত্যন্ত নিষ্ঠুরভাবে সেই ক্রোধ একদিন আত্মপ্রকাশ করলে।

একদিন দেখা গেল, সন্ধ্যার অন্ধকারে একটা কাপড় দিয়ে মুখ বেঁধে শিবশঙ্কর দিব্যেন্দুশঙ্করকে তুলে নিয়ে যাচ্ছেন, বাগানের ইঁদারার দিকে। দিব্যেন্দুর পরমায়ু ছিল। বাড়ীর চাকরদের কে যেন দেখতে পেয়েই চীৎকার করে উঠলো। আলো নিয়ে লোক ছুটলো। একটা ঝোপের দিকে মুখ-বাঁধা অবস্থায় দিব্যেন্দুকে পাওয়া গেল। কিন্তু শিবশঙ্করকে কোথাও পাওয়া গেল না।

শিবশঙ্করের বয়স তখন আঠারো-উনিশ।

কুড়ি বৎসর পরে শিবশঙ্কর গ্রামে ফিরে এলেন।

বরদাশঙ্কর তখন পরলোকে। বিমাতা তখনও জীবিত পৈতৃক

গৃহে শিবশঙ্কর স্থান পেলেন না। জানা গেল, বরদাশঙ্কর তাঁর উইলে শিবশঙ্করকে সম্পত্তির অংশ থেকে সম্পূর্ণরূপে বঞ্চিত করে গেছেন। তিনি পিতার ত্যাজ্যপুত্র।

যেমন নিঃশব্দে গ্রামে প্রবেশ করেছিলেন, তেমন নিঃশব্দেই তিনি ফিরে আসছিলেন। কিন্তু যে শিক্ষক তাঁদের দুই ভাইকেই লেখাপড়া শিখিয়েছিলেন, তিনি তাঁকে পথ থেকে ফিরিয়ে নিয়ে এলেন। উইলের তিনি একজন সাক্ষী। তিনি বললেন, বরদাশঙ্কর শিবশঙ্করকে সম্পত্তি থেকে বঞ্চিত করলেও খানিকটা জায়গা তাঁর জন্তে রেখে গেছেন। উইলে স্পষ্টই উল্লেখ আছে, শিবশঙ্কর যদি জীবিত থাকেন এবং গ্রামে ফিরে আসেন, তা হ'লে ওই জায়গায় বাড়ী ক'রে তিনি বাস করতে পারেন। দিব্যেন্দ্রশঙ্কর তাতে আপত্তি করতে পারবেন না।

শিবশঙ্কর বিবয়টি নিঃশব্দে ভেবে দেখলেন এবং তাতে সন্তুষ্ট হলেন।

তাঁদের পৈতৃক প্রাসাদোপম বাড়ীর পরেই একটা মাঠ। তার পাশেই উইলে উল্লিখিত এক বিবা যায়গা। শিবশঙ্কর জায়গাটি ঘিরে নিয়ে ছোট একখানা একতলা বাড়ী তৈরী করলেন। এবং তারপরে বিবাহও করলেন। তখন তাঁর বয়স চল্লিশ উত্তীর্ণ হয়েছে।

এই বিবাহের কথা বরেন্দ্রশঙ্করেরও স্মরণ আছে।

শিবশঙ্করের কোনো বন্ধু ছিল না। বাল্যের বন্ধুরা কবে তাঁর মন থেকে মুছে গেছে। পৈতৃক রক্তধারাই বলবান। বাল্যের বন্ধুরা এখন আর তাঁর কাছে আসতেও সাহস করে না। দূর থেকে দেখা যায় স্বল্পভাষী, উন্নতদেহ শিবশঙ্কর হয় সম্মুখের বাগান্দায় নিঃশব্দে পদচারণা করছেন, নয় তো বাড়ীর পিছনের সজির জমি তদারক করছেন।

একথা বোঝা গেল, পৈতৃক জমিদারী থেকে বঞ্চিত হ'লেও শিবশঙ্কর

নিঃস্ব নন। কিন্তু কি পরিমাণ অর্থ কোথা থেকে কিভাবে তিনি উপার্জন ক'রে এনেছেন তাও জানবার সুযোগ কারও হ'ল না।

শিবশঙ্কর গ্রামে ব'সে মহাজনী কারবার আরম্ভ করলেন। সেই স্ত্রে গ্রামের এবং গ্রামের বাহিরের লোকও তাঁর কাছে আসতো। কিন্তু আসতো শুধু ঋণ গ্রহণের প্রয়োজনে। নইলে নয়। প্রতিবেশীর সঙ্গে সুরসাল আলোচনা করার অবসর, মন এবং মেজাজ কোনটাই তাঁর ছিল না।

মহাজনী কারবারে লাভ প্রচুর। দেখতে দেখতে শিবশঙ্করের একতলা ছোটবাড়ী দুই পাশে এবং পিছনে প্রসারিত হ'ল, সামনের দিকে লোহার রেলিং এবং জমকালো ফটক হ'ল এবং আরও কিছুদিন পরে দোতালাও উঠলো।

শিবশঙ্করের গৃহিণী দশ বৎসরের দাম্পত্য জীবনে এই পর্য্যন্তই দেখে গিয়েছিলেন। এই পারিবারিক কারাগারে বাইরের মহিলাদের সঙ্গে বন্ধুত্ব করার পথে তাঁর বাধা ছিল অনেক। সুতরাং স্বামীর কাছ থেকে কি তিনি পেয়েছিলেন সে কথা কেউ জানে না। তিনি কোনো সন্তান রেখে যাননি।

জীবন মৃত্যুর পরেও শিবশঙ্করের জীবনে কোনো পরিবর্তন এলো না। টাকা ধার দেওয়া, সুদ গুণে নেওয়া, হিসাব-নিকাশ, সজির ক্ষেত এবং সুমুখের বারান্দায় একাকী নিঃশব্দে পদচারণা।

পরিবর্তন যা এলো তা বাইরের।

বাপ-মায়ের অত্যধিক আদরে পরিবর্দ্ধিত, অলস ও বিলাসী দিব্যেন্দুশঙ্কর জমিদারী পরিচালনায় একেবারেই অযোগ্য ছিলেন। বস্তুত অমিতব্যয়িতা ছাড়া দস্ত করবার আর বিশেষ কিছুই তাঁর ছিল না।

তার ফল যা হবার তাই হ'ল।

অতি অল্পকালের মধ্যেই তিনি প্রচুর ঋণভারে জর্জরিত হলেন। মহাজনের তাগাদায় আহার নিদ্রা পর্য্যন্ত বিষাক্ত হয়ে উঠলো। মৃত্যুর পূর্বেই তিনি জেনে গেলেন, একমাত্র পুত্র বরেন্দ্রশঙ্করের মোটা ভাত-কাপড়ের সংস্থান ছাড়া আর কিছুই রইলো না। কেবল জানতে পারলেন না, কি ষাটমস্ত্রে সেই সম্পত্তি শিবশঙ্করের হস্তগত হ'ল। উভয়ের মধ্যে বাক্যালাপ দূরের কথা, কখনও সাক্ষাৎ পর্য্যন্ত হয়নি। তাঁর কাছ থেকে দিব্যেন্দুশঙ্কর কখনও একটি পয়সাও ঋণ গ্রহণ করেননি।

অথচ বিষ্ময়কর হ'লেও অত্যন্ত সহজভাবেই তা সত্য হ'ল।

আঠারো-উনিশ বৎসর বয়সে পিতৃগৃহ ত্যাগ করার পরে একটি দিনের জন্তোও শিবশঙ্কর সেখানে পদার্পণ করেননি। দিব্যেন্দুশঙ্করের মৃত্যুকালেও না।

ব্যতিক্রম হ'ল দিব্যেন্দুশঙ্করের শ্রাদ্ধ-দিবসে। সকলকে সচকিত ক'রে অত্যন্ত অতর্কিতে এবং নিঃশব্দে তিনি শ্রাদ্ধসভায় উপস্থিত হলেন। সকলে সসম্মমে উঠে দাঁড়ালো। শিবশঙ্কর ইঙ্গিতে তাদের বসতে বললেন। কিন্তু নিজে বসলেন না। এক বিন্দু জলও গ্রহণ করলেন না। কয়েক মিনিট নিঃশব্দে শ্রাদ্ধমণ্ডপের দিকে চেয়ে থেকে আবার বেরিয়ে গেলেন।

পিতৃগৃহ ত্যাগ করার পর এই তাঁর সেখানে প্রথম ও শেষ প্রবেশ।

তারপরেও কিছুকাল কেটে গেল।

দুই গৃহের মধ্যে এমন একটি অলজ্জ্য এবং উত্তেজনা-বিহীন ব্যবধানের সৃষ্টি হয়েছিল যে, দিব্যেন্দুশঙ্করের মৃত্যুর পরেও তা তিরোহিত হ'ল না।



বিষয়-সম্পত্তির আর বিশেষ কিছু ছিল না। স্তূতরাং বরেন্দ্রশঙ্করকে চাকুরীর অঙ্ঘেষণে বাইরে যেতে হ'ল। বাড়ীতে রইল তার স্ত্রী এবং শিশুপুত্র।

ক'লকাতা দূরে নয়। বরেন্দ্র শনিবারে আফিস শেষে বাড়ী আসে। রবিবার থাকে। আবার সোমবারে চ'লে যায়। একক শিবশঙ্কর প্রবল প্রতাপে জমিদারী এবং মহাজনী চালান। উভয়ের মধ্যে কণাও দেখা হয় না। কুশল-প্রশ্ন বিনিময়ের অবকাশও হয় না।

এমনি ক'রেই দিন চলছিলো।

সেবারে শনিবারে বাড়ী ফিরে বরেন্দ্র রাত্রে যখন খেতে বসেছে, স্ত্রী অপর্ণা বললে, জ্যাঠামশায়ের অসুখ বেশী।

অপর্ণার এক জ্যাঠামশাই অনেক দিন থেকেই ভুগছিলেন।

বরেন্দ্র নির্লিপ্তভাবে জিজ্ঞাসা করলে, কবে চিঠি এলো ?

অপর্ণা সর্বস্বয়ে বললে, চিঠি কি গো ? পাশের বাড়ী থেকে জ্যাঠামশায়ের খবর কি ডাকে আসবে ?

এবার বরেন্দ্রও বিস্মিত হ'ল।

বললে, পাশের বাড়ী কি বলছ ? তিনি ভাগলপুরে থাকেন না ?

অপর্ণা স্বামীর ভুল বুঝতে পারলে।

বললে, আমার জ্যাঠামশাই নয়, তোমার জ্যাঠামশাই। শহর থেকে ডাক্তার এসেছেন। বলেছেন, বাঁচবার আশা নাকি কমই।

বরেন্দ্র শুধু বললে, ও।

—তোমার একবার দেখতে যাওয়া উচিত।

—আমার ? কি দুঃখে ?

—পর তো নয়। নিজের জ্যাঠামশাই।

—হাঁ। যিনি ছেলেবেলায় বাবাকে খুন করতে গিয়েছিলেন। বাবার

মৃত্যুশয্যা একবার দেখতে আসেননি। শ্রাদ্ধের দিনে একবার এলেন বটে, কিন্তু জলগ্রহণ করেননি। এসব আমি কিছুতেই ভুলতে পারি না।

অপর্ণা চুপ ক'রে রইল। কিন্তু শোবার সময় কথাটা আর একবার পারলে।

বললে, কিন্তু দেখ, 'তুমি ছাড়া আর ঠুঁর কে আছে? তুমিই ঠুঁর শ্রাদ্ধাধিকারী। সম্পত্তির অধিকারীও তুমি। ঠুঁর তো ছেলে নেই।

বরেন্দ্র শাস্তকণ্ঠে বললে, সেই জন্তেই আরও আমি যেতে পারি না অপর্ণা। উনি হয়তো ভাববেন, জীবনে কোনোদিন ঠুঁর বাড়ীর ফটক পার হ'লাম না, এখন মৃত্যুকালে সম্পত্তির লোভে এসে হাজির হয়েছি। রায় বংশের ছেলের পক্ষে সে হীনতা স্বীকার সম্ভব নয়।

অপর্ণা আর জেদ করলে না।

রায় বংশকে সে জানে। বরেন্দ্রকে সে চেনে। শিবশঙ্করের মৃত্যুর পূর্বে সে যে ও-বাড়ীর ফটক পার হতে পারে না, সে বিষয়েও তার সংশয় নেই। কিন্তু মৃত্যুশয্যাশায়ী যে বৃদ্ধ পাশের বিরাট অট্টালিকায় স্বজন-বান্ধবহীন অসহায় অবস্থায় একাকী অবস্থান করছেন, তিনি যে বরেন্দ্রের নিজের জ্যাঠামহাশয়, এ কথা ভেবে তার নারীহৃদয় কিছুতেই অস্তিত্ব বোধ করতে পারলে না।

সোমবার সকালের ট্রেনে বরেন্দ্র ক'লকাতা চলে গেল।

দুপুরে অপর্ণা ঝিকে দিয়ে খবর পাঠালে, সে জ্যাঠামহাশয়কে দেখতে যাবে। তার একটু পরেই পুত্র অবনীশঙ্করকে কোলে ক'রে ঝি

এবং তার পিছনে অপর্ণা লতাগুল্ম পরিবেষ্টিত মাঠটুকু অতিক্রম ক'রে থিড়কির দরজায় উপস্থিত হ'ল।

দরজা খোলাই ছিল। যি সসম্মুখে তাদের ভিতরে নিয়ে এল।

শিবশঙ্করকে অপর্ণা জীবনে একবার মাত্র দেখেছে। দিব্যেন্দুশঙ্করের শ্রাদ্ধের সময়। কিন্তু কখনও কথা বলেনি। শুনেছে, অত্যন্ত রাশভারী এবং কঠোর প্রকৃতির লোক। এ সম্বন্ধে কারও মনে মতবৈধ নাই। তাঁর প্রশস্ত শোবার ঘরের সামনে এসে একবার ভয়ে সে থমকে দাঁড়ালো। কিন্তু তখনই সে ভয় দূর হ'ল।

মস্ত বড় একখানা খাটে দেওয়ালের দিকে মুখ ক'রে শিবশঙ্কর শুয়েছিলেন। পল্লশব্দে মুখ ফিরিয়ে বললেন, বোমা! এসো, এসো।

অপর্ণা নম্রভাবে তাঁর পায়ে তলার দিকে এসে দাঁড়ালো।

যি বাইরে থেকেই অবনীকে নামিয়ে দিয়েছিল। 'এসো, এসো' শব্দ তার কানে গিয়েছিল। সে সটান এসে শিবশঙ্করের মুখের কাছে দাঁড়ালো।

মাথা নেড়ে বললে, কি বল?

শিবশঙ্কর একেবারে উল্লসিত হয়ে উঠলেন। খপ ক'রে ওর ফুলের মতো নরম ছোট্ট হাতখানি ধ'রে বললেন, কিছুই বলিনি ভাই। শুধু খুঁজছিলাম, তুমি আসছ না কেন?

—এই তো এলাম। আবার কোথায় আসব? তোমার বিছানার ওপরে?

—হ্যাঁ, নইলে ভালো লাগবে কেন?

—বকবে না তো?

—তোমাকে বকি এত বড় সাহস আমার নেই। শুনছ বোমা, কি বলে তোমার ছেলে?

অপর্ণা লজ্জিতভাবে বললে, ও ভারি দুষ্টু ।

শিবশঙ্কর হেসে বললে, হবে না ? রায় বংশের ছেলে দুষ্টু না হ'লে মানাবে কেন ? তোমাকে বলি শোনো । একেই আমি খুঁজছিলাম । মানে, আমাকে এসে যে 'তুমি' বলতে পারে—তাকে । এতদিন পরে সেই লোককে পেলাম । আমার আর কোনো দুশ্চিন্তা রইলো না । কিন্তু তুমি দাঁড়িয়ে রইলে কেন বোমা ?

এ বাড়ীর ঝি তাড়াতাড়ি একটা আসন আনছিলো ।

শিবশঙ্কর বিরক্তভাবে বললেন, আসন কি হবে ? তুমি আমার কাছে এসে বোসো বোমা ।

অপর্ণা আর সঙ্কোচ মাত্র করলে না । গুঁর মাথার শিয়রে ব'সে বড় বড় পাকা চুলে আঁস্তে আঁস্তে হাত বুলিয়ে দিতে লাগলো । সে স্পর্শে শিবশঙ্করের চোখ বন্ধ হয়ে এল ।

মনে হ'ল অক্ষুট স্বরে একবার যেন বললেন, আঃ !

একটু পরেই ঘুমিয়ে গেলেন ।

ঝি এসে সন্তর্পণে অবনীকে নিয়ে গেল । পাছে গুঁর ঘুমের ব্যাবাত হয় ।

এ বাড়ীর ঝি চুপি চুপি এসে বললে, আজ সাতদিন অসুখ হয়েছে, একটিবার চোখের পাতা বোঁজেননি । এতক্ষণে ঘুমুলেন ।

বৃহস্পতিবারে অসুখটা বাড়াবাড়িতে দাঁড়ালো ।

শহরের ডাক্তার তো রয়েছেনই । তা ছাড়া আরও একজন বড় ডাক্তার এলেন । বরেন্দ্রের কাছে টেলিগ্রামও গেল । কিন্তু সে বিশেষ গ্রাহ্য করলে না ।

শনিবারের দিন যথারীতি বাড়ী এসে দেখলে কেউ নেই। ঝিকে জিজ্ঞাসা করলে, এরা কোথায় ?

—বোমা তো সেই সোমবার থেকে ও বাড়ীতে।

—কোন বাড়ীতে ?

—ও বাড়ীতে। খবর দেবো ?

—কেমন আছেন উনি ?

—বড্ড বাড়াবাড়ী হয়েছিল। শুক্রবার সকাল থেকে একটু ভালো আছেন। খবর দেব ?

কি ভেবে বরেন্দ্র বললে, না থাক। আমিই যাচ্ছি।

ও বাড়ীতে গিয়ে দেখে, শিবশঙ্কর খাটের বাজুতে ঠেস দিয়ে অর্দ্ধশায়িত। তাঁর সামনে অবনী। একটা মোটর গাড়ী নিয়ে দু'জনে খেলা হচ্ছে।

বরেন্দ্রকে তিনি দেখতে পাননি।

অবনী একবার বাবার দিকে চেয়ে ইসারায় বললে, দাছ !

এতক্ষণে শিবশঙ্কর পিছন ফিরে চাইলেন। সঙ্গে সঙ্গে তার ললাটে জ্রুটি রেখা ফুটে উঠলো।

বরেন্দ্র জিজ্ঞাসা করলে, কেমন আছেন ?

শিবশঙ্কর সংক্ষেপে বলিলেন, ভালো।

বরেন্দ্র কিছুক্ষণ নিঃশব্দে দাঁড়িয়ে থেকে বললে, আসবি অবনী ?

অবনীর মোটরগাড়ীটা চলছিলো না। বিরক্তভাবে বললে, না, তুমি যাও।

তারপরে শিবশঙ্করকে একটা ঠেলা দিয়ে বললে, গাড়ীটা চলছে না যে, দাছ। তুমি দাও না চালিয়ে।

শিবশঙ্কর মোটরগাড়ীটা নিয়ে ব্যস্ত হয়ে উঠলেন।

বললেন, চলবে বৈকি ভাই। মোটরগাড়ী বন্ধ হ'লে কি চলে? এই তো চলছে।

বরেন্দ্র চলে আসবে এমন সময় দেখে ওদিকের দরজা দিয়ে অপর্ণা দুধের বাটী আঁচলে ধরে সন্তর্পণে আসছে।

ওকে দেখে অপর্ণা থমকে দাঁড়ালো। সহাস্তে ইসারায় বললে, তুমি চল, আমি যাচ্ছি।

